

**ASO LUA, 24 IANUARI 2023**

*Na toe amatalia Taulumaga a le Fono Aoao Faitulafono i le itula e 3:03 i le afiafi.*

*Na toe faaauau felafolafoaiga i luga o le Tulafono Tau Faaofi o le Faataauina o Tupe Faaopoopo (Nu.1) 2022/2023.*

**FAILAUTUSI:** I le ava tele ou te tulai ai ma le agaga faaaloalo mo le silafia e le paia o le Palemene, talu ai o tuatuaia le maalofia ua toesea ai le Afioga i le Fofoga Fetalai mo se taimi o Taulumaga a le Fono Aoao Faitulafono i le afiafi nei. Ae i le usitaia o aiaiga o Tulafono Tumau 27(1), ou te faasilasila aloaia atu ai, o le a nofoia nei e le Afioga i le Sui Fofoga Fetalai le Nofoa Na faaalua e le Failautusi ona o nisi o tuatuaia le maalofia ua toesea ai e le Fofoga Fetalai lona nofoa mo se taimi o taualumaga o le Fono aoao Faitulafono i le afiafi nei.

Ae i le usitaia o Tulafono Tumau 27(1) ou te faasilasila aloaia atu ai o le a nofoia nei e le Afioga i le Sui Fofoga Fetalai le Nofoa mo le taitaiina o Taulumaga faaauau a le Fono Aoao Faitulafono o lo o faagasolo nei.

Ma le faaaloalo tele.

**SUI FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

I le toe taliu mai ai i le toe amatalia o tatou galuega, e i ai le manatu ua saoialo le taligasua a le paia o lenei Palemene. Ua maua foi se faasiligamalosai e faaauau ai le tatou galuega, ua faamalo le onosai. E i ai le talitonuga ua silafia manino e le paia o le Palemene le faasilasilaga a le Failautusi, mo le toesea ai o le Fofoga Fetalai i se taimi o tatou Taulumaga i le afiafi nei ona o tuatuaia le maalofia. O le tatalo e malu le Nofoa i le tofa ma le utaga loloto a le paia o le Maota, tatou galulue faatasi e mama ai le galuega.

E faataatiaese a tatou Taulumaga mo le malologa i le aoauli, o lo o saunoa le Sui Taitai o le Itu Agai, ou te tapa ma le faaaloalo lau afioga e te tulai mai e faaauau lau saunoaga.

**Tofa Hon LAUOFO FONOTOE NUA FESILI PIERRE LAUOFO:** Faafetai i lau afioga i le Fofoga Fetalai, atonu sa maua se malologa lelei foi i le amataga o le aoauli o lenei aso. O lea e matau atu o le taimi muamua lea ua seei ai lau afioga i le Sui Fofoga Fetalai e avea ma

Fofoga Fetalai i lenei foi Paeaiga, ia faamalo. O le matou tatalo ia i ai le Agaga o le Atua e tautoaluaia le tauaveina o le Nofoa, o le tofi.

E tatou te malolo o lea ou te talanoa i le tatou atinae o tagata tafafao maimoa mai Samoa, i le manaomia lea o le toe uunaia ma le toe lalaga i luga, aua lenei vaitau o lea ua toe tatala feoaiga. E pei lava foi ona ou taua, ae le i aafia tatou i le Koviti, sa tatou maua se tupe pe 400 miliona tala i le tausaga mai le atinae lea. E pei foi ona ou taua, o le lelei o le atinae lea, o le feoi ai o tagata tafafao maimoa mai i totonu o le atunuu Upolu ma Savaii ma isi vaega o le atunuu, e faatau ia oloa e na i o tatou tagata, e le gata i le taulaga ae faapea foi i nofoaga i tua ma Savaii i mataaga. O le taua la ia au o lea foi atinae, ona e tuusao lava le tupe i aao o le tagata lea e ana oloa e faatau, po o ni niu po o fua o faaeleeleaga po o mea taulima foi e faatau i tafatafa ala po o fea lava le tafa o le atunuu, e tuusao lava e le turisi le tupe i le aao o le tagata e ana le oloa. E pei o le tulaga lea o lea ou te lagolagoina ai le toe uunaia malosi o le atinae lea, ona e taua tele mo i tatou. Aua e taua foi faatoaga, e lelei foi faatoaga e tausi ai foi le aiga, o se isi vaega e faaaoga e le aiga, a o se isi vaega e faatau atu, e maua ai foi se tupe, aua o le soifuaga lenei ua tatou i ai, e i ai lava le taimi e manaomia ai le seleni. E manaomia le seleni e totogi ai le eletise, e manaomia foi le seleni aua mea fai a le nuu, po o mea fai a le ekalesia. O lona uiga e i ai lava le taimi e manaomia ai le seleni, e faatau ai se isi vaega o faatoaga. O le mea lea e faafetaia ai foi polokalame a lo tatou Malo i le atinaeina o faatoaga i afioaga i tua ma aiga taitasi. O le tulaga lea e pei ona ou lagolagoina ai foi le finagalo o se isi sui usufono sa saunoa, ina ia toe faaleleia ma toe ave se fesoasoani i faletalimalo, aua ua 2 tausaga o taofia feoaiga leai se tupe maua a faletalimalo, le mafai ona totogi a latou nonogatupe. O se tulaga pagatia sa oo i ai latou. Faafetai, e talu mai le toe tatalaina o le feoaiga ia Aokuso, e oo mai i le masina ua tuanai atu, o se vaaiga fiafia lea i le toe faatupulaia ma le toatele foi o i latou e asiasi maimoa mai i lo tatou atunuu, aemaise o tatou aiga malaga mai i faalavelave aemaise foi o nisi fuafuaga. Ua tele ai foi le tupe e maua, aua sa matauina ua leai ni avanoa i faletalimalo, a ua tutumu faletalimalo, ua leai ni taavale rentals, ua tele ina faaaoga uma e tagata tafafao maimoa mai. Ma ua le maua foi nisi oloa manaomia i totonu o le atunuu, ona ua taulia tele ma toatele i latou e malaga mai. Atonu e tasi lea vaega e tatau ona tau fuafua i ai tatou aufaipisinisi, e fuafua mamao i le tulaga lea i le mea lea sa tulai mai nei, i le mea lea na tutupu i aso fiafia, lea sa tatau ona fuafua mamao mai, aua le taliina o manao o latou sa faimalaga mai i Samoa nei. Sa i ai le fesoasoani foi lea sa pasia i le Tala Faatatau Autu o le tupe lea ou te tau manatua, le 5 miliona e ave e fesoasoani i faletalimalo, ae pei e faaauala atu i le Faletupe o Atinae. Ae pei o le faafitauli lea e maua, o le tele o nai faletalimalo laiti, e 2 tausaga e le i totogiina a latou nonogatupe, ua le agavaa i lea fesoasoani. Se i silasila ane lau afioga i le Minisita pe i ai se isi auala e fetuunai ai, ina ia agavaa nai faletalimalo ia i fesoasoani faapea. Aua o lea e maua, e faagaioi lava i tulaga o nonogatupe

masani. O lea foi e silafia e 2 tausaga e lei i ai ni tatou malo po o ni tagata asiasi maimoa mai i Samoa, sa faaletonu ai foi la nai faletalimalo.

O vaega na sei silasila ane, o le taua foi o le faaleleia o faletalimalo e pei ona taua, ona o lea e loma le tatou taligamalo i le isi fonotaga. Sa saunoa foi nisi o sui usufono e i ai le fonotaga tele lea o le Commonwealth Heads of Government Meeting po o le CHOGM, ia o Faauluuluga uma ia, o Palemia ma taitai uma o Malo o Taupulega, afai e malaga uma mai, ou te masalo e le itiiti ifo i le 2 afe ia tagata usufono.

O lona uiga o se tupe tele lea e maua e tatou, ae sei silasila ane i le vaega lea mo nai faletalimalo, e tapenapena ai foi. Sa saunoa foi se tasi o sui usufono ma ou te lagolagoina le finagalo, o lea sa fesiligia po o le a se tapenaga mo lena foi fonotele. Aua a tatou tepa foi i tua i le isi taligamalo a tatou i le fonotele o le SIDs lea sa fai mai i Samoa, e lei faigofie, e tele foi tapenaga sa fai, e tele foi tupe sa alu ai. Ae pei o lea e matau atu, e le o i ai lava se seleni foi lele faaagaga mo le tapenaga o nisi vaega o le tatou polokalame lea. Atonu o se taimi ona saunoa faamalamalama lea po o le a se tala lata mai, mo tapenaga ma sauniuniga o le tatou atunuu i le taligamalo lena, leaga e taua tele foi lena taligamalo mo tatou, aemaise lava foi isi tulaga e manaomia faapena, e i ai le security, tulaga o le puipuiga o malo faaaloologia, tulaga o faletalimalo e pei ona ou taua, tulaga o le soifua maloloina ina ia lava tapena i tatou aua le puipuiga i ni faamai ona e toatele tagata mai itu eseese o le lalolagi e malaga mai Samoa nei. O se fesoasoani tele i le uunaia o tatou atinae lea o tagata tafafao maimoa mai Samoa o le lava ai lea o malaga a le vaalele, e pei ona ou taua. Ia faafetai foi i le kamupani vaalele a Fiti, Fiji Airways, na tatala loa feoaiga i le masina o Aokuso, amata loa le tautua a le kamupani vaalele lea ma sau ai lava. E tele foi latou pasese pau sa fai, ma sa matauina foi e le natia, toatele tagata o le tatou atunuu ma tagata asiasi mai, sa ui mai Fiti, faaoga le kamupani vaalele lea, omai mai Niu Sila ma Ausetalia ma Amerika, e tele le fesoasoani. E faafetai foi i le tamalii o le atunuu lea e tu foi i Matagiolo ma pule i le kamupani a le Fiji Airways i Sydney i Ausetalia ma le faaitulagi lea o le Pasefika le afioga ia Toleafoa i le vave foi o lana vaai ma le silasila ma le vaai mamao e vave ai foi tapenaga a le latou kamupani vaalele, o se fesoasoani tele lea mo i tatou. Faafetai i le Minisita o Vaalele Savili, o lea ua faailoa mai o le a toe faaauau le tautua a le Virgin Airlines i le va o Ausetalia ma Samoa, e faaopoopo i le Qantas. Ia o lea foi e silafia, e fealuai foi... e mafai foi ona faaoga le Fiji Airways e malaga atu ai i inei, o lona uiga o le a tele le faatauvaga i lea va, e tau taofiofi ai i lalo le taugata o pasese, o le tulaga lea. A o le vaega lea i le va o tatou ma Niu Sila, faafetai i le Air New Zealand. I le masina na tea nei, na faaopoopoo ai latou faigamalaga pei lava e tai lua i le aso, pei e oo mai lava i le aso o lo o faaauau, ua maua ai se fesoasoani ua maua ai avanoa. Aepeitai pei o lo o matauina, o lo o taugata lava le pasese i le va lea. O lo o malamalama foi i le tulaga o lo o i ai, aua na o le tasi lava le valele lea e fealuai i le va lea, e le o i ai se faatauvaga i se isi vaalele o i ai. Ae faafetai o lea e taoto le saunoaga a le Malo se i ai se aso, tapena mai se tatou vaalele. O se tulaga lelei lea,

ae mo le taimi nei, o le fautuaga i lau afioga i le Minisita o Vaalele Savili, afai e le mafai ona faamatu se laisene tumau, e a pe a silasila i se laisene le tumau, temporary licence mo le Fiji Airways i le va lea o Samoa ma Niu Sila agai mai i Fiti, agai i Niu Sila foi mai lea, e pei o le latou malaga lea e malaga i Hawaii, foi mai foi lea foi i Fiti. Ina ia i ai se isi vaa e fai se faatauava ma le kamupani a le Air New Zealand, se i tau taofiofi ai pasese i lalo. Ina ia maua pea se tulaga i se pasese taugofie e fesoasoani mo tatou tagata, faapea tagata e tafafao maimoa mai mo Samoa.

**SUI FOFOGA FETALAI:** Mo le faasaoina o le saunoaga a lau afioga i le Sui Taitai o le Itu Agai, tulai mai lau afioga i le Minisita.

**Tofa Hon Olo Fiti Afoa Vaai:** E faafetai tele atu lava i le saunoaga a le Afioga i le Taitai o le Itu Agai, i le tulaga foi o lona finagalo ma ua aumai manino foi lona finagalo e faafetaia le tulaga o le toatele o tatou turisi o lo o ua i ai. Ona o le tele mai o tatou vaalele, ae moni le saunoaga e lea o se taimi saunoa atu le Minisita o lo o acting i le taimi lenei i le Kamupani vaalele, ae o lea ua e fesiligia le tulaga lea mo se temporary license mo le Fiji Airways. Lau afioga e le i taunuu mai ia te au se talosaga, e pei foi o le talosaga masani lea e agai mai i le Virgin ma le Quantas, ae le i taunuu mai se talosaga a le Fiji Airways agai i Niu Sila. E pei o le tulaga lena, ae na o le latou talosaga lea na aumai e fia faaoga le alavaa foi lea i Honolulu, pau lava lena o le talosaga na oo mai ia te au ma o lena foi ua taliaina, lea foi sa tatou faaogaina i le vaitaimi nei o aso fiafia, ma le faaaloalo.

**SUI FOFOGA FETALAI:** Faaauau mai le saunoaga a lau afioga i le Sui Taitai o le Itu Agai. O lea ua fofoga maua o se tasi lea o vaega o le tali a le Malo, ia o lea ua faafofoga i le tali a le Minisita, o le tatou onosai lava ma faatalitali. O lea e ao ona uia faiga faavae i se laisene le tumau mo le faaogaina o le tatou alavaa lea mai Fiti agai i Niu Sila. Ae tulai mai lau afioga i le Sui Taitai e faaauau le saunoaga.

**Tofa Hon LAUOFO FONOTOE NUAFESILI PIERRE LAUOFO:** Ia faafetai i lau afioga i le Fofoga Fetalai, faafetai mo le avanoa. E pei o se manatu e faatu atu, afai e le o le Fiji Airways, ae o se isi foi kamupani vaalele. Aua o mea faapea, e tatau lava ona tatou proactive tatou te o e sue mai ia kamupani vaalele ia, po o a lava mea e taumafai ai le atinaeina o le tatou atunuu, e pei e faapena se lagona. Ae o le vaega lea e pei ona ou taua, o se tatou vaa foi lea na aumai, na tala le isi pailate, o le ave vaalele o se alo foi o le atunuu o lo o lele i le Fiji Airways, e manaia lava si vaa o la e feleleai nei i Ausetalia i le lisi a le kamupani vaalele la e i Ausetalia o le Links Airways. Ma o la o lo o tautua ai le vaa lena i Ausetalia, ae o se vaa lelei foi, ae sei toe silasila pe i ai se isi vaa e toe aumai mo tatou. O le tulaga lea sa saunoa ai foi nisi o sui, sa nofo lava ma vaavaai i le tulaga o faamai, o le faamai lea aua e pei e matau atu, o lea e i ai le variant fou lea e pei ona taua mai o

lea ua aafia ai Niu Sila ma Ausetalia, ma Fiti ea foi na ua aafia i le kraken ea le variant fou lea e ese mai le omicron ma le delta o ituaiga uma ia o le Koviti. Ua maua le lipoti lau afioga i le Minisita o le Soifua Maloloina pei lava o lea ua toe tapa e Fiti le pepa tui mo le tagata e ulufale i Fiti. E le o le agaga la e toe taofi le feoi o tagata ma tatou boaders, ae o le tulaga foi lea o le faamautinoaina ua i ai tui o tagata o le a asiasi mai i Samoa po o le ulufale mai i lo tatou atunuu. Sei silasila ma mataitu ia tulaga o la foi e i ai i la atunuu pe i ai se aoga mo i tatou.

O le tui, e le tuua le tui e pei o le finagalo foi o fomai, e tataua lava ona faaaauu polokalame lelei ia. Ou te le iloa pe o le a le tulaga ua i ai le booster lona lua lea sa taua, e fa ai tui, pe tataua ona toe uunaia a tatou polokalame ia. E pei lava e i ai isi atunuu o le lalolagi, ua maua mai lipoti ua alu le tui lona 5 pe 6 ea. Ae lafo atu i lau afioga sei silasila ane pe i ai se tulaga faapena e toe faaaauu ai o tatou tui, ina ia malu puipuia pea le atunuu mai nei faamai faigata, faamai oti o le Koviti, aemaise lava i nai tama ma tina matutua.

O le tatou polokalame lea o le atinaeina o afioaga, e tasi miliona tala. E pei o lea e aumai, o le folafolaga sa aumai i le amataga e miliona i le tausaga. O le tausaga muamua faaletupe e \$200,000, o le tausaga lona lua lenei faaletupe lea sa paia ia Iuni i le tausaga na tea nei, e tasi le miliona mo lea foi polokalame. E i ai foi itumalo, ia ua faamatuu i ai le tai \$500,000, e i ai isi itumalo e le i oo i ai le faamatuuina o seleni ia. O se polokalame pei ua faafagogo tagiao foi tulou le Maota, i le tele o tala ma faamatalaga e fai i lenei polokalame e miliona. O le autu o le polokalame ia ma le faamoemoe e aoga, tele le aoga o le polokalame. Ae pei o tulaga ia o le tuai ona faamatuu i tua o tupe ia ia faagaoioi ai, lea e pei e mafua ai ia tala a le toatele o tagata fai mai ua leai se tupe. O le tulaga la se i silasila lelei i vaega ia, e manaia lava pe a faamatuu mai loa seleni i tua. Aua foi la o lea ua i totonu uma o Matagaluega ia development plans. O development plans e 12 masina, e toe lima masina lea e totoe o lenei foi tausaga faaletupe. O lona uiga a faamatuu mai le miliona lenei i lenei masina po o le masina fou, o lona uiga na o le 4 masina e faaoga ai le miliona lea, aua e toe pasia foi ia Iuni le isi miliona. Ua laititi tele le taimi e faaoga ai, ae se i silasila i le roll out ina mai o seleni nei, e aoga, o lenei foi itumalo ua leva ona fia galulue, ua leva ona fia atinae. E pei foi ona silasila i le asiasiga na alu atu i le Aso Faraile i le matou itumalo, ua uma, ua matagofie lo matou ofisa ma tulaga uma, o le aufaigaluega, ua faatotoga uma le tulaga o le ofisa ua matua 100% mea uma, a o le tatou seleni la lea, e taua le faamatuu mai loa o le seleni i le taimi lenei, atonu...o ai a toe pisa i se miliona pe a faamatuu mai loa, e leai lava ma se isi e toe talanoa i ni miliona. Ae faamatuu mai loa a tatou tupe ae se i galulue ia itumalo o le a faamanuiaina i le faasologa mai muamua o le tatou seleni lea. Aua o lea foi e tele foi tala a tagata aua o lea e sau le faasalalaua a le PSC, e taofi le totogiina o ovataimi, taofi le totogiina o alauni, taofi foi le faasalalauina o isi avanoa faigaluega, o lea foi e tuai na aumai le tatou miliona, ia ua atili ai na fai mai o tagata ua leai se tupe a le Malo. Ae o se taimi ona saunoa faamalamalama lea o le Minisita o Tupe e

faamalamalama ia vaega, ina ia faanofu filemu ai foi, ma le tele o le mau faamatalaga i lea foi polokalame a lo tatou Malo. E 200,000, 130,000 lea sa faamoemoe...e pei o taiala ia sa aumai e faaoga mo le faatuina ma le fausiaina o le ofisa o le fono faavae, o se tulaga lelei tele lea vaega. O le matou foi itumalo, i le amataga mai. Aua o le isi lea fono faavae na muamua lava i le toa sefulu lea na muamua lesitala, le matou fono faavae, lesitala faaletulafono i lalo o taiala sa i ai i na vaiata, e filifili mai lava e nuu taitasi o latou lava sui, o le mea lene sa i ai. Sa lafo lava i le tofa ma le faautaga o afioaga, e filifili mai ai o latou sui tai lua aua e fitu nuu o le matou itumalo, e fai si tele o le matou itumalo, o le ala lea o le filifili mai lava e afioaga taitasi ia o latou sui, o sui lava na, na aumi lesitala ai loa faaletulafono ma le matou fono faavae e oo mai i le aso. O lo o sologa lelei mea uma, o development plan ua i totonu, o le lipoti a le okika i le faaogaina o le 200,000 ua i totonu o le Matagaluega, ua i ai uma mea uma, 100% tulaga uma, o mea uma lava sa manaomia mai, ua faapena ona faamalieina. Ae i ai le manatu faapea, sa saunoa foi se tasi o sui usufono, e manaia ae okika uma le faaogaina o le 200,000 ma tupe nei. E lelei foi le i ai o se fesoasoani mai le ofisa o le okika po o le sutesi sili a le Malo, e sue lelei le faaogaina o seleni nei, ma sei maimoa foi i ofisa ma galuega foi sa faatino ma faaogaina ai nei tupe.

Aua o tupe a lo tatou Malo, e taua lava la ona sue lelei ia tulaga nei, aua o lea e tele le mau tala lea e salalau solo. Fai mai o isi ua 300,000 ea ua alu i le faiga o le latou ofisa, ao lea na o le 130,000 lea e aumai i le taiala ma le luaselau afe le tupe na aumai. O isi fai mai e leai se ofisa o le itumalo, e pei e faasolo e talimalo afioaga taitasi, e faaoga maota la e i ai o le itumalo, ua le iloa po o fea o ave i ai le selau tolusefulu afe. Ia fai mai isi ua tanu le sami fau ai luga le fale o le ofisa o le itumalo, ua oo i le miliona....

**SUI FOFOGA FETALAI:** Ia malie lau afioga i le Sui Taitai o le Itu Agai, se i tuu atu le avanoa i le Minisita o Tupe.

**Susuga Hon Mulipola Anarosa Ale Molioo (Minisita o Tupe):** Faafetai mo le avanoa, e leai se agaga e faalavelave i le saunoaga matagofie a le Sui Taitai o lene foi itu. Ae i ai le taimi ou te faamanino auilili uma vaega e pei ona saunoa i ai le afioga i le Sui Taitai. Ae tau lava ina ou faailo, faafetai lava ua mafai ona faamatu muamua na o le 200,000. E faafefea ona tatou oo i le miliona ae le mafai e le tele o itumalo, ona mulimulitaia le tatou 200,000. O le 200,000, o i e test ai itumalo, e le faapea la o tuufaatalaloa a tatou faiga faavae. A lea ua avatu a tatou funding agreement ua maioio atu ai vaega uma e mulimulitai i ai ia itumalo. Ae pei o se agaga lene e avatu e taua ia aua o lea lava e faalogologo lava, aisea le mea ua le avatu ai le miliona. A o le tatou tapenaga lea sa avatu i le tatou paketi muamua e 200,000. O lea ua atagia mai e le o mafai ona usitaia uma e le tele o tatou itumalo, tulou lava itumalo ia o lo o mulimulitaia ia alafua ua uma ona faataatia atu i le tatou funding agreement po o le tatou faavaa e limataitaina ai le

faatinoina o lenei poloketi po o le atinae. Ae o le a ou tali malamalama ma maioio i vaega uma lea e saunoa i ai le sui. Ma lou faaaloalo.

**SUI FOFOGA FETALAI:** Pe ua faafofoga mai lau afioga i le Sui Taitai... Se i tulai mai lau afioga i le Minisita o Faatoaga.

**Susuga Hon Laauli Leuatea Polataivao Fosi:** E masalo o lenei ua saunoa atu le Taitaifono, o lo o tauaveina nei le komiti o le miliona, ou te i ai foi i totonu. O ananafi na alu le matou asiasiga e faasopolia uma Savaii atoa, ananafi. O le Aso Faraile, Aso Toonai na faasopolia uma ai Upolu atoa. O le mafaufauga o le mea tonu lava lea ua saunoa i ai le afioga i le Sui Taitai, leaga ua felefele upu ma tala o le mataupu lenei. O lea na ae ai le tofa i le Taitaifono, e sili ia ona o le komiti mo le uluai taimi e o e vaai uma. O upu ma tala nei ua matua felelei i luga o le ea, ua tele ai le fenumiai o le atunuu i le tatou poloketi. Sa tata logo atu lava Masefau, mai lava i le uluai aso na tatou talanoa ai le poloketi lenei, sa tatou fenumiai tele, aumai avatu le talitonu le faia, leai se mea. A o lea ua tatou oo mai nei e pei ona saunoa le sui o Anoamaa, ua pasi le tatou Palemene le tatou 11 miliona, fai le tatou tai 200,000. O lea foi la ua pasi le tatou miliona, o lea la e tau faataavale atu nei le mataupu.

E pau lava le mea na ou fia tulai atu ai, leaga ua alu atoa le aso ananafi o fai le faaleagaga o lou itumalo i luga o le facebook, o au le isi itumalo lea ua ave atoa i tua lau miliona, e 1.2 miliona. E leaga o lea e talanoa mai le sui mamalu, e atagia mai ai le tulaga e tataua ona faasao. Mo le faafofogaaga a le Palemene ma Samoa atoa, e na o le 200,000 lava le tupe na tuuina mai e le Malo i si ou itumalo. E leaga ua matuai tele le aafiaga ua fai faapitoa e le Malo mo au ma lou itumalo, ua aumai atoa ai le miliona i fafo. Le faafofogaaga foi a Samoa o faafofoga mai, ma le saunoaga a le Taitai o le Itu Agai, e leai se mea faapena na tupu. E 200,000 na avatu e le Malo, na asiasi atu le matou komiti, o tupe faaopoopo na matou mananao lava matou e faaleleia le matou ofisa, o le sao lenei o lou itumalo. Na aumai ai le 300,000, 500,000 le tau o le matou ofisa. Ae ua ou manate e tataua lava ona faasao mea ia, ua tataua ona faasao atu iinei, ua tataua ona faasao atu iinei lou privilege lou sui o le itumalo, e faasaosao ai upu sese ia e alu i fafo. E manatu lau afioga i le Fofoga Fetalai, ina ia manino ma malamalama e na o le tai 200,000 lava lea e naunau atu ai le komiti ma le Minisita ia Leota e faauma mai tatou audit report, e faauma mai i totonu tatou district plan, faauma mai i totonu a tatou budget. O isi itumalo e le fai atu sau tala, se i folia le lipoti a le Taitaifono, ona outou silasila lea i le toatele o itumalo faatamala. O le agaga atoa lea e tau avatu, le tatou Maota, e leai se isi e tua i ai le mea lenei mo le atunuu, o le manuia o le atunuu o lo o taoto i outou aao. Ae pei o le agaga lenei ua ou manatu ai, e tataua ona faasao le mataupu lea, ma le agaga tele faapea ua soli faavae lou itumalo. Ma le agaga faaaloalo.

**SUI FOFOGA FETALAI:** Se i onosai mai lava lau afioga i le Sui Taitai o le Itu Agai se i avatu se fesoasoani a le Nofoa i le tulaga lea. O

lea ua tali fuaitau le Minisita o Tupe, o lea foi ua fesoasoani atu le Minisita o Faatoaga, Vaomatua ma Faiga Faiva i le tulaga lea. E pei o le faamalamalamaga lea e aumai e le Minisita o Tupe, le tuuina atu o le 200,000 i le faatinoina o le gaoioiaiga o fale ma faatotoga ai. Afai la e le faamalieina faiga faavae, a tatou tagi la i le isi vaega selau 50,000 ma le isi vaega pe a faapea e le tino mai faiga faavae. E le aofia matagi i liu o vaa, i le tele o itumalo o lo o sosolo pea i faiga faavae o le Malo, a o isi itumalo e pei o le tulaga lena o lea e taotao mai le Minisita o Tupe faapea le Minisita o Faatoaga, ae malie ia lau afioga i le Sui Taitai, se alo ese ia mo le faasoina o le tatou taimi, o lea e tuli le tatou galuega.

**Tofa Hon LAUOFO FONOTOE NUA FESILI PIERRE LAUOFO:**

E faafetai i lau afioga i le Fofoga Fetalai, e leai o lea ua...faafetai i le saunoaga a le Minisita o Tupe ma le Minisita o Faatoaga. O lea ua maua tonu mai lava e le Minisita o Tupe le mafuaaga e ala ai ona ou talanoa i le mataupu leni. O le taua foi lea, e pei ona ou fai atu, o le okika i le faaoga o le Suetusi Sili a le Malo ma e okika la tatou polokalame ia. O lea la ua aumai i o le tulaga o lea e i ai, o lo o faaletonu isi itumalo, ia pe le o usitaia foi taiala po o mulimulitaia taiala i le faaogaina o le \$200,000. O le agaga tonu lena o lea e avatu ai le manatu, ina ia aumai se lipoti faa-okika ina ia manino ai le Maota faapea foi le atunuu, ina ia transparent le tulaga o le faaogaina o le seleni, aua o tatou e accountable e le Malo ma le atunuu i le faaogaina o tupe nei.

Ae faafetai foi i lau Afioga i le Minisita o Faatoaga, e sao lava oe. O le mafuaaga foi lena o lea sa taumafai atu ai se manatu ina ia faasao mea ia maua le avanoa e faasao ai, tele le mau tala salalau solo, ia ua le iloa po o fea o i ai le sao o nei mau tala, tau ai fua lea o le Minisita o Faatoaga ia ma lona itumalo ma latou masini la e aumai, pe 2 ea masini ma le excavator tele la ua tu ai i le maota o le toeaina, ae tau ai fua ia mea. Ae le iloa o mea lava ia o la e aumai e...

**Susuga Hon Laauli Leuatea Polataivao Fosi:** Lau Afioga i le Fofoga Fetalai...

**SUI FOFOGA FETALAI:** Ia se i onosai mai lau Afioga i le Sui Taitai o le Itu Agai se i saunoa lau lau Afioga i le Minisita.

**Susuga Hon Laauli Leuatea Polataivao Fosi:** Sa ou saili saili ma ou tatalo i le Atua po o ai e ana ia mea, a o lea ua faaali mai. O ananafi, na kilia mai ai i tua masini e lua a lou itumalo, under the constituency name Gagaifomauga Nu.3 mo le grater ma le loli. O le vaiaso lea na tea nei na aumai ai le excavator. O fuafuaga a si ou itumalo i le kamupani foi lea ua leva ona lisi i ou eleele e 500 eka. O latou na e ona mea a ua faipaaga la ma lou itumalo lea la e mafua ai ona alu uma mea i lalo o lou itumalo. A o le mea ou te ofo ai lau Afioga i le Fofoga Fetalai, faatoa kilia ananafi mea i le ta o le 3, ae sau i luga o le facebook i le ta o le 5 i le afiafi. Se i silasila i ai? Sau uma lava invoices, sau uma ma



faamaumauga o lou itumalo, se talofa e. Ia, na ou valaau nei loa lea i le custom agency lea na faia le tulaga o le kiliaina o mea, ou fai atu, sue ia maua le mea lea, o le au lea o le paipa lea e tupu ai nei le vevesi, o le avatu o faamaumauga a lou itumalo ae tou nonofo ma ta kiliki ata ma lafo i o. O lea la e mafua ai ona aumai faamaumauga nei, ma lau uma mai le gasu i totonu. Ua aumai ma fai mai o tupe uma nei o le miliona lea ua aumai ai au masini. Malilie lena itu o le Maota, its been 15 years, I have been working hard i lau poloketi lea e maua ai le matou tai \$500,000 i le tausaga. O latou na e ona le mea lea. E leai ma se mea o toe faia. Ua uma ona ave lau talosaga i le afioga i le Sui Palemia, Deputy Minisita, I need help. Fai mai le Deputy Prime Minister, totogi uma au tiute. La ua pay. E leai lava se leo. A o lea e augani mo se faamama-avega, ae ua ou ofo tele la lau afioga, se o lea faatoa kilia i tua mea ae o la e ua appear mai o loli ma mea. E faapefea ona e iloa? Ia, lau Afioga i le Taitai, o lea faatoa ou faalogologo lea i lau lauga faa-Taitai o le Itu Agai. Ioe. First time, and that's what I need, e le o se itu Opposition. O lea ua e lauga faa-Itu Agai, e te agai mai ma lau mai mea. Na pau la ia au, ia silasila pea i le lotoifale o le itumalo, ae aua, tulou lava, ae aua le tilotilo fua i mea a lenei itumalo ia ma tatou... leai ua mamafa tele le upu a Olo. Taatia mai pea ia atinae a lenei itumalo, e leai lava se mea e tasi o aafia ai le faigamalo, o lea matou te tagiilima lava i a matou atinae. Ia ma le agaga faaaloalo.

**SUI FOFOGA FETALAI:** Se i fesoasoani atu lava le Nofoa leaga o lea e matau atu o le a tauau ina toso le tatou galuega. E manatu ua tataua ona see ese lau Afioga i le Sui Taitai o le Itu Agai mai lea vaega. A manino lava le faamaumauga o le \$200,000, e leai lava se mea tatou te fesiligia ai fua se isi vaega. O lea ua matau atu i le Afioga i le Minisita, e ese foi le source na sau e faatau ai masini ia, o le tapenapenaga a lona itumalo. Ae malie ia lau Afioga i le Sui Taitai, tatou see ese o lea e tuli i luma le tatou galuega, ae faaauau mai le saunoaga.

**Tofa Hon LAUOFO FONOTOE NUA FESILI PIERRE LAUOFO:** Faafetai i lau Afioga i le Fofoga Fetalai mo le avanoa. Ia, se i silasila la i le lelei tele o le... o le taua lea o le avatu, o lea e maua le avanoa e faamalamalama ai, leaga o mea ia o lea e salalau solo pei ona saunoa le Minisita i luga o facebook ma isi mau mea. Ia o lea la ua maua le avanoa. Ia silasila la o lea ua faafofoga maua le Maota? Malo faafetai Laauli, faafetai foi i lou faamaoni, totogi uma lava na tiute e \$200,000 ma mea uma. Ia se i silasila i le matagofie? O le mea lea, sui usufono mamalu o le Maota, faataitai uma ia Laauli pe a aumai ni a tatou masini. O le vaega o le...

**Tofa Hon Olo Fiti Afoa Vaai:** Lau Afioga i le Fofoga Fetalai, na o sina mea lea...

**SUI FOFOGA FETALAI:** Ia malie lava lau Afioga i le Sui Taitai se i tulai mai le Minisita.

**Tofa Hon Olo Fiti Afoa Vaai:** Na o sina mea lava lea e fia faamalamalama. Leai faafetai tele lava. O lea e manino nei, leai e le o le facebook lea e salalau ai, o lea e salalau lava i ina. A ua alu le fia tausaga e te le o talanoa mai lava i masini a Peseta.

**SUI FOFOGA FETALAI:** Ia se i tulai mai lau Afioga i le Sui Taitai. Ua toe 5 ou minute lau Afioga.

**Tofa Hon LAUOFO FONOTOE NUAFESILI PIERRE LAUOFO:** O le faalavelave o lea e toso ai le tatou mataupu o le faauilavea mai foi o lou uso. Ia taatia ia masini a Peseta ua leva ona aumai, ae faaaoga la i ai le forensic audit foi lea a tatou la e ua fai a? Faaaoga aua o lea na ou fesili i le Minisita o Tupe po o a atinae e faaaoga ai le forensic audit ae saunoa mai o le malae vaalele i Tiavea. Ia vaai la i ai i le manaia e faaaoga ifo uma la i tatou poloketi nei ma nei mau mea a? Ia ma le mea foi lea o le carbon credit ea po o le a le isi mea lea foi na saunoa ai le isi sui usufono. Ia aumai uma se lipoti a le forensic audit o na mea se i tatou silasila ma maimoa i ai po o a ni ata manaia o omai ai.

Ia, lau Afioga i le Minisita o Tupe Maua lau Afioga i le Sui Palemia, e pei o le tulaga lea e tau agai atu, ona o lea foi sa saunoa nisi sui usufono i le mea lea o le pisinisi laisene.

**SUI FOFOGA FETALAI:** Toe 5 minute o le sui usufono o lo o saunoa.

**Tofa Hon LAUOFO FONOTOE NUAFESILI PIERRE LAUOFO:** Faafetai i lau Afioga. O mea o laisene foi nei pisinisi. O le Aso Lulu o le vaiaso na tea nei, lea sa aumai ai le faaaliga o lea ua tatala, lea ua toe issue laisene ae i ai la mea o pepa faatumu, mea o forms e faatumu atu. Ia se i toe silasila lau Afioga aua pei o le vaiaso na tea nei e oo mai lava i le aso, o lea lava o lo o nunu le toau i totonu o le business community i forms ma mea ia e aumai mo le faafouina o laisene pisinisi. Aua o le tulaga lava ia tau le kamupani, ia e manaomia mea o... o lea ua aumai nei e manaomia mea o pepa o fanua pe a faapea e i ai ni fanua o kamupani po o pisinisi. Ia a faapea foi o la e lisi, e manaomia kopi o feagaiga faa-lisi, ia faatasi ai ma mea o bank statements. O faiga fou nei faiga. Atonu o i ai se taua ma se aoga. A o faiga fou uma nei faiga. E oo foi la i le aufai shares o pisinisi, shareholder, e manatua foi la o le tele o shareholders o directors foi, ia lea foi e manaomia mea o... sa manaomia mea o personal bank statements, ae pei la o lea ua toe maua se fetuunaiga, a maua lava le pili foi lele o le vai po o le pili o le moli, ia ua lava lena. A o le tulaga foi lele i isi vaega ia o suafa o mea o shareholders, o mea o directors, o faatonu. E pei o vaega ia ona o lea ou te matau atu, e le faigofie isi mea ia i lau foi vaai i ai, ma le isi mea o le a faaopoopo ai galuega a le Matagaluega. E le gata ina faaopoopo galuega a le Matagaluega, ae silasila o lea foi e taofia le totogiina o ovaitaimi. A o le isi vaega, o mea uma ia pei ona tapa mai e avatu mo le

faafouina o laisene pisinisi, o mea ia o lea e avatu e le au suetusi ma le au tausitusi pe a fai income tax. O lona uiga o le tele lava foi o nei information, o lena ua i ina i le Matagaluega, o lena ua i ina i le Matagaluega, aua o galuega ia a tausitusi ma suetusi e fai. Ia, e talitonu foi e lelei foi le ave pea i ai o le faatuatuaga, aua e foliga mai o le a le talitonuina foi le au tausitusi ma le au suetusi i le latou foi galuega. A o lea e avatu uma i i pe a oo ina faila mea o income tax return i le faaiuga o le tausaga, a o lea foi ua toe manaomia mai i i pe a toe faafou le laisene pisinisi. Ia ua tele ai foi ma isi mau galuega. Aua manatua foi, o tupe uma lava nei mea, o le faatinoina o nei mea, e aafia uma lava mea o seleni. Ia se i silasila ane lau Afioga i tulaga ia pe toe i ai se fetuunaiga o ia vaega, aua o lena e maua uma lava i financials a kamupani lena e faila atu faatasi ma mea o income tax pe a oo ina faila atu. Ia, o lea foi la ua aumai ma le isi faiga fou...

**SUI FOFOGA FETALAI:** Faaiu mai le saunoaga a lau Afioga i le Sui Taitai.

**Tofa Hon LAUOFO FONOTOE NUA FESILI PIERRE LAUOFO:** Ia, ua faaiu atu lau Afioga. O si vaega mulimuli lava lea, o lea ua cancel uma arrangements foi ia e togitogi ai lafoga tuua i le lipoti ma le faaaliga ua maua mai. Ou te le iloa pe sao. A o le faaaliga lena ua maua mai, lona uiga afai o oe sa i ai se lua feagaiga ma le inland revenue togitogi ni au lafoga tuua pe \$200,000 pe \$300,000 ua cancel uma mea na, ae totogi atoa loa i le taimi lenei. Totogi atoa loa, ia saili le tupe totogi uma, e le i maua foi se tupe a le tatou Malo, ia pe tasi foi lea faiga ua fai mai ai le aufaipisinisi, o le mea ea ua leai se tupe a le Malo ua manao ai e avatu uma ia nei mea ae cancel feagaiga ua uma ona osia. Ia, se i saunoa faamalamalama le Malo ona outou faafofoga mai lea i se tali a le Malo i lena vaega.

Lau Afioga i le Fofoga Fetalai, ona faaiu atu ai lea o se manatu...

**Afioga Hon Tuala Tevaga Iosefo Ponifasio:** Lau Afioga i le Fofoga Fetalai, o se avanoa faamolemole...

**SUI FOFOGA FETALAI:** Ia, malie le finagalo o lau Afioga i le Sui Taitai se i tuu atu i le Afioga i le Sui Palemia.

**Afioga Hon Tuala Tevaga Iosefo Ponifasio:** Faafetai i le avanoa, faafetai foi i le saunoaga matagofie. Pau lava sina lave ona o lea foi ua toe afea le tulaga lea o laisene pisinisi lea foi ua taua le tulaga lea e ao ona avatu ai se faasaoga, mo le nofo silafia foi ma le malamalama o le paia o le Maota.

O le tulaga o laisene tau pisinisi, o le faafouina o laisene, e pei ona ou fai atu, o lo o alu i lalo o le Tulafono. O se taimi ona avatu lea o se auiliiliga, ae o lea ua taua mea ia o Tulafono o aitalafu tuua lea sa i ai arrangements po o tuutuuga foi ia ma aiaiga ia togitogi, e i ai foi le mafuaaga o le mea lea. O le mafuaaga o le mea lea, o le le faamaoni o

le aufaipisinisi, o lo o maua uma lava records. E sao lelei lava le saunoaga a le Sui Tiatai o le Itu Agai, o lo o maua uma lava faamaumauga. O isi pisinisi ua tai 10 tausaga, ae e le o faia e latou ma mulimulitaia le feagaiga sa fai. O le mafuaaga lena, ae na ona omai lava toe fai le isi aiaiga toe faafou. Oo i le isi tausaga toe omai toe fai le isi aiaiga, toe fai le isi feagaiga toe faafou, a o la e lava ua amata ona faulalai se i tulou, ua amata lava ona tele ifo le aitalafu. E pei o le tulaga lena, e le faapea o vaega uma, e leai se tulaga e faasa uma aitalafu nei. Na o ni nai vaega o lo o silasila totoa i ai le Matagaluega, o i ina e tatau ona faamaoni le faipisinisi i le totogiina o ana aitalafu. Aua o le isi mea, a le totogiina, o lo o i ai le aitalafu tele lava a le business community i le tatou Malo. E pei ona ou taua foi i le taimi muamua, e \$80 miliona o lo o i ai aitalafu a le aufaipisinisi ua le mafai ona aoina. O se galuega tele foi la le toe agai o le tatou Matagaluega, ma e alu ai foi tupe, e tele le tau o le taumafai e toe ao mai aitalafu ia. Aua i ai le lagona o le Matagaluega, se i taumafai se faiga foi lele ina ia aveese ai le mea lea na o le sau lava faatalatalanoa toe maua le laisene fou, ona toe tuu foi lea e le toe ano i ai i le feagaiga na fai. E pei o le tulaga lea e taua ai le mea lea ua taua e le Afioga i le Sui Taitai o le Itu Agai, ona e ao i pisinisi ona faamaoni i le totogiina o latou laisene. O le mea lea e i ai nei, o le tele o pisinisi nei, o le tele o latou tupe maua e maua mai le Malo. E o atu bid galuega a le Malo ona aumai lea i ai e le Malo o le procurement, o galuega ma mea faapena. Ae a oo i le taimi e tagi atu ai le Malo e totogi mai lau aitalafu pe totogi mai lau lafoga, e le faamaoni.

O lea foi la ua silasila le Malo i se isi tulaga, a faapea o oe e maua mai lau tupe maua mai le Malo e ola ai lau pisinisi, e ao ona e faamaoni. A faapea e te le faamaoni i le tulaga lea, e le toe maua mai, e faasa e le Malo ona e toe bid i se galuega po o se tulaga faapena. O mea ia, ia fair le auunaga a le Malo, faaola le pisinisi, a ia fair foi le aufaipisinisi, fesoasoani mai e faaola le tatou Malo o lo o faalagolago i ai le falemai, o aoaoga a le fanau, o mea uma lava ia e tou te saunoa mai e faaleleia. E le mafai ona oo le tupe pe maua le tupe lea pe a le taumafai tatou e totogi lafoga e fesoasoani mai i galuega a le Malo ia ao lafoga.

Ia ma le faaloalo lava lau Afioga i le Fofoga Fetalai.

**SUI FOFOGA FETALAI:** Faafetai. Ia po ua faafofoga mai lau Afioga i le Sui Taitai o le Itu Agai, o lea ua fola malamalama, e i ai foi se taimi ona tuu atu lea e tali le Malo, ia ona maua lea o le atoaga ma le 100% ae faaiu maia le saunoaga a lau Afioga, ua maea lou taimi.

**Tofa Hon LAUOFO FONOTOE NUAFESILI PIERRE LAUOFO:** Faafetai. Faafetai i lau Afioga fafetai foi i le tali mai a le Afioga i le Sui Palemia. Pau lava lea ae ou te le i nofo i lalo, lau Afioga i le Minisita o Aoga, se po o le a se faamaninoga o pili o le tatou NUS?

O le resitala lea ua i ai o lea ua pau i lalo. Faafetai foi i le faamamaavega i le resitala, ua pau mai le \$300+ i le \$120+ ea pe \$130+. Ia, a o le pili foi lele o le aoga, o lea ua sii mai le \$1,900 i le \$2,200. Ia

o lea la e maua ai si faamama-avega i i, ae o lea ua toe faamamafa mai i i le isi itu.

Ia atonu i se taimi, ona ua uma lou taimi, se taimi saunoa faamalamalama lau Afioga i lea tulaga po o le a se faiga faavae e fesoasoani ai foi la i le tulaga lea o le pili lea ua \$2,200, pe maua sina fesoasoani foi lele i ai i le tau maua ai o se faamama-avega ia po o ni taimi foi lea e togitogi i ai po o le a se faiga e fai ai.

Lau Afioga i le Fofoga Fetalai, faafetai. Amuli se faafetai i le Malo i le Afioga i le Sui Palemia foi ma le Kapeneta, o lea ua matauina o la e ua toe faaauau le leoleo foi lea e galulue pe feoai faatasi ma le Taitai o lenei foi Vaega Faaupufai po o le Taitai foi o le Itu Agai. Malo faafetai foi i le tofa ae o lea ua toe faaauau si leoleo lea. Ia o se tulaga lelei foi lea aua foi le puipuiga o le Taitai o si a matou foi Vaega Faaupufai. Malo faafetai, e faapena lava le tulaga o le tatou va nonofo ai, e manaomia le fesoasoani i le tulaga faapena, ia e faatino lava.

Lau Afioga i le Fofoga Fetalai, agalelei le Atua. Faafetai o lea ua maua atu ua e tulai mai foi aua le faafoefoeina o le tatou Fonousu i luga i le nofoalii. Faamalo faafetai. Faamanuia le Atua i lou tulai mai ma le faatinoina o le galuega. E faapea foi le la Itu o le Malu, le Afioga i le Sui Palemia ma le latou foi Itu i le auvaa o le Kapeneta, Minisita Lagolago. Ia liua foi le vai o le tamaitai i lea Vaega ma lea foi Itu o le Maota, ia faapena ona i ai le faamanuiaga a le Alii.

Ia, Ale, Mauu, Tuuu, God bless you all. Manuia. Soifua.

**SUI FOFOGA FETALAI:** Ia, faamalo saunoa i lau Afioga i le Sui Taitai o le Itu Agai, o lea ua fofoga le paia o lenei Palemene. Ona ou manatu lea o lea ua atoa sui usufono o le Palemene i finagalo faaalua e uiga i le tatou Tala Faatatau Faaopoopo Nu.1 o le Tupe 2022/2023.

Ia, o le taimi lenei, o le a tuu atu le avanoa i lau Afioga i le Taitaifono o le Komiti e te saunoa ai i ni finagalo na lagalaga i le Maota e tusa ai o le Lipoti a le Komiti. Lau Afioga i le Taitaifono.

**Afioga FALEOMAVAEGA TITIMAEA TAFUA (Taitaifono o le Komiti o Tupe Maua ma Tupe Totogi):** Faafetai mo lo matou avanoa. Gase ia i malolo faigata o le aso, ae faaae ma tuta i nuu manaia ona matagofie. O lea foi ua maea ona e uia le ao sinasina o le ala i le lagi aua le meaalofa o le Agaga Paia e tofa i matua ai le Maota o le Palemene o Samoa. O outou paia, sa ma faigata, o ia lava o le tailoloto e ivi lililo, e le gafataulimaina. Taalolo ia. E ui ina tatou te le o faatasi ma le Taitai o le Malo le Afioga i le Tamaitai Palemia, e le o ni taugā, o tuagia tatau. Ioe, se Atua ina a talimanao, o lea ua agimalie ai.

O se avanoa foi e ofo alofa ma faafeiloa atu i lau Afioga i le Fofoga Fetalai. E faatalofa atu i lau Afioga i le Sui Taitai o le Malo, le Aiga Minisita o le Kapeneta faapea Minisita Lagolago.

Liliu ane i lea Itu o le Maota, e faatalofa atu i lau Afioga i le Sui Taitai o le Itu Agai ma sui usufono uma o le Palemene. Ia manuia tele le amataga o lenei tausaga.

Lau Afioga i le Fofoga Fetalai, faafetai mo lo matou avanoa, ou te tulai atu ai ma le ava tele e fai ai au ma sui o le Komiti i lou tulaga faa-Taitaifono o le Komiti o Tupe Maua ma Tupe Totogi ou te faafeiloai ma faatalofa atu ai i lau Afioga i le Fofoga Fetalai.

Ou te faatulou foi i le tapuaiga a Le Ao Mamalu o le Malo ma le Masiofo, afio le Sui o le Fono a Sui Tofia ma lou faletua, lau Afioga i le Faamasino Sili ma lona faletua, lau Afioga i le Peresetene o le Faamasinoga o Fanua ma Suafa ma lou faletua. Le paia ma le mamalu o alii ma tamaitai Faamasino.

E le faagaloina foi o tatou uso i Sasae, i le paia o le tafatolu o le faigamalo a Tutuila ma Manua, o le paia lava lea i le Faleagafulu ma le Manuatele.

E le faagaloina foi le tapuaiga mamalu a Faaao o Ekalesia i so o se fatafaitaulaga i Samoa nei ma atunuu e mamao, tainane foi le aufaigaluega tofofi a le Atua o lo o faanonomanu ma tapuaia faiva aua se manuia mo Samoa ma ona tagata. Malo le folau, faafetai tatalo i lenei tausaga fou ua savalia. Foi le viiga i le Atua aua ana le seanoa, tatou te le maua lenei taeao matagofie. Ae a le maualuga o le tapuaiga a Samoa ma e o alaala ma afio i atunuu mamao, o lo o po le fala ma ula le mulila. O la outou tapuaiga ua aemalo ai faiva o lena foi tausaga ua mavae, malo tatalo faafetai tapuai.

Ou te fia avea foi lenei avanoa e faatalofa atu ai i si ou itumalo o faafogafoga tapuai mai, o Aleipata i le fale i lalo, malo tapuai faafetai tatalo. O se taimi ona oo atu lea o se faamatalaga i lo tatou itumalo, ae tapuai maia.

Lau Afioga i le Fofoga Fetalai, o lena ua folasia i le Laulau-a-Fono a le Fono Aoaofaitulafono le Lipoti a le Komiti o Tupe Maua ma Tupe Totogi e faatatau i le taunuuga o ana sailiiliga sa feagai ai i luga o le Tala Faatatau Faaopoopo Muamua o le Tupe mo le tausaga faaletupe o lo o faagasolo nei 2022/2023.

Lau Afioga i le Fofoga Fetalai, o lo o tulaile silasila a le Malo e ala i lenei Tala Faatatau Faaopoopo Muamua o le Tupe 2022/2023 i le faatumauina o le auaunaga ma le mafai ona tali atu i le siitia o le tau o le soifuaga ua i ai nei, aemaise o le toe faatulaiina mai o le tamaoaiga i le aafiaga sa feagai ma le atunuu ona o le Koviti-19. O le naunautaiga o le Malo ia faaauau ona tuuina atu le auaunaga faamama-avega i le atunuu, aemaise le faaleleia o atinae fuafuaga alualumamao i lenei tausaga faaletupe. Ua le o toe po se lilo, o lea ua maea le afa muamua o lenei tausaga faaletupe, ma ua tatou molimauina le faatinoina o galuega o lo o ave i ai le faamuamua a le Malo, aua le siitia o le soifuaga laulelei o tagatanuu ma le uunaia o le tamaoaiga.

Lau Afioga i le Fofoga Fetalai, i lenei Tala Faatatau Faaopoopo Muamua o le Tupe 2022/2023, e 8 Matagaluega na aofia ai. O nisi o Matagaluega na talosagaina ni vaegatupe alu faaopoopo faatatauina mo le faaauauina o galuega faatino i le 6 masina mulimuli o le tausaga faaletupe. O nisi na talosagaina ni fetuunaiga mai Tala Faatatau Autu o Tupe, mo le faatupeina o galuega faatino mo le 6 masina mulimuli o le tausaga faaletupe ma nisi o Matagaluega na faamaonia ni vaegatupe

maua faatatauina mai auaunaga masani e tuuina atu i le mamalu o le atunuu.

O le aotelega o lenei Tala Faatatau Muamua o Tupe, na maitauina e le Komiti, e \$8.2 miliona le vaegatupe maua ua fuafua e aoina mai mo le faaauauina o galuega faatino i le 6 masina mulimuli o le tausaga faaletupe 2022/2023. E \$6.2 miliona le vaegatupe faaalu fuafuaina e aofia ai ma atinae mo galuega faaauau a Matagaluega e 8 mo le 6 masina mulimuli o le tausaga faaletupe 2022/2023. E \$2 miliona le faasiliga o tupe maua nai lo tupe alu. E \$44 miliona tupe faameaalofa. E \$36 miliona mai le Malo o Ausetalia e fesoasoani i le faatupeina o le Tala o le Tupe, ae \$8 miliona le tupe faameaalofa mai le faletupe o Asia o lo o aofia i lenei Tala Faatatau Faaopoopo Muamua. E \$46 miliona le faasiliga ua faaitiitia ai le fesuiaiga o le tinoitupe o le Tala Faatatau Autu o le Tupe 2022/2023.

Ou te fiafia e faailoa atu, e tusa ai ma le iloiloga a le Komiti i luga o le Tala Faatatau Faaopoopo Muamua o Tupe, o lo o sologa lelei pea le faatinoina o galuega o faiga faavae uma tau tupe e pei ona fuafuaina i lenei tausaga faaletupe. Ma o lo o faamauina foi le tulaga lelei o tupe a le Malo e atagia mai ai le mataitu lelei e le Matagaluega o Tupe faatasi ai ma le paaga o vaega maoti o tupe ina ia lava tapena le Malo e tali atu i ni tulaga e ono lamatia ai le toe tauatiaeina o le tatou tamaoiga.

Ou te fia pai i nisi o vaega na fesiligia e nisi o o sui usufono mamalu, mo le tulaga o le tatou tupe faaagaaga faaleoleo po o le foreign reserve. O le taimi nei i le tapenaga a le tatou Malo, e 9 masina o lo o i ai i le taimi nei, o lo o lava ma totoe le tatou seleni faaagaaga i tulaga ia.

O le tulaga tau i aitalafu. Lau afioga i le Fofoga Fetalai, ou te matua fiafia tele e faailoa atu, o lo o mulimulitaia faiga faavae uma mo le totoigiina o tatou aitalafu i taimi faatulagaina ma o lo o faamauina i le itulau e 5 faa-Roma, o le Tala Faatatau Faaopoopo o Tupe a le Malo o lo o faamauina ai aitalafu totoigi i totonu o le atunuu ma atunuu i fafo.

Lau Afioga i le Fofoga Fetalai, e tusa o le mataupu o lo o laualuga i le Laulau-a-Fono i pasene o totoigi o tagata faigaluega a le Malo, e tusa o le 39.9% o tupe faaalu a le tatou Malo, e mo totoigi o tagata faigaluega, e aofia ai ma Faalapotopotoga uma a le Malo. Lau Afioga i le Fofoga Fetalai, i le taimi o faatalatalanoaga a le Komiti na faailoa mai ai e le Taitaifono o le Komiti o Tagata Faigaluega a le Malo, e le umi se taimi o lo o taofia ai le faasalalauina o avanoa faigaluega i Matagaluega a le Malo. O le vaai taulai a le Malo, ina ia sailiilia avanoa faigaluega o lo o faatatau i ai tupe ae le o faatumuina. O lo o tau tulimataia pea pe faamata o toe manaomia nei avanoa faigaluega ua ova ma le lua tausaga e le o faatumuina. Ma le tele o vaegatupe o lo o faatatauina i ai, ae uma ifo le tausaga faaletupe, e tele vaegatupe totoe e mai avanoa faigaluega e le i faatumuina. Ae o lo o faia le review ona o tulaga e aafia ai tagata faigaluega a le Malo. O le faasaoga e le o faia ni galuega foi lea e faia ona o ni tulaga faapea o le tatou Malo.

Lau Afioga i le Fofoga Fetalai, o le mataupu i sikolasipi a le fanau, e pei ona faamauina i sailiiliga a le Komiti, ua faailoa mai ai e le Matagaluega o lo o lelei lava ona mulimulitaia faiga faavae ma atunuu i

fafu aua faiga paaga mo avanoa faasikolasipi. O lo o latou galulue faatasi foi ma le Komisi o Tagata Faigaluega a le Malo aua le faatinoina o le auina atu o tamaiti o lo o faamauina avanoa ua faamanuaina i avanoa sikolasipi i atunuu i fafo, Ma e faailoa atu foi i le mamalu o lenei Maota, o le filifiliga o tamaiti e agavaa maka mo avanoa sikolasipi, e le o faia i ni tulaga faaalatua. O lo o lelei ma mulimulitaia e Matagaluega faatinoga ma le mataituina o nei itu taua uma.

E fia faaleo le agaga faafetai tele i sui usufono o lenei Komiti, le Afioga i le Sui Taitaifono ma sui usufono mamalu uma o le Komiti o Tupe Maua ma Tupe Totogi mo la outou galuega e lagolagosua ma le faatauaina o lo tatou valaauina.

E fia faaaogaina foi lenei avanoa lau Afioga i le Fofog Fetalai, e avea ai au e fai ma sui o le Komiti o Tupe Maua ma Tupe Totogi e faaleo ai le faafetai i le Afioga i le faipule ua tuua le Malo le Tofa ia Tapunuu Niko Lee Hang i le tofa tatala o lana faasoa ma le tele o fautuaga aoga na ia faasoa mai ai ia i matou a o matou galulue i le Komiti aemaise foi o lona tulai mai o le Sui Taitaifono seia oo lava i le taimi na valaau ai e lona Matai, e manatua pea e lenei Komiti galuega lelei a lenei tamalii.

E avea lenei avanoa e faaleo atu ai le faamaisega i le faletua ma le nofo a alo ae a le paia o aiga na lua.

Lau Afioga i le Fofoga Fetalai, ia se i ou liliu ane lava i nai vaega e fia manaomia e si o matou itumalo. Ou te lagona ua tele vaega ua maea ona tuuina atu talosaga se tasi o tuafafine o loo ma toalua ile Palemene nei i si o matou itumalo ,nao nai vaega e lei taua e pei o lea tuu atu le tatalo lau afioga ile Minisita o Punaoa Falenatura ma le Siosiomaga lau afioga Toeolesulusulu o si omatou itumalo Aleipata fale i lalo fai lava si tele o atinae tau turisi le agai atu a lea Tiavea-tai ma le faasolo atu mataaga foi ia e iai le Vai o le Tama lea Amaile faapena le togatogo i Lotopue nei vaega uma lau afioga e galulue faatasi e leo afio mai le afioga Minisita Galuega ae talosagaina le tatou auala le alu i lalo Tiavea o loo tele se vaega o tatou Turisi e manuia ai lo tatou atunuu i lalo ile agai lea i lalo i Tiavea-tai lau afioga ile Minisita o Faatoaga malo mo galaulega lelei faafetai o lea foi ua maua atu o lena ua iai masini a lau afioga e ona faigofie foi ona aumai i Upolu nei ai e taugofie sina tau e totogi ai e faatino ai foi tiute ma galulega a isi itumalo lau afioga o lenei lava itumalo Aleipata ua vaevaeina nisi o Nuu o le itumalo lenei e 9 Nuu ua vaevaeina nisi o afioaga latou lava matafaioi o le gataifale o nisi o afioaga latou matafaioi o mea tau faatoaga nisi o faatoaga o nisi afioaga o lo latou tuuina iai galuega foi ia o mea togalaau fualaaui aina taumafa mata lona uiga e mo le agai luma lau afioga ile tau o le soifuaga pea tele foi se fesoaosani faaitiitia i lea tulaga e pei ona aafia ai si o tatou atunuu ile taimi nei lau afioga ile Minisita o Falemai malo faafetai lea ua uma ona talosagaina e le sui o le matou Itumalo mai le fale i luga ia ile tulaga ole falemai na ona toe lagolago atu lava e faafetai ae faataunuaina ia tulaga e pei ona taua manatua foi lenei itula nai tatou minisita o loo faapena ona faataotolia i tulaga tau gasegase i Niu Sila le afioga ia Leatinuu Faumuina faapea foi le afioga ia Leota



Laki Lamositele o loo manatua pea i tatalo ma anapogi a lenei itumalo lua sii gasegase . E iai le upu e fai soo a e nai toeaia.

**FOFOGA FETALAI:** Se i vasai foi ma maua se malologa lau afioga ile taitai fono, ia sei tulai mai le sui o Siumu.

**Tofa Hon Tuuu Anasii Leota (Siumu):** Faafetai lau afioga mo le avanoa o se mea fia faamalamalama lau afioga leaga sa ou laga le mea lea, lea ua faaiuuta le fia faalavelave ile saunoaga a le sui mamalu ae o le mea i sikolasipi lea sa ou laga , sa ou taua ai a vaega ia sa ou fia manino ae leaga lea ua aumai le faamatalaga o loo sao mai le lipoti, lea foi sa saunoa le isi sui tuaia ai fanau a sui usufono o loo aave i tulaga ia e lagona ai le tulaga foi lele e tatau pea ona sailiili lau afioga le vaega lea o le fanau a le sui usufono , fanau a le minisita , fanau a se palemia e mamafa ia mea ia aumai lau afioga e iai tulaga foi sa ou taua le tulaga o maka o Fanau e manaia foi le vaega lea ae lavea mai lalo .....audits lea tausaili mai ia manino lelei.

**FOFOGA FETALAI:** Ia lea ua maua atu e le nofoa lou finagalo e manatu le nofoa e le aoga ona tatou apo le iumaea foi lele o tala e aumai e leai ni faamaoniga (hear say) ia ona fesoasoani atu lea o le nofoa nei tei ua tapa ni faamaoniga o ia tuuaiga ua tuuaia ai o outou afioga i faipule ua ave iai se faamuamua ile tulaga lea ae fesoasoani atu le nofoa masalo o le maua le atoaga pea tali le malo ae fesoasoani atu ile mataupu lea nei tei ua tatou lilifa tele e faaoga ia tala e maua mai tua e fai ai se finagalo o se sui usufono o le maota, tulai mai lau afioga ile taitai fono e faaauau le saunoaga.

**Afioga Peseta Vaifou Tevagaena:** Lau afioga le fofoga fetalai pe maua se avanoa.

**FOFOGA FETALAI:** ia lea se mea e fia saunoa ai le sui o Faasaleleaga Nu 05 se mea e fia faasao.

**Afioga Peseta Vaifou Tevagaena:** Lau afioga i le fofoga fetalai e momoli atu le faafetai tele ile saunoaga foi a le taitai fono sa manatu lava sei sao ma uli le saunoaga foi a le taitai fono ile faamalamalamaina o le tala o le tupe ae faafetai foi o lea ua maua se avanoa , pau a lea o se vaega sa tau manatu e faafesili atu ai i lau afioga ona o lea ua oo lau saunoaga ile tulaga foi lea foreign reserve silasila foi lau afioga e pei o i lea e mataitu ai ia tulaga o le tamaoaiga o si tatou atunuu e ala i tatou tupe ia ona o lea ua saunoa lau afioga ile tulaga lea o loo lava ma totoe , ae pei o lea faalogologo atu lava ma le totoa e fia manino foi lenei maota ile aofaiga o se tupe ? ma le foreign reserve o le ala lea o le faafesili atu , pe fia lava le aofai o le tatou foreign reserve o loo iai ile tatou tala ile tupe? Pau a lea o le faafesili lau afioga ile fofoga fetalai ma lo'u faaloalo lava.

**FOFOGA FETALAI:** Faafetai masalo o sina fesoasoani a le nofoa masalo o le maua le atoaga o lou finagalo Faasaleleaga Nu 5, pea sei tali le malo ae o lea faasolo mai pea le finagalo o le taitai fono o le Komiti ona lafo atu lea ile Malo , ae o le a maua le atoaga o lou finagalo Faasaleleaga Nu 5 pea tulai le Malo e tali fuaitau, faaaau mai le saunoga a lau afioga ile taitai fono.

**Afioga FALEOMAVAEGA TITIMAEA TAFUA:** Malo faafetai e sou agai muamua atu a i si ou uso lea o Tuuu ma le faafesili e leo faamalieina ile tulaga e pei ona ou taua, o pepa ia pei ona ou tautala atu ai na lavea i totonu o le faatalatalanoaga ma le vaega o loo Pulea Matagaluega nei , o lea e faamanino atu ai afai na tupu ni vaega ia ia masalo o lae e fai a matou feau i gauta ile atinae e lei lavevea e lei omai i totonu o le palemene i lenei nofoaiga , masalo o le nofoaiga i tua atu male agaga faaaloalo lau afioga, finagalo malie o lea faapea e te finagalo e faaaau a lau mataupu e le maua atu la iinei se tali ona o vaega nei o luma atu i le isi nofoaiga ma le agaga faaaloalo.

**FOFOGA FETALAI:** Se i tulai mai le sui o Siumu, sei maua foi sei vasai foi lau afioga ile taitai fono.

**Tofa Hon Tuuu Anasii Leota:** Faafetai atu ile afioga i le taitai fono , e manino sa ou taua le mea ua tuanai atu , e leo le nofoaiga nei aua te popole ile mea lena o oe lea faatoa e tulai mai aua te popole ao le mea i ona tua atu ma lou faaaloalo.

**FOFOGA FETALAI:** Ia taatia le tuanai ua tuanai alo i luma lo tatou sa ile tulaga lea, faaaau mai le saunoaga a lau afioga i le taitai fono .

**Afioga FALEOMAVAEGA TITIMAEA TAFUA:** Ia malo Peseta malo mole fesili lona uiga o lea sao a , ou te lei avatua i luma ao lea oute nofonofu ma a'u le fuainumera ou te le talitonu e te fesiligia lea tulaga o le mafuaaga ola sole se ole tele o galuega o le malo na e faatinoina ia e leo iai a se faaletonu ile tulaga lena o loo iai lava tupe , o le aofai o le seleni o le tatou atunuu faaleoleo o loo iai e \$785 miliona e mafai ona kava ai le 9 masina o loo lava ma totoe aua te popole lau afioga poo faamalieina?

**FOFOGA FETALAI:** Ia sei tulai mai le sui o Faasaleleaga Nu 05.

**Afioga Peseta Vaifou Tevagaena:** O le agaga faafetai a lea a lau afioga ile taitai fono ou te le faapea e tulai atu o se isi tulaga o le agaga fialia ia te au leaga o lea tatou te i luga talanoaina o le tala o le tupe aua pei ona ou faiatu o le foreign reserve lea tatou te faamoemoe uma ai a ia atinae o le atunuu ae pei o lea ua ou tau maua ae faafetai o lea ua e saunoa ile aofaiga o le tatou tupe , momoli la'u faafetai i lau afioga ile fofoga fetalai, faamalieina foi lou nei sui.

**FOFOGA FETALAI:** Ia ua malamalama llou fiamalamalama o lea ua \$789 ia lea ua.

**Afioga Peseta Vaifou Tevagaena:** Ia o lea a tuuaia le isi ou le malamalama ou te alu ma a'u.

**FOFOGA FETALAI:** Ia lea manatu, malie lau afioga ile taitai fono sei tulai mai lau afioga ile Minisita o Faatoaga ma Faigafaiva.

**Susuga Hon Laauli Leuatea Polataivao Fosi:** Faafetai lava o le tasi nei o mataupu sa ou manatu e fesili sao lau afioga ile taitai fono , leaga ua matua taavili faapenei le mea lenei o le upu lenei ua gau le malo e leo ni upu e avane iai le upu lea ua faamalamalama faatasi, faamalamalama faalua toetiti 10 faamalamalama sa ou tau tulai atu ao lea ua tulai atu lo'u uso ia Peseta. Peseta you understand now ia o lenei , o lea lava e lava le tatou foreign reserve toetiti a 800 miliona ae soia ia le fai o na upu lea fai soo , aua te faalogo fua ia Leaana tuu sao mai a e lelei ai taua popooga e te malamalama o le agaga lenei ae faafetai lau afioga e lalata ile 800 miliona le foreign reserve a .le tatou malo o faafofoga mai lo tatou atunuu Samoa , theres plenty money , money is not the problem you are the problem.

**FOFOGA FETALAI:** Ia malo saunoa lau afioga ile Minisita , ia sei tulai mai le taitai fono, o lea se mea se mea fia faasao poo se mea fia malamalama.

**Afioga Leaana Ronnie Posini:** E pei ona o lea ua taua lo'u igoa e le afioga ile Minisita o Faatoaga , o lea ou te musumusu ia Peseta vaai faalelei faamaumauga e faamaonia ai faamaumauga ia e saunoa iai ma le agaga faaaloalo.

**FOFOGA FETALAI:** Malo faafetai, Peseta pasi atu faamaumauga i o le sui o Safata , tulai mai lau afioga le taitai fono,

**Afioga Peseta Vaifou Tevagaena:** Lau afioga ile fofoga fetalai , leaga o lea ua saunoa le afioga ile Minsita o Faatoaga ile aofaiga o le tupe , o lea la musumusu mai si ou uso faipule ia te a'u poo masini ia a le Afioga Minisita o Faatoaga na loan mai ile tupe lea o le foreign reserve.

**FOFOGA FETALAI:** Malie le sui o Faasaleleaga o lea avatu le faasilasilaga o le nofoa afai o uiga lenei saunoaga faauigalua e toso ai le tatou galuega , ua avea foi le tuu atu o avanoa ma mea e see ai le tatou , malie lou finagalo leaga o lea na e fesili e fia malamalama ua e malamalama la e 789 le tupe ole reserve mo le 9 masina ae malie lou finagalo afai ua malamalama o lea foi ua malamalama laa toso ai la tatou galuega.

**Afioga Peseta Vaifou Tevagaena:** Lau afioga ia le afaina lea ua faamalieina o lea ua saunoa le afioga le taitai fono ua lava ia lea ma lo'u faaloalo lava faafetai.

**FOFOGA FETALAI :** tulai mai le sui o Samatau ma Falelatai.

**Afioga Lupematasila Galumalemana Tologata Togia Tile Leia (Falelatai ma Samatau):** O le mea fia faamalamalama i lo'u uso a sui usufono, leaga e leo faitaua lelei ia faamaumauga a le afioga ile sui usufono ae mo le silafia le tausaga lea na tea nei 12 masina le foreign reserve sa iai e ova ma le piliona.

**FOFOGA FETALAI:** Ou te fesoasoani ile sui o e faauilavea i le isi faauilavea, a faapea o lea e te faauilavea i le isi faauilavea e le talia leaga o lea saunoa le taitai fono , tulai mai le taitai fono faaauau le saunoaga.

**Afioga FALEOMAVAEGA TITIMAEA TAFUA:** Ia malo e ese le manaia o le tulai mai o faalavelave ae manino ma lelei ma sao , ioe sei tuu atu pea sina tala tusa o le saunoaga o le sui lea na saunoa mai i Falelatai ma Samatau , malo faafetai manaia au fuainumera na ona faamaninmo atu lau afioga i au fuainumera e pei ona taua e lei oo se tatou vaega tupe faapea i tulaga e pei ona e taua, e lelei a le manino o faamatalaga ua ou toe oo mai a lea ii ia Peseta aua e te faalogo ia Leaana , o fautuaga a Leaana ia nao lou tu ifo ai fua ma tele ai fua faamatalaga ia oe ae sei tau faauma atu ia nai manaoga nei tou afioga i Minisita ia agalelei le Atua i tou faiva ma tiute o nisi foi e le tau tolaulauina atu ae ole a taumafai e faaoo atu ia manaoga i tou afioga o le a tuitui a ofisa ole Minisita tatalo atu a toe tuli mai foi i fafo e tou failautusi e toe tuitui atu foi aua e le uma ai avanoa , na ua sei tau faauma atu ia faamatalaga mo le tulaga e pei ona taua i Minisita. E i ai le gagana foi lea sa matou faaogaina i nai toeaiina ua failagi ia folauga pei o le toeaina lea o Alan Grey ia ma le toeaina lea o Patea Satini e iai latou gagana foi lea a tele pe tuu atu ia outou afioga i Minisita ona faapea lea faataatia atu i ona talane ia manaoga ma vaega uma e pei ona talosaga ai atonu e iai a se taimi o le toe fesili a la poo autafa i fea e faataatia iai , tatalo ia agalelei le Atua i tou afioga i Minisita o lena ua faafofoga mai le paia ile tatou itumalo ile fale i lalo le afio lau afioga le Tuiatua na Faanofonofa afifio Alalaimalae afio le Alii o le Itu ma le Tane o le itu, pule na tatai i Lalovi ma Malaefono ma upu ia te oe Saleaumua e faaamalulu atu e apu o se mafai ua oo iai le vaivai o le tou auauna ia tatou talia manu ma folau pea e taunuu ai i lfanua meauma ae faafoi le viiga ile matai sili, fia momoli atu foi le faafetai tele i Matagaluega uma o le Malo sa auai ma tuuina mai le lagolago i le lauliliuina o lenei galuega taua e le faaitiitiita foi le faafetai tele i tou afioga i Faauluuluga o Matagaluega o le Malo faapea foi ia tatou Faalapotopotoga Tumaoti ma lo le galulue , faafetai tautua i tofiga ma valaauina e le faagaloina foi ia nai sui ia Matagaluega nei e 3 sa

faapena ona lagolagoina la matou Matagaluega matou galuega fai , Ofisa Sili o le Pulega o Tupe ia Vaitofaga Lee Hang , o PSC ia Tamara Filoi ma le Okika ia Valma Levasa malo faafetai le galulue faapea foi ia failautusi o le matou Komiti ia Fausaga Afaese , Lemalu Ruta ae faapea le afioga ia Erosi Korua faamanuia le Atua i tofiga , e le pau lava se eleeele e tupu ma ola le la outou faamaoni i tiute ma faiva ia faamanuia le Atua ile sui taitai o le malo ma le Kapeneta aea le afioga i Minsita lagolago sui taitai o le itu agai ma le mamalu o sui uma o le Palemene ae sili ona maua le malosi e lau afioga ile fofoga fetalai maua ni manatu o le failautusi ma le ofisa aua le tautuaina o le fono usu a Samoa ae matou ola ile alofa o le Atua soifua ma ia manuia.

**FOFOGA FETALAI:** E momoli atu le faafetai i lau afioga ile taitaifono ma le mamalu a sui usufono a le tou komiti manatu lea ua faasopolia uma sui mamalu o le tatou maota e ala i saunoaga faalauaitete ile tala faataua faaopopo o le tupe muamua 2022/2023 e le toe tau faailo le tele o mataupu na laga i saunoaga o le tatou maota na iai lea o le manatu o le avanoa lea mo le malo e tali fuaitau a i mataupu sa laga e sui mamalu o le lafo atu i lau afioga ile sui palemia le faasologa i tali o le malo , tulai mai lau afioga ile sui palemia.

**Afioga Hon TUALA TEVAGA IOSEFO PONIFASIO:** Ia e toe momoli atu le agaga o le fofoga fetalai i leni itula o le aso aemaise foi o lou tulai mai ile foe aua lava le faatautaiga o le fono mamalu o le palemene, e momoli atu foi le agaga o le faafetai i lau afioga ile taitai fono ile komiti o Tupe momoli atu le agaga faafetai i lau auvaa aemaise i latou uma o Ofisa ole Malo sa lagolagoina lau afioga aemaise foi ia afioga i Minisita Lagolago faapea foi Alii ma Tamaitai Faipule sa lagolagosua aua le lipoti matagofie ua manino lea ua fofoga le maota ile aso momoli atuj le agaga o le faafetai e le faigofie le tou galuega ae ou te iloa o lea ua iu ma le manuia , o lea ua taula le galuega fita i totonu o le maota leni.

E momoli atu foi le agaga faafetai i lena itu o le malu i saunoaga matagofie foi pei ona tuuina mai aemaise foi o lo outou lava papale o le onosai foi ile faatautaiga o le tatou mafutaaga faapalemene ua tele lava ia timaiga ma saunoaga matagofie e faufau ai foi ia manatu o le malo nei aua le tali atu ma le faamaninoga o nisi o le tele o mataupu , pea tusa ai lau afioga ile fofoga fetalai manatu faapea, o le a amata mai matou i le la itu ile afioga ile Minisita Punaoa Faalenatura ma Siosiomaga le afioga ia Toeolesulusulu o ia foi o le tauaveina ia tiute o le Minisita o le Matagaluega Pisinisi ma Leipa ma Alamanuia ona faasolo mai lea , fia faailoa atu foi ile maota mamalu o le afioga ile Minisita o Tupe o ia foi lea o loo tauavea tiute faaminisita le Afioga ia Leota le Minisita o Tina ma Tamaitai ona faagasolo mai lea sei tau mai lea itu o le maota, ona avatu lea o se tala o a'u o loo tauavea foi ia tofiga o le tamaitai palemia aemaise ai foi le afioga i le Minisita o leoleo e avatu ai se tali e tusa ai foi ma saunoaga na tuuina mai totonu o

le maota o le faaaliga lea ma le faaaloalo lau afioga ile fofoga fetalai ia manuia le tali atu o le tatou Malo.

**FOFOGA FETALAI** : faafetai mo le saunoaga malamalama a lau afioga ile sui palemia ole a faapena ona tatou faia.

**Afioga Hon TOEOLESULUSULU CEDRIC POSE SALESA SCHUSTER (Minisita o Punaoa Faalenatura ma le Siosiomaga):** lau afioga ile fofoga fetalai o le fono aoao fai tulafono malo le tofa , malo foi le lava papale. E faafualalaga ma tau fagagape le foe mua ina ia tu faalaa le tupetua i taulafoga i finagalo faaaliga o sui mamalu o le maota , e maotuu le lagona o paia lava ile maota i Tiafau e leai lava se tupolata e fia auaugalu pe fia leo lagona ai, aua e le fai avea le faaleu pe liua ina ua le taua o le mea moni e tumau lava e mai lava anamua ua oo mai lava i tatou aso taalolo ia. Ae ua ou tu atu ma le faaaloalo ona o lea ua taloto au le tele ile tofa sausu mamao ma le faautaga faatafao i sui faipule o le maota e fulifuli faalaau mamafa ma tuli au manu le igafo o tuagalu ma e ao lava ina taumafai e tali atu iai e le mo le afa ae o laei o le mai aua Samoa ma lana tapuaiga mamala lau afioga ile fofoga fetalai e pei ona faaaliga ile afioga ile sui Palemia e 2 nai portfolio o loo faapea ona ou fesoasoania i le taimi lenei. O lea amata atu se faamatalaga ile mataupu tau faa minsita o Leipa ma Alamanuia.

Muamua ona avatu le agaga faafetai i sui mamalu uma o le tatou palemene sa faapea ona faaaliga le tofa ma le uta loloto e le gata i lea o timaiga , o nisi foi o faafesili o lea taumafai e avatu iai se vaivaiga o le Matagaluega e tusa foi o le feagai ai o lenei vaitau . I le Matagaluega o Leipa ma Alamanuia lau afioga i le fofoga fetalai ua ou faamauiina pea ma le 19-20 ia sui faipule sa faapea ona afea ma e toa lava i vaega e 4 lau afioga ile fofoga fetalai ia fautuaga foi ma atugaluga aemaise o timaiga sa faapea ona faaaliga.

1. O le tulaga i tatou galuega faavaitaimi poo tatou RSE.
2. O le tatou vaalele le Samoa Air
3. O le tatou grant handling aemaise o vaega ia sa faaalu , o loo i totonu o le tala o le tupe

Lau afioga o le a ou taumafai e amata atu i tulaga faapei ona faaaliga foi e nisi o sui o le tau o le soifuaga ona o nisi o vaega o loo aafia i lenei Matagaluega e aafia ai le faatautaia lea tototgiina foi o tau o oloa le tatou price control , lau afioga e pei ona taumafai atu o le tau o le soifuaga e tele vaega e ao ina silasila iai ma e oute talitonu foi ua lava tapena ma lava taoso ai le tele o le tatou maota fono nei aemaise lo tatou atunuu o le fesuiaiga o le tau o le soifuaga e amata mai i oloa , afai o oloa e aumai mai fafo , o le tau e aumai mai fafo afai e siitia ia le fefaatauaiga ma le tau ile gaosiga i atunuu i fafo o i e amata mai ai ona sii le oloa afai o le tau o transportation poo le vaa o vaalele faapea ona faaoo mai ai oloa mai fafo e faaopopo foi iai lo latou tau , oo mai i lo tatou atunuu ia o tatou tiute poo tatou taxes e faaopopo iai o le galuega a le tatou Matagaluega o le vaavaai lea through ile tatou price control tuai pe iai ni auala ina ia mafai ona faalaugatasia peitai lau afioga ile

fofoga fetalai , le tausaga 2016 lea sa faatua ai le tulafono ma ua tuu talaloo ai le tele o le control ina o tatou tau o oloa ao loo iai pea ile tatou price control board lau afioga ia le avanoa afai e iai ni oloa ua silafia e le atunuu ma faaoo atu foi e tauala atu ile Palemene ma le silasila ale Matagaluega faapea le ofisa o Matagaluega o Soifua Malololoina ma le Matagaluega o Tiute e ao ona iloilo o lea o loo iai le avanoa e mafai ona iloilo ai ma toe taumafai e control ai pe afai ua ova ma tauagata , i lenei taimi lau afioga o loo faapena ona faatinoina pea lenei tulaga , e pei ona silafia foi e le tele o le tatou maota o le tele lava o le amatalia mai o tau o oloa o tulaga mai fafo lea foi e toe avatu au le tuualalo ma le faamalosiua e pei ona saunoa le afioga ile Minisita o Faatoaga tasi lea auala tatou te silasila iai lo tatou atunuu a tele tatou oloa e mafai ona gaosia i totonu lava o Samoa ma oloa ma manaoga foi e mafai ona faatino e le alu ai se seleni faatau e ala lea i faatoaga ma atinae i totonu o aiga , o le tasi lea auala e faataugofie ai le soifua , e le gata foi lea lau afioga , le faaitiitia foi lea o tupe alu o tatou foreign reserves e fai ai tatou faatauina mai ai oloa mai fafo o loo taumafai foi le malo lau afioga i nisi o auala faapei o auunaga faalemalo e ala ile suavai o le eletise o loo vaavaai foi sa taua e nisi tatou policy o le energy o loo galulue ai foi ia le tatou malo i auala e mafai ona fuafuaga ina ia mafai ona siitia lo tatou malosi faafouina mo le tatou eletise ile 70% a fai e ausia lea i totonu o le tausaga 2031 o lea tele se faaitiitiga i le tau o le eletise ona faapea foi lea ona iai le faamamaavega i totonu o tatou atinae lau afioga ,na ou see mai lea lau afioga i le tatou Samo Air, e talitonu lau afioga i le Fofoga Fetalai o le a le toe oo i ai se tele o se faamatalaga, ona e talitonu o lea na saunoa malamalama i ai le Minisita i le Tala o le Tupe, i le tausaga ua tuanai i mafuaaga ua faatino ai e le Malo le tulaga o le toe faafoi o le vaalele ma nisi foi o vaega o lo o silasila i ai le Matagaluega. Ae tau ina ou faapai laititi i vaega ia, lau afioga o se tasi o vaega taua i le fuafuaga o le toe faafoi o le vaalele, e lata i le 100 miliona le aitalafu o lo o taumafai nei lo tatou Malo e totogi, mai le aumaiga o le vaalele ma le faatinoina o le atinae o le Samoa Air. E moni nisi o saunoaga e faapea, o le Air Fiji pe 300 miliona ea latou aitalafu. E tele le eseese o le vaalele a Fiti, ma Fiti ma Samoa. O Fiti ua leva ona i ai le latou kamupani vaalele ma alualu lelei, o Fiti foi e silia ma le 12,000 ia potu faletalimalo e mafai ona avatu ai tagata. O Samoa e tasi le vaalele lea sa taumafai i ai, e 2500+ ia potu, po o le a lava le i ai o le vaalele, ae a le lava potu e nonofo ai tagata e le mafai ona faatumu. O lea e i ai lava le tele o le taimi na i ai le tatou vaalele i lea vaiata, pe a i le 30 i le 40% o e malaga mai Niu Sila lea na omai i le Samoa Air. Ae o le toatele o i latou sa faapea lava ona faimalaga mai i le Air Niu Sila.

O nisi ia o ala lau afioga o lo o toe tapena i ai le Matagaluega iloilo, o lo o faatinoina nei foi se suesuega ina ia mafai ona toe tapena ia le jet operation ma maua mai ai se fautuaga, po o a se auala ma ni auala e toe faaleleia ai, e le gata i le jet operation, ae o le silasila foi i se vaiata lelei e ono mafai ona silasila ai i se vaalele. Ae ia faatino ia tulaga lau afioga, ae ua ogatasi le vaalele ma ia mafai ona compete ma isi airlines. A ia

lava foi faletalimalo ma nofoaga e mafai ona toai mai ma autovaa mai tagata tafafao mai fafo, a o i ai vaega e mafai ona i ai. Aua e leaga le i ai o le tatou vaalele, ae le mafai ona tumu ona e le lava a tatou faletalimalo. E le lava atinae e mafai ona tausia. O vaega uma nei lau afioga, o lea ua faapea ona tapena i ai le Matagaluega.

Ona ou see mai lea i le vaega lea o le tatou RSE po o tagata faigaluega i atunuu i fafo. E talitonu ua tofua saunoa foi le paia ma le mamalu o le Maota i le taua e maua ai seleni a aiga. E maua ai galuega a nisi e le o mafai ona faigaluega. Ua tofua saunoa foi lo tatou Maota e i ai foi ona itu le lelei, aemaise lava i le taumafai atu a le tatou atinae a lo tatou atunuu. Ia ua o uma taulelea, ua leai nisi e faia feau a aiga, ua leai nisi i totonu o nisi o afioga. O tatou tagata tomai faapitoa foi, o faiaoga, o leoleo, o fuimu, o tausi soifua, o ave loli, o i latou e faigaluega i tatou faletalimalo, ua tele ina o i galuega nei ona o avanoa maua A tele la le o, ua le mafai ona faatino atinae a lo tatou atunuu. O se ata faataitai lau afioga, o le taimi nei ua silia ma le 8,000 ia tagata o Samoa o lo o autovaa atu i fafo i galuega nei. A o faamaumauga a le ofisa mai le census lea sa fai po o le 2020 ea, e na o le 6,000 tagata Samoa e leai ni galuega, unemployed. E fai lava si faanoanoa, ou te talitonu e sese a tatou fuainumera, pe afai e onoafe ae o lea ua 8,000 ua o, ae silia ma le 16,000 nisi o tagata o lo o talosaga e fia o i galuega ia.

E le gata i lea, o vaega la ia, o lo o faapea...ia faaopoopo i ai ma nisi foi o atugaluga, o lea lava ua matauina ma faaalua e le gata i upega tafailagai, a o nisi foi o le tatou Palemene aemaise o le tatou atunuu, i nisi foi o aafiaga o alo ma fanau a lo tatou atunuu o lo o faapea ona autovaa atu i nei galuega i atunuu mamao. E le lelei le faatinoina o konekarate, e le lelei le vaaiga o alo ma fanau, e le o fetui foi totogi. O vaega uma ia lau afioga i le Fofoga Fetalai, sa faapea ai ona ae se tofa i le Kapeneta i le tausaga ua tuanai, ina ia toe fesiligia le Matagaluega e tapena se fuafuaga. O lea na amata tapena mai ai, pe lata i le 6 i le 9 masina o tapena e le Matagaluega. E faaoo atu foi le finagalo i le tatou Kapeneta, ia sa iloilo i ai, peitai ane e lei mafai ona maua i ai se autasi. O lea la o lo o i ai le fuafuaga a le Kapeneta, o lea ua toe tapenaina nei, nisi o tatou faiga faavae. O le mea mautinoa lau afioga i le Fofoga Fetalai, o le toe iloilo atu i ai o le soa komiti a le Kapeneta, e leai se faiga faavae poo se policy na faavae ai tatou malaga ia i fafo. E le mafai foi la ona faatino ia MOU ma feutagaiga ia i fafo pe afai e leai se policy po o se faiga faavae, e base ai le mea tatou te mananao ai. O le ala lea ua ave ai le faamuamua a le Kapeneta ina ia faavavevave loa ona fai se tatou policy, o i e iloa ai e Niu Sila ma Ausetalia, o manaoga nei ma faatagaga nei, latou te silasila i ai e mafai ai ona ave tagata Samoa. O le policy lea e mafai ona tatou vaavaai i ai, e le gata o e fia afifio atu i galuega, a ia puipui foi le tatou economy ma a tatou galuega. O le fuafuaga la lena o lo o i ai lau afioga i le Fofoga Fetalai. E faamoemoe ina ia faamaea i le masina nei po o le amataga o le masina fou, ona toe faagasolo lea o tatou polokalame o lo o fuafua i ai. Ae o le naunautai lava lea lau afioga i le Fofoga Fetalai, ia i ai se faiga faavae e faataua ai



tagata Samoa muamua ona tatou see atu lea i le feagai ai ma isi atunuu, a ia iloa foi e i ai puipuiga a lo tatou atunuu mo tagata faigaluega.

Ona ou see mai lea i le Matagaluega o Punaoa ma Siosiomaga, ia e maua le 20 o sui usufono o le tatou Palemene nei sa faapea ona faaalia finagalo foi. E tulaia foi lava i vaega ia e tolu. E muamua o le tatou taligalu, o le vaega lona lua sa tele i ai saunoaga foi o le vaega o eleele. O nisi foi sa faaali finagalo i le malosi faafouina po o le renewable energy ma le carbon credit e tasi.

O le a amata mai lau afioga i le Fofoga Fetalai se vaivaiga foi i le vaega o tatou taligalu. E le o se faiga faavae e le tatou Malo o lo o i ai nei. Ae o le faiga faavae ua leva ona taoto. O le galuega lava faamuamua a le tatou Malo i ana taligalu o le puipuia lea o ana aseta a le Malo. O le ala lea e faamuamua ai le faia o taligalu i auala, tafaala o lo o tulata i le sami. O le mea foi lea o lo o faagasolo ai, aua o i foi aua e maua mai le fesoasoani ai, e le gata o se grant, po o se aid po o se loan foi, a aumai e fai ai le auala e tataua ona fai ai ma le taligalu. O le ala lea o le tele lava o auala o lo o faatinoina nei e tulata i le sami, o lo o fai lava ma fai ai ma...e le gata o taligalu ma drainage. O vaega ia o lo o i lalo o le Matagaluega o le MWTI ma le LTA, o le a taoto atu e saunoa i ai le afioga i le Minisita. Ae faaali se manatu ona o se tasi o vaega, o tatou taligalu po o seawalls o le tele lava o lo o saunoa le tatou Maota, o taligalu i tua o fale o aiga. O nisi o vaega o alalafaga e le o lavea ia tatou auala o le Malo. E pau le vaega e mafai ona faaofi ai le tulaga, o tatou coastal resilience, o le puipuiga lea o tatou gataifale mai le fesuaiga o le tau. O le taimi nei, e faamalie atu i le tatou Maota fono nei, e leai se tupe o i ai i le tatou tala o le tupe e faatino ai. O tausaga ua tuanai, sa mafai ona faatino ia galuega, e ala i nisi o poloketi sa faapea foi ona tuuina mai, e ala lea mai Faalapotopotoga eseese e faatauina le puipuiga o tatou gataifale ma o tatou eleele mai le tafisea mai le fesuaiga o le tau. O le taimi nei la, ua maea nei poloketi sa faapea ona faatinoina ai nei fuafuaga.

Ae faatau e lenei Matagaluega ia le tulaga lea, sa i ai foi se naunautai o le Matagaluega ina ia maua sina seleni mai le tatou tala o le tupe, e faatino ai le vaega ia o seawalls, ma vaega ia o resilience i o tatou afioaga, peitai ane e le o i ai se tatou vaega i le tala o le tupe i lenei tausaga. Ae le o tuua ai le vaavaai pea o le Matagaluega i se auala e mafai ona maua ai fesoasoani e faatino ai finagalo o le tatou atunuu.

Ae ao foi ona avatu le tuualalo lau afioga i le Fofoga Fetalai, o nisi lava sa vaavaai foi i ni auala e mafai ona faatino ai, ae talitonu o le tasi lea vaega taua o le tai miliona lea ua alu mo itumalo. Afai e faatau i le itumalo ma le afioaga le puipuia o lou gataifale, e ao ona silasila ise auala e faatino ai, e faaoga ai se vaega o le seleni.

**SUI FOFOGA FETALAI:** E talu ai o lea ua taunuu i le tatou taimi malolo, ou te vaelupeina ai le saunoaga a lau Afioaga i le Minisita o Punaoa Faalenatura ma le Siosiomaga, o le Sui Minisita foi o Pisinisi Alamanuia ma Leipa. O le a mafai ona faaauau lau saunoaga pe a toe taliu mai i le malologa.

Ou te faasilasila atu o le a faataatiaese nei Tualumaga a le Fono Aoao Faitulafono mo lana malologa o le afiafi.

*Na faataatiaese Tualumaga a le Fono Aoao Faitulafono i le itula e 4:45 i le afiafi mo lana malologa i le afiafi, ma toe faaauau i le itula e 5:25 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo.*

**SUI FOFOGA FETALAI:** Ou te faasilasila atu ua toe amatalia nei Tualumaga a le Fono Aoao Faitulafono. I le toe talii mai i le tatou malologa, e i ai le manatu ua saialo le tauteaga a le paia o lenei Palemene. Ua maua foi se malosi faaopoopo e faaauau ai le tatou galuega. E faataatia ese ia Tualumaga mo le malu afiafi o saunoa le afioga i le Minisita o Punaoa Faalenatura ma le Siosiomaga, ma o le Sui Minisita foi o Pisinisi Alamanuia ma Leipa. Ou te tapa ma le faaaloalo lau afioga, e te tulai mai e faaauau lau saunoaga e tali fuaitau i mataupu sa laga e sui o le Maota.

**Afioga Hon TOEOLESULUSULU CEDRIC POSE SALESA SCHUSTER:** Faafetai lau afioga i le Fofoga Fetalai mo le avanoa. E avea foi lenei itula e avatu ai le agaga faafetai i lau afioga i le Fofoga Fetalai, aemaise le paia o le ofisa e tusa ai o le tapenaina o le tauteaga ma le taumafataga a sui mamalu o le Palemene, aemaise o Ofisa Sili o Pulega o Matagaluega ua faapea ona nopiai ai i le faagasoloina o polokalame o le Palemene.

Lau afioga i le Fofoga Fetalai, e na ona ou toe fia laa tasi lava i tua, i nai vaega na pau i le taimi foi ua sola i se vaivaiga i Matagaluega o Leipa ma Alamanuia. E faamalie atu lau afioga ona ua pau ia te au, e le o le price control board le vaega o lo o i ai nei, o le price control board lea sa latou control ina ia le tau i tausaga ua tuana'i, peitai ua suia le tulafono ma ua i ai le Samoa consumer and competitive council o latou ia o lea e faapea e mafai ona maua ai le avanoa, e toe iloilo ai nisi o tau ona o lea ua tuusaunoa i market forces e control ina ma faatulaga e latou ia le tau o oloa. A o lo o i ai le Samoa consumer and competitive council lea, e latou te mafai ona iloilo pe a i ai ni oloa foi e i ai se finagalo o le Palemene, po o le atunuu foi e ao ona toe iloilo. O le vaega e lua lau afioga, o se vaivaiga e tusa ai o le tapenaina o le faiga faavae o lo o fuafuaina nei mo tatou tagata e malaga atu i galuega faavaitaimi. O se tasi o vaega taua e pei ona saunoaina e le tele o sui o le tatou Maota, o le avanoa foi lea e mafai ona tuu atu ai i tua ia tagata e fia malaga faavaitaimi. O lo o i ai nei se fuafuaga ma ua faatalanoaina, o le naunautaiga, a maea ona tapena, e talitonu o le a faamatuu atu loa i itumalo, tatou komiti itumalo, latou te filifiliina mai sui. O le taua o lea

faamamafa lau afioga i le Fofoga Fetalai, pei ona saunoaina e le toatele o sui o le tatou Maota, o itumalo o afioaga ma alalafaga o i latou ia, o lo o i ai le malamalamaaga, e le gata o alo ma fanau o lo o manaomia, a o aiga foi. E faatauaina ai foi e pei ona faailoa i nisi o finagalo le taua lea e mafai ona puipuia ai ma faaitiitia ai le tele o afioaga o lo o faapea ona maua mai pe a o atu i atunuu i fafo. Ma e faatau foi lea iloiloga i totonu o itumalo, o le a faapea ona galulue faatasi ai ia le tatou Matagaluega o Leipa i le lesitalaina i tua i itumalo o i latou e fia malaga, ma fai i ai apoapoaga ma tapena ai. O vaega taua ia e faatau ai foi le anavatau a lo tatou faigamalo, ina ia faasafua le manuia ma faatau komiti o tatou itumalo.

Ona see mai lea i le vaega lea...

**SUI FOFOGA FETALAI:** Se i fai foi se malologa a lau afioga i le Minisita, se i tulai mai le ....

**Tofa Seuamuli Fasi Toma (Gagaemauga 2):** E faafetai mo le avanoa, e tulai atu ma le faaaloalo, e leai lava se faamoemoe i le saunoaga matagofie a le afioga i le Minisita. Ae o le tulaga lea ua toe paia e pei ona saunoa ai e uiga i galuega faavaitaimi ma le amanaia o tatou komiti o fono faavae o itumalo, e faaleo lava le agaga faafetai i lau afioga i le Minisita, e tusa ma lea faamoemoe taua. O le uiga moni ma le agaga maualuga, e sili atu ona malamalama ma silafia lelei e afioaga ma nuu i tua ia i latou e faapea ona fia malaga i galuega ia faavaitaimi. Aemaise lava le tulaga e pei ona alia'e mai ia i latou o faapea ona faafaigaluegaina, e maua galuega e pei o faiaoga, o inisinia aemaise foi o fomai ma i latou uma, atonu e tasi lea vaega e foia ai lea faatauli. E faaleo atu ai le agaga faafetai, o lenei itumalo i le amanaia foi o se vaivai e pei ona folasia atu. Ma le agaga faaaloalo faafetai.

**SUI FOFOGA FETALAI:** Ia faafetai o lo o fesoasoani mai foi le sui o Gagaemauga Nu 2. Faaua mai le saunoaga a lau afioga i le Minisita.

**Afioga Hon TOEOLESULUSULU CEDRIC POSE SALESA SCHUSTER:** Faafetai lau afioga i le Fofoga Fetalai, faafetai atu foi i le lagolago a le sui usufono. Sa faapea ona amata tapena e le Matagaluega lea vaega ma e fa itumalo sa trial ai. O lea la ua maua ai se manatu e taua, ma ua i ai foi improvement lessons learnt mai lea tapenaga, ma o lea ua fuafua ai le tatou polokalame o le a faatinoina nei.

Lau afioga i le Fofoga Fetalai, ona sa i ai nisi foi na faaalua le moni i le toatele o tatou tagata faigaluega faavaitaimi o lo o i ai nei i fafo. E pei ona i ai i le Tala o le tupe, ma sa faaalua foi e le Taitaifono o le komiti o tupe, e pau lea o se vaega o lo o i ai se tupe faaopoopo mo le Matagaluega. O lea ua mafai ona faafaigaluegaina ai ia se isi e toalua ai sui i totonu o Niu Sila. Sa taua foi ma fesiligia ia Ausetalia, e fiasia e faailoa atu, o lea foi ua maua le avanoa ua sponsor mai e le malo o Ausetalia ia le faafaigaluega o le isi tagata e toalua ai ia sui i totonu o Ausetalia e tapena. Ou te talitonu lau afioga, e le lava ia, a e o se mea e

tatou te tau amata ai. Ona o lea e pei ona faaalua, ua silia i le fa afe o tatou tagata faigaluega i Niu Sila ia faapea foi Ausetalia. O Ausetalia e pei ona silafia o se atunuu tele, e valavala mamao foi, e ao lava ona fuafua i ai a tatou fuafuaga. A o vaega uma ia o le a silasila i ai le Matagaluega ma le fuafuaga ina ia mafai ona maua avanoa, e fesootai ai. E le gata o alo ma fanau ae maua foi se avanoa e maua ai se malamalamaga o le Matagaluega ma le tatou atunuu ma le tatou Faigamalo, i auala e ao ona fesoasoani vave i ai.

Lau afioga ona ou see mai lea i le vaega lea o le Matagaluega.

**SUI FOFOGA FETALAI:** Se i fai foi se malologa a lau afioga. Ia tulai mai lau afioga i le Sui Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** E faafetai i lau afioga i le Minisita mo le folasaga. O lea ua faalogologo atu ma matau vaega taua, a o lea ua maua o le a e see ese ma le vaega lea o galuega faavaitaimi. O le fesili o le a le tulaga e i ai le isi visa lea o le Pacific Engagement Visa. E i ai se faamoemoe e faapea e taofi ia galuega faavaitaimi pe o lea e faaoga uma le lua lea. Aua o lea e maua i lipoti mai Ausetalia ma le latou polokalame fou lea, o le Pacific Engagement Visa, e 3000 avanoa mo le Pasefika. E pe i ai la se faia ma le labour mobility lea pe leai, po o masina uma, pe eseese polokalame ia, pe faaoga uma foi e tatou. Aua o lea sa ou nofo foi lava ma vaavaai matau ma le alofa i le toatele o alo ma fanau a le atunuu, i le masina na tea nei, masina o Iuni i faauuga o Kolisi i Upolu ma Savaii, Kolisi ma aoga maualuluga, i le toatele o fanau faauu, sa nofonono lava ma vaavaai pe i ai ni galuega e tua i ai nei alo ma fanau a le atunuu. E masalo pe faitau afe ia ...aua o le tele ia o aoga ia. E pei o le mafuaaga lena o le fesili, ona o lea e toatele alo ma fanau, ia faatoa faauu mai kolisi ma aoga maualuluga, ae faaoga foi latou i avanoa faapea, ae manaia le faaoga o avanoa e lua. E pei o le vaega lena o lea e mafua ai ona fesili i tulaga ia o polokalame ia e lua. Ma le faaaloalo.

**Afioga Sulamanaia Fetaiai Tauilili Tuivasa:** Lau afioga i le Fofoga Fetalai pe maua se avanoa.

**SUI FOFOGA FETALAI:** Se i tulai mai le sui o Vaimauga.

**Afioga Sulamanaia Fetaiai Tauilili Tuivasa:** E fia fai foi se tala e tusa ai foi i le Minisita ua tulai. E momoli atu le faafetai i le afioga i le Fofoga Fetalai ua tulai mai foi i lenei afaifi foe aua foi lou valaauina. Malo lea faatoa e amata ae matau e i ai agavaa o lau Afioga e taitaiina ai le Fono i lenei afaifi.

Ona o lea o le a see ese le Minisita ma le Labour lea sa taua e le vaega a lenei sui, le tulaga lea e pei e...i suiga o pemitia faigaluega. Ona o lea e galulue ai le Matagaluega o Labour ma le Immigration, e pei o i ina le isi tulaga lea sa naunau i ai. E iloa foi o le Matagaluega lea a outou e i ai mea o foreign investment lea e lesitala ai kamupani mai fafo. E pei o

le tulaga lea o lea sa avatu ai le tuualalo a lenei itumalo, se i silasila ane, leaga o le Matagaluega a le Palemia ma le Immigration ma le Labour o lea e issue ina pemitā faigaluega. O lea la e tele foi finagalo o si o tatou atunuu o lo o tatou atunuu e talanoa ai, ona o lea ua faataga tagata nei e omai e faigaluega. E pei la o le tuualalo toe silasila ane lau afioga i le Minisita o lo o tauaveina le mataupu lea i le Labour, tau faafaigata le issue ina o pemitā ia i tagata ia, ona o lea e mafai ona maua i totonu o lo tatou atunuu.

**SUI FOFOGA FETALAI:** O lea ua maua atu lou finagalo e le Nofoa.

**Afioga Sulamanaia Fetaiai Tauiliili Tuivasa:** O le lua o vaega lau afioga i le Fofoga Fetalai. Ona o lea na taua le tulaga i taligalu, ia faafetai tele lava i le faamalamalamaina o tulaga ia i lenei foi itumalo e pei ona ou taua. E pei o le tuualalo foi lēna na tuuina atu, ia faafetai o lea ua e tali malamalama i tulaga na, e malamalama foi le sui. E pei o le tulaga lēna o lea na tatalo atu ai i le afioga lea o Lauili, e le o i ai se auala a le Malo, ae o le fesoasoani i le mala faalenatura lea na avatu ai, pe o le a sou finagalo, ae saili ifo se seleni e faapena aua ...leaga o tatou lea e tele ina lilifa i le puipuiga o aseta, ae o le soifua ma le ola o tagata lea e pitosili ona popole ai le sui o Vaimauga.

**SUI FOFOGA FETALAI:** O lea ua maua atu lou finagalo, e masalo e maua pe a talifuaitau le afioga i le Minisita o Galuega Tetele a le Malo, e vasaga lelei ma le Matagaluega o Punaoa Faalenatura ma le Siosiomaga, a o lea ua maua atu lou finagalo faafetai.

**Afioga Hon Lautafi Fio Selafi Purcell:** Lau afioga i le Fofoga Fetalai pe maua se avanoa, ona o le mataupu tonu lea e saunoa i ai...

**SUI FOFOGA FETALAI:** Sa lag e lau afioga le...

**Afioga Hon Lautafi Fio Selafi Purcell:** E toetiiti lava faamalamalama a le Minisita o mea uma ia sa ou laga, lea na faamalamalama mai e le Minisita. O lea e momoli atu ai le faafetai i tulaga ia ua ou faalogologo atu ua taua e le Minisita, o mea lelei. Aemaise o tulaga ia, o lea foi e sau i le Tala o le tupe le toe faaopoopo o tagata faigaluega, liaison officer, e leaga lava na ou finau i mea nei. E tatau foi ona toe sii e pei o lau saunoaga ia le numera o Ausetalia. Afai o lau ua toalua Niu Sila ua lelei, ua talafeagai, a o Ausetalia e fai lava si tele o le nuu, e tele lava le taimi e fealuai ai le tagata, ae na o le toalua la ua i ai. E talosaga atu e fai ia Ausetalia e faatupe e latou, o latou e tele a latou tupe la e maua i o tatou tagata.

Ua ou tulai atu lau afioga, ona e i ai lava saunoaga a le Minisita o lea lava sa ou talanoa muamua atu ai foi i le laga mai e le sui Palemia. O faaupuga e faapea e o atu, e leai ni faiga faavae o faia ai le polokalame lenei. Silasila lau afioga ma le mamalu o le Palemene, o lea ua

luasefulu tausaga o le polokalame lea, ua luasefulu tausaga o le va o tatou ma Niu Sila po o ua sefulu nei tausaga ma le va o Ausetalia. E faafefea la ona fai na mea pe afai e leai ni faiga faavae? Atonu o le review a outou na e fai, lelei, lelei o mea tou te o atu tou tilotilo i le mea sa i ai, toe Iloilo lea. Ia fai ia faiga faavae e fetai ma le taimi lenei i la outou o atu i totonu, ma le taimi lenei ua i ai, le mea fou lea ua i ai ua i ai a tatou komiti o tatou itumalo, o mea fou na, fai i ai ni faiga faavae, ae toso mai latou i totonu. Aua na fai muamua foi, a o le taimi lena e lei i ai ni komiti ni fonofaavae. Sa fai lava i pulenuu ma faifeau, o i latou na e aumaia ia tagata. Ua fai fai foi, ua aumai lava e le faifeau ia ia tagata o latou aulotu faapea foi i le pulenuu. O la sa i ai faiga faavae, o lea ua luasefulu tausaga, e faapefea ona gaoioi Niu Sila, e tei lava ua tutu tatou i le malaevaalele, e le mafai. O lalo foi o le tatou feagaiga o le PACER PLUS, e i ai le Mobility Clause, Labour Mobility Clause. E i ai uma la faiga ia i mea ia e o ai na o le au tau apu, lea e o ai le vaega lea e o e kamuta lea na o i Christchurch. O la e foi ua faigaluega isi i Ausetalia, o lea foi ua maua le au fasimanu, o lea lava e sau uma i lalo, ae eseese policies na aumai ai i totonu. E le matagofie le saunoaga lea e faapea e o atu e leai ma ni... E 20 tausaga le au...

**SUI FOFOGA FETALAI:** O lea ua maua atu le finagalo o le sui usufono... se i fesoasoani atu le Nofoa. Se i fesoasoani atu le Nofoa, malie le sui usufono e alaala i lalo se i fesoasoani atu le Nofoa. A foi i le itu ua taua faiga faavae foi ia i tatou tagata faigaluega e tuina atu e galulue i fafo, e manatu lava e ao ona poupu e pei foi ona maua i le lauga a le Minisita, e ao ona toe poupu faiga faavae leaga o lo o lilifa i le itu e tasi le afaina o tatou tagata ma o latou soifua. E pei e aafia ai ma nisi ua aafia mai o latou soifua i atunuu ia e tuuina atu i ai. Ia e faatasi ma nisi e puipui foi i le va faale-ulugalii, o upu tautino ua aafia foi nisi o ulugalii.

E pei o le manatu lea e manatu ai le Matagaluega i le taimi lenei se i toe tapena lelei le faiga faavae i policies ina ia mautinoa ua malosi faiga faavae mo le tuuina atu o tatou tagata. A ia manatua foi e le mamalu o le Maota, o le Afioga i le Minisita, o lea na te tauaveina nei tiute tauave o le Minisita o Leipa ma Alamanuia. A o le tulaga lena, afai lava foi na o atu e le i mautu lelei, ia o lea e toe poupu ma foufou lelei faiga faavae a le tatou Malo, ina ia aua ne i afaina o tatou tagata faigaluega. O lea ua maua atu le finagalo o lau Afioga i le sui usufono mamalu, ae o le a tuu atu le avanoa e faamaea mai le finagalo o le Minisita ma fola mai le finagalo o le Minisita o lo o tauavea le tiute o le Punaoa Faalenatura.

**Afioga Hon Lautafi Fio Selafi Purcell:** Faafetai. Faafetai i lau Afioga. Ia ona o le faauigaina o upu lau Afioga, pei foi o lau tala na fai i le Afioga i le Sui Palemia, e ese le leai se mea, ese le o atu teuteu. A na faapea mai le Afioga i le Minisita ma te o atu o la e i ai faiga faavae, ae ua le fetai mo le taimi lenei, ou te talia ma le fiafia, leaga o au lea sa i ai i lalo le faiga lea. A o le mea lea na fai mai ai e leai se mea, ia o

le faigata ia ona talitonuina. E 20 tausaga o fai le polokalame, ia ma isi foi mea ia ua faaopoopo atu, o le Pacific Labour Scheme lea ua o ai le tai 3 tausaga, e fou foi na mea. E le i te i te i lava fai, na fai ona ua i ai maliega e fai ua i ai faiga faavae e fai ai. E 3 tausaga ae le o le 9 masina e pei o le tauapu ma tulaga na.

**SUI FOFOGA FETALAI:** Ia malie mai le sui usufono mamalu o lea ua ou avatu le faamalamalamaga a le Nofoa.

**Afioga Hon Lautafi Fio Selafi Purcell:** Faafetai ua uma foi sou manatu. Faafetai.

**SUI FOFOGA FETALAI:** Afai lava o lou lea finagalo, ae manatu foi, e ao ona see le tatou galuega. Afai e o atu o i ai ni faiga faavae, ia e oo mai foi i lenei faigamalo ua tulai mai le foe o le atunuu e toe teuteu ma poupu. O le mea lea, tulai mai lau Afioga i le Minisita e faaauau le saunoaga.

**Afioga Hon TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai. O le taua foi lea o le fai ma fai malologa e toe maua ai manatu pe a uma ona tali le sua a le tatou Palemene nei. Faafetai atu i a outou Afioga i mataupu ua faaalua. Ia o le a ou faagasolo pea le taumafaiga.

E faamalie atu i lau Afioga i le Sui Taitai o le Itu Agai, e le i maua i lau lauga le vaega lea o le Pacific Engagement Visa, o le ala foi la lea e le i lavea atu ai i le tali. Ia e le mafai ona ou tali atu i se vaega fou e le i sau i lau lauga faalauaitele. Ae na pau le vaega o le a ou taumafai e faalautele atu, leai, o le mea moni lau Afioga, sa i ai le Labour Migration Policy ae le i i ai se Labour Temporary Migration Policy. O le Labour Temporary Migration Policy, lea o lo o tapena nei e fitoitonu lava i o tatou tagata ia i galuega faavaitaimi. E le o se fault lau Afioga, e le o talanoa pe sese lea vaega pe leai. Lau Afioga, MOUs ia sa sainia, ona o le naunau foi o le tatou Malo i lea vaitau ma le taunuu mai o Niu Sila. Lea ua silasila le tatou Malo i lenei vaitau, ua oo loa ina tamau se faiga faavae a tatou e fesootai ai ma ia atunuu ina ia mafai ona omai ia atunuu ae tatou fai atu, o faiga faavae ia a tatou e gata ai le tele o le o, o vaega ia e tatau ona outou taiala ai.

Lau Afioga i le Fofoga Fetalai, ne i te i ua maua mai e faapea... i le tulaga lea e tau maua atu. E leai, o le naunautaiga lea e i ai, ia sii le tulaga, ona o lea ua faaoga tatou lesona mai a tatou taumafaiga ia sa i ai muamua. O lea ua tele aafiaga o lea ua vaaia, ia o le faasao la lea, tasi lea vaega taua. E le i i ai se tatou temporary labour migration policy, o lea la ou te taumafai e faatino, e fitoitonu lava i tatou tagata ia i galuega faavaitaimi. Ae o le tasi o lea vaega lau Afioga i le Fofoga Fetalai, o le toe iloilo ina lea o MOUs po o memorandum of understanding po o maliega ia a le Malo o Samoa ma Niu Sila, maliega lea a le Malo o Samoa ma le Malo o Ausetalia, lea e i ai faatagaga e ave ai o tatou tagata e faafaigaluega i atunuu ia. O lea foi la e taua ai le tatou policy e

taiala ai le tatou feutanaiga ma ia atunuu, o a mea e tatau ona tapena i ai. E faaoga foi la le lesona lea ua mau mai tausaga ua mavae e fatufatu ai se manatu mo le taiala i luma i le tele o aafiaga ia lau Afioga.

E talitonu la o le Pacific Engagement Visa lea e taua, ia, ona o le taimi nei pei ona i ai i MOUs ia o loo i ai galuega faavaitaimi foi ia o le au piki. O le tele lava o i latou ia, e faalauualuga lava o i latou foi ia po o le unskill, ia o lea foi la e ave i ai le tatou faataua, o i latou e le o i ai ni galuega. Ae ese foi la le vaega e tatau ona iloilo i le tatou faiga faavae mo manaoga e i ai semi skill, e i ai nisi manaoga faapitoa i naunautaiga o i latou e manaomia. O i la e i ai le tai 6 pe tai 9 masina ma le 3 tausaga. Ae ao foi ona faataoto le tatou fuafuaga, o le a le umi a o le a le tele. O vaega ia o lea e tau fuafua nei i ai. O le faamoemoega lau Afioga i le Fofoga Fetalai, ia vave ona faamaea ona mafai loa lea ona toe feutagai ia faagasolo nei tagata faigaluega lau Afioga.

See mai i le tulaga lea pei ona saunoa i ai le sui usufono mo Vaimauga i Laulii. E moni le saunoaga lau Afioga, e pei ona avatu foi se vaivaiga i tatou seawalls po o taligalu. E i ai aseta e faataua ona o aseta a le Malo, ae i ai foi vaega ua maitauina ma faamauina e le gata i suesuega a o sailiiliga ma faamaumauga a le tatou Malo, e i ai foi eleele ma fanua ma afioaga ua aupito sili ona aafia i nei tulaga o fesuiaiga o le tau, e i ai la le afioaga lea o Laulii ona o se tasi lea afioaga e leai se aau, e sau sao lava le sami, ia... sa fauina foi ia taligalu i tausaga ua mavae lau Afioga, peitai ane, ua tele ina toe afaina. E tele se galuega e faatino, ae taoto mai lou finagalo, e le gata ina faataua o aseta o le itumalo, ae o se vaega taua lea mo le tatou coastal recessions, aemaise o le tatou climate resilience, o le puipuia lea o afioaga ma le tatou atunuu mai fesuiaiga o le tau.

O nisi o a tatou... lau Afioga i le Fofoga Fetalai, o nisi foi lea o tatou taligalu, ia o le tatalo lava lea. A tatou faatali i le Malo, e i ai lava le naunautaiga e mafai ona faatino, ae atonu e le mafai ona faasopoloa le naunautaiga o tatou afioaga ma alaafaga i totonu o le tausaga lenesi. Ae o le a taumafai i ai le tatou Matagaluega i le galulue faatasi foi o le Malo, o a nisi auala e mafai ona fesoasoani i ai. Ae pei lava ona avatu le tuualalo, ia tasi lea aoga o le tatou tai \$1miliona. E le faapea o le a fai uma lava le seawall i le \$1miliona. A fai se vaega o le seawall i le \$100,000 i lenesi tausaga, ae faasafua le isi vaega e fai ai isi atinae. Oo i le isi tausaga faapoopo atu le isi 200 mita. E uma ifo le 3 tausaga, ua 500 mita pe atoa le kilomita ua uma ona faatino. Ia a o vaega e mafaufau i ai itumalo, a i ai le fesoasoani a le tatou Malo, e mafai ona fautua ma fesoasoani foi i ata aemaise foi o nisi o fautuaga, ia ma le galulue faatasi foi i nisi o talosaga e mafai ona tuu atu i atunuu i fafo lau Afioga i le Fofoga Fetalai.

Ona ou see mai lea lau Afioga i le Fofoga Fetalai i le tulaga o eleele, ia, e i ai nai afioaga o lo o talosaga i eleele. Ia, o lea foi ua uma ona saunoa le Afioga i le Minisita o le Esetete Tausi, ia o lo o silasila foi i ai le Pulega a le Esetete Tausi. E i ai foi nisi o afioaga o lo o talosaga i eleele o i lalo o le SLC po o le tatou Samoa Land Corp. Ia o lo o faapea foi ona faatinoina le iloilo ina i ni eleele e mafai ona faamatuu atu. Ia e



faapea foi i le tatou Matagaluega o Eleele ma Fuagafanua, ua oo mai foi talosaga a nisi o tatou afioaga i ni fanua. E moni le saunoaga e faapea o le tasi lea o mau sa tauave e le tatou faigamalo a o tapena foi le faiga palota. Ma o lea o lo o galulue i ai, o lo o tapenaina nei se Komiti a le Kapeneta, o i ai le Minisita o le SLC, o le Minisita o le Esetete Tausi ma au nei o le Minisita o Eleele a le Malo e toe faatulaga, silasila po o a ni vaega e aupito talafeagai ona mafai ona faatino ai lea naunautaiga o le tatou faigamalo. O a ni eleele e mafai ona toe faamatuu atu, a o foi aiaiga e ao ona i ai. E i ai aiaiga i tausaga sa i ai i tausaga ua mavae, a o le tulai mai foi o lenei faigamalo e toe iloilo po o a nisi mea e mafai ona faalelei ai ma faamatuu atu, a o i ai se maliega i atinae e fia faatino e le gata i le tatou Malo, aemaise lava afioaga ua utiuti o lo o mafai ona tagolima i ai aua le lumanai manuia o afioaga ma alaafaga.

Lau Afioaga ona ou see mai lea i le tulaga lea o eleele ia sa talosaga foi e nisi o afioaga o itumalo i galuega. Faafetai atu. O le mau lava o lo o faatino e le tatou Komiti Faatonu o Eleele, a talosaga mai itumalo foi i nisi o eleele o i lalo o le tatou Malo e fia faatinoina ai atinae o itumalo, e ave i ai lana faamuamua i le taimi nei. Ae ona o lo o tapenapena fuafuaga a le Matagaluega i se land use plan ina ia mafai ona faasafua ona o nisi o eleele, e tele foi aiga o lo o faapea ona faatalosagaina mai i nisi o eleele e fia maua ni vaega e fai ai atinae.

Lau Afioaga ona ou see mai lea i si vaega lea na taua o le carbon credit. Ia ou te talitonu lau Afioaga i le Fofoga Fetalai, e amata mai se faamatalaga, o le a lenei mea o le kaponi credit. Ae ao lau afioaga i le Fofoga Fetalai ona tuu i tua se faamatalaga i le mea e mafua ai. E pei ona laualuga foi e le gata i totonu o le tatou faigamalo ma atunuu o le Pasefika, a o atunuu foi o le lalolagi le aafiaga lea o lo o maua ai tatou o le fesuiaiga o le tau. O aafiaga o le fesuiaiga o le tau ona e mafua mai ua tele le kaponi e alu i luga o le ea ona o le tipiina o laau. O nisi o vaega ua faapea ona aafia ai le faaofuofu foi lea po o le green house, ua atili vevela ai ma tele ai vaega ia o afa ma fesuiaiga o le tau.

O le faanaunautaiga la pei ona i ai le tatou maliega faava o Malo o lo o i ai o le UN Framework Convention on Climate Change, o le faaitiitia lea o le kasa kaponi ma... ma nisi o kasa o lea e aafia ai le tatou green house, ona faa-release atu i le ea. O le naunautaiga la lea o lea foi e i ai tatou, ona pei ona silafia o tatou nei e le gata o Samoa a o atunuu o le Pasefika, e aafia gofie tele, tele tele ina fai e atunuu i fafo, a o lea e tele ina aafia ai lo tatou atunuu ma atunuu o le Vasa Pasefika. O le faanaunautaiga la o le tatou Malo ma nisi o Malo o lo o auai, ina ia uunaia atunuu ma kamupani o lo o faapea ona latou faia nei galuega, e tele ai le kasa kaponi e release atu i le ea ina ia faaitiitia, faaitiitia lo latou release lea ona e le tele se tatou kasa kaponi o release, a o lea e aafia tatou.

Lau Afioaga i le Fofoga Fetalai, o le auga lea o le faanaunautaiga o lenei faamoemoe, ia mafai ona faaitiitia le release ina lea o le tatou carbon, peitai ane, o nisi o fuafuaga e ala i le PARIS Agreement, lea ua tatala ai le avanoa, lea e mafai ai ona... afai ua tele se tatou storage – carbon stock, ona mafai lea ona tatou silasila le tatou atunuu, ia pe

mafai ona faatau atu foi ia i latou i kamupani leaga ia lea ua latou release ina e faalaitiiti ai le latou offset. I faamaumauga o lo o i ai nei lau Afioga i le tatou atunuu sa faapea ona faatinoina i le tausaga e 2014 i lalo foi o se fesoasoani mai le Malo o Iapani, sa faatinoina ai le suesuega i le carbon stock a Samoa e auala mai lea i o tatou vaomatua ma tatou laufanua, lea na faamauina ai se vaega o le \$46 miliona le carbon stock a Samoa, faaopopo loa i ai ma nisi vaega e le i mafai ona suesueina e faapei o tatou togatogo ma nisi o le tatou gataifale e ala i amu, o sea grass. E tele lava vaega e le i mafai ona faaatoatoa i ai le tele o le tatou carbon stock. Lau Afioga i le Fofoga Fetalai, ia ona faaopopo lea i ai ma tatou auala ia e taua foi o tatou renewable energy po o tatou faamoemoe foi lea i auala gafataulimaina o le tatou malosiaga faaeletise. O vaega ia a faaitiitia, ona afai e mafai ona liliu e fai a tatou solar ma tatou electric vehicles, fai a tatou biomass. O atinae uma ia e faaitiitia ai le tatou emissions. O le faafetauaiga la lea lau Afioga i le Fofoga Fetalai o le laitiiti o le tatou emission, e mafai ona tatou faatauina nisi o carbon credit ia mai le faasiliga lea. Lau Afioga o le taimi nei e le o i ai se tatou Tulafono, e le o mafai la ona faatauina. Ae i le fuafuaga lau Afioga, o lea ua faatalanoa ma vaavaai le tatou Malo, tasi lea o auala e mafai ona maua ai se seleni e atinae ai foi nisi o vaega o le tatou atunuu, ona o lo o faatino ai foi... o le tasi foi lea auala lau afioga i le Fofoga Fetalai ua faatau ai e le Matagaluega le vaega lea o le toe totona o le vaomatua i le 3miliona laau o lo o toto. O le tele o laau toto, o le tele foi lea o tatou carbon stock faaopopo. O le tele la o le tatou carbon stock, o le alualu foi lea i luga o le tatou value. A o le taimi nei, e i ai nisi foi o kamupani sa faapea ona fuafua e talosaga ia avatu nisi vaega o le tatou kaponi e faatau ma latou, ae fai ai atinae e fuafua mo le tatou atunuu. Ia o lo o iloilo i ai le tatou Malo aemaise Matagaluega ina ia mafai ona faatino. Afai e faatino, ia faatino i se auala e puipui ai Samoa ma maua ai se atinae e mafai ona fesoasoani ai i a tatou polokalame faatino, aemaise lava o le puipuiga lea ma le faaitiitia lea o aafiaga o le tatou atunuu faapei ona manaomia e i ai seawall, o vaega o lo o aafia i le fesuiaiga o le tau.

Lau Afioga, ia o se taumafaiga vaivai lea e faamalamalama le vaega lea i le taua, ae tele lava le...

**Afioga Fuaava Suluimalo Amataga (Aleipata Itupa i Luga):** Lau Afioga i le Fofoga Fetalai, pe maua se avanoa faamolemole.

**SUI FOFOGA FETALAI:** Ia, se i fai foi se malologa a lau afioga i le Minisita. Se i tulai mai le sui usufono mamalu mai Aleipata Itupa i Luga.

**Afioga Fuaava Suluimalo Amataga:** Ia, ua faafetai atu lau Afioga i le Fofoga Fetalai mo le avanoa. O se avanoa taua foi lea e momoli atu ai le agaga faafetai i le Afioga i le Minisita, ia ona o le mataupu lea sa agai i ai se faamatalaga foi a le sui usufono o lenei itumalo, faafetai o lea ua faamanino le tulaga lea. Ae pei o le atugaluga lea sa i ai, o le

tulaga foi lea faapea ua i ai tupe ua leiloloa le tatou carbon trade lea foi lele. A o lea ua manino le tulaga lea. E pei o le lipoti lea o le 2014 a Iapani, ia ma le Matagaluega, lea na amata ai loa le tatou \$1miliona, launch mai le 2015. Uma le \$1miliona laau toto, toe alu le alu le \$2miliona. E pei lava o le \$3miliona lea ua alu nei i le taimi lenei, lea foi ua avatu ai fesoasoani i itumalo ma seleni ma lau atu ma laau, ia o le taumafai lava ia tupu le stock o le tatou carbon, aua o le tele o laau, o le tele foi lenei o le tatou storage lea i le tulaga o kaponi, ae faaitiitia le tatou emission i le tulaga lea o le tatou renewable energies lea e i ai le solar, o le wind, o le hydro, ia ma mea uma faapea. A o le tulaga lea na avatu ai se faamatalaga i le lauga faalauaitete, ona o le tasi lea alatupe lelei mo si o tatou atunuu pe a faapea e mautu tulaga ia. E pei ona i ai foi i le PARIS Agreement i le 2015, pei lava o le lua tausaga talu ai lea na toe fai ai loa le instrument lea po o le mechanism e mafai ai loa ona fai fefaatauaiga ia i le Stocklolum ea lea e i ai le isi agreement lenei.

Ia pei o nai mea ia foi lele e momoli atu ai le faafetai i le Minisita, ia lea ua faamanino, leaga o lea sa saunoa le Afioga foi i le Fofoga Fetalai i le taimi lenei, ia e le o manino i le tatou Maota le mataupu lenei ae o lea faafetai ua fesoasoani mai, ia o si mea lea sa taumafai atu ai le sui usufono o lenei itumalo. Ia ma le agaga faaaloalo. Faafetai.

**Afioga Leaana Ronnie Posini:** Lau Afioga i le Fofoga Fetalai, pe maua se avanoa...

**SUI FOFOGA FETALAI:** Ia saunoa mai le sui usufono mamalu mai Safata, se tasi o sui usufono mo Safata. Saunoa mai.

**Afioga Leaana Ronnie Posini:** Faafetai tele i lau Afioga i le Fofoga Fetalai. Ae momoli le agaga faafetai tele i lau Afioga i le Minisita, ona e tasi lea mea sa taua i lau lauga ona o upega tafailagi na agiga i luga ua faitau piliona tupe a le tatou Malo na maua i le mea lea o le carbon credit a ua le iloa po o fea le mea ua agai i ai. O tupe ia ua faatau e le faigamalo talu ai, le iloa tupe ia. Ae faafetai tele i lau Afioga i le Minisita, o lea ua matua manino lava. O saunoaga foi i totonu o le Maota lenei, na o mea moni lava e aumai i totonu o le Maota lenei, leaga o la e faafogafoga le tatou atunuu. A o lea ua e saunoa, e leai lava ma se tupe o maua. O lea e momoli atu ai le agaga faafetai tele lea ua manino ma malamalama le Palemene, malamalama foi le tatou atunuu. Ma le agaga faaaloalo.

**SUI FOFOGA FETALAI:** Malo faafetai. Ia atonu o lea ua... se i fesoasoani atu le Nofoa i tulaga ia, leaga o lea foi na laga e le sui usufono mai Aleipata Itupa i Luga, le vaega lea o le faaaogaina i a outou saunoaga o ni faamaumauga mai le social media. E avatu lava le agaga fesoasoani atu o le Nofoa, ia taoto le tulaga lenei. Ae o lea ua outou faafogafoga i le manino o le saunoaga a le Afioga i le Minisita, ia tatou ave lea i luma. Ae fesoasoani atu lava le Nofoa i le taimi lenei ona o le tatou galuega o lea e tuli le tatou galuega ina ia vave foi ona tatou

malolo, ia aua tatou te faaaogaina le mea foi lele o... se o tala e feaveai e matagi. Tulai mai lau Afioga i le Minisita e faaauau le saunoaga.

**Afioga Hon TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai. Na pau lava le toe faapooopo atu, o le tasi lea auala o lea ua vaavaai i ai le tatou faigamalo i le taimi lenei, e i ai le value e mafai ona tele le value, a ia silasila lelei po o le a le tele o le mea e tatau ona tatou faatauina. Ina ia aua ne ... ia tatou mau ai pea tatou i le vaega lea o le zero emission. Ae moni, a faatupe i le taimi lenei, e i ai nisi o carbon markets o lo o i ai, o le faaitaiga e mafai lava ona faatau e se kamupani tatou carbon stock, pe \$100 Amerika i le carbon stock e tasi. Afai la e \$46miliona le tatou carbon stock, ia atonu o lea e auai le tala lea pe silia ma le \$1.5piliona say value, ae le faapea o le aofaiga lea e mafai ona tatou... o le aofaiga lea lea e i ai ia tatou ae le mafai ona tatou faatauina uma. O le galuega la lea o lo o vaai po o le a se mea e mafai ona tatou faatau, a ia taofi ai le tatou auga lea o lo o i ai ia faaitiitia le aafiaga o le tatou siosiomaga.

Ia o se toe fesoasoani atu lea, ae i ai le faanaunautaiga foi tasi lea auala e mafai ona maua ai se seleni e fesoasoani mai ai pe a maea tapena fuafuaga ma le faatinoga, aemaise foi o se Tulafono faataatia e maua mai ai se tasi o alamanuia mo a tatou atinae lau Afioga i le Fofoga Fetalai.

Ona ou afe mai ai lea i si ou itumalo o Aana Nu.4. Faafetai le tapuai. Ia e i ai lava tatou polokalame o lo o faagasolo, e talitonu a maea le tatou fonotaga, o lea foi ua uma ona faaaoga ma tapena a tatou galuega i le faatinoina o le tatou \$200,000. Ia lea ua fuafua le tatou miliona se i maea lelei ona tatou feiloai lea, ou te talitonu e tele ni atinae o lo o fuafua. A o nisi foi o atinae sa fuafuaina, ia, o le naunautaiga lava o le faamamaavega foi i le Malo lau Afioga, e pei ona i ai se tasi o tatou atinae, ia o lea ua taoto atu foi i a tatou talosaga, e mafai ona faatupe mai ai foi i nisi o tatou faigapaaga, ia street lights, solar street lights mo le tatou itumalo, ona e talitonu e le o lava se tupe a le EPC e fai ai street lights o le tatou itumalo atoa. E i ai foi nisi atinae o lo o fuafua ma tatou feiloai pea, ae avatu le agaga faafetai i la outou tapuaiga, le paia i faafeagaiga o tulatoa ma tapaaui o le itumalo, ia, faafetai mo le tapuaiga. O le vaivaiga foi, e faaleo lava se leo e maua ai se lumanai manuia o le tatou itumalo, aemaise Samoa.

Faafetai atu i le Sui Taitai ma le paia o lea Itu, faafetai atu foi i tama matutua o le Tutoatasi, lau Afioga i le Sui Palemia ma le Kapeneta, le paia o tatou Sui Minisita. Faafetai atu foi i Ofisa Sili o Pulega o Matagaluega o lo o faapea ona nopiai ma fesoasoani i le faatinoina o le tatou galuega.

E muliai se faafetai lau Afioga i le Fofoga Fetalai i Pule Sili ma Pule Lagolago o Matagaluega o lo o faapea ona fesoasoani mai ma fautuaina ma aumai foi le tuualalo ina ia mafai ona faatino ai e lou tagata se auaunaga mo le tatou atunuu. Soifua ma ia manuia.

**SUI FOFOGA FETALAI:** Faafetai saunoa i lau Afioga i le Minisita o le Punaoa Faalenatura ma le Siosiomaga ma lou tauaveina foi o tiute tauave o le Minisita o Leipa ma Alamanuia. E momoli le faafetai o lea ua fofoga le Maota ma ua manino uma vaega sa laga e nisi o sui usufono.

Ae manatu o le taimi lenei o le a tuu atu le avanoa i le Minisita o Fesootaiga ma Faamatalaga Tekonolosi. Tulai maia mo lou avanoa e te saunoa ai.

**Afioga Hon TOELUPE POUMULINUKU ONESEMO (Minisita mo Fesootaiga ma Faamatalaga Tekonolosi):** Faafetai i lau Afioga i le Fofoga Fetalai mo le avanoa foi o lenei Matagaluega, a o le itumalo o Falealili Sisifo aua se sao mo le tatou Fono i lenei ituaso.

E fonofaapipii so matou vaivaiga i le talosaga siitia e le Afioga i le Fofoga Fetalai i le taeao ua sola, e viia ai le alofa ma le agalelei o le tatou Tapaau Sili i le lagi, e faafetaia ai Lona alofa taumulimuli ia Samoa ma ona tagata, aemaise foi o le Fono Faitulafono, i Afioga i sui usufono, lenei ua tatou tuvae ua tali uma le tausaga lona lua o le tatou Paeaiga.

Faafetai i le alofa ma le agalelei o lo o tumau Lona alofa ia Samoa ma ona tagata.

E faatalofa i le alafa o le Maota Fono o Samoa i lenei itula, i le afio o lau Afioga i le Fofoga Fetalai, afio le Afioga i le Sui Palemia ma le mamalu o le Kapeneta, ae a le Sui Taitai ma le mamalu o le Itu Agai ma sui usufono o le Palemene.

Susu lau Susuga i le Failautusi o le Fono ma lau aufaigaluega, ae a le afifio o Ofisa Sili o Pulega o Matagaluega o lo o tapuaia o tatou faiva i lenei aso.

Le paia maualuga i le tafatolu fefaatauagai o le Malo, le faafogafoga tapuai a le Afioga i le Faamasino Sili ma le vasega o Faamasinoga. Ae a le paia o Samoa mai Saua seia paia Agalega. O paia faa le atunuu i Aiga ma latou Tama, Tama foi ma latou Aiga, faafaleupoluga ia Tumua ma Pule, Aiga i le Tai ma le Vaa o Fonoti tulou, ae tainane le au faigaluega tofofi o le Atua o loo talafaauto i le i soo se tafa o lenei atunuu , nono manu aua se Samoa nei ma le lumanai le faagaloina le faigamalo Tutuila ma Manua , sui usufono o lenei itumalo lie afio lau afioga i le Kovana sili ma lau Kapeneta afio le afioga Peresitene o le Senate fofoga fetalai o maota e lua ao le paia lava lea aua le Faleagafulu Sua ma le Vaifanua, Saole ma Saleaumua le launiu saelua ae a upu i Manuatele le Laaunaamotasi, Faatuiolemotu tootoo o le Faleula ma upu ia te oe le Manuatele tulou, aea le au faigamalo tofofi o le Atua o loo tapuaia faiva o Tutuila ma Manua malo le soifua manuia. Samoa i atunuu e mamao faatulou atu, faatalofa atu i lenei itu aso lau afioga i le Fofoga Fetalai tatou o sui usufono e le galo si ou itumalo nofo tapuai aua le alofaiva o le tatou palemene ma lo latou sui usufono, faatulou i le paia o le aufaigaluega tofofi a le Atua le susuga i le toeaina aemaise le aufaigaluega i soo se fata afio lava lea, le paia lea aua Alalagafa Malononofo mai taulaga eseese ia Falealili, tapuai maia

sei faia se sao o le usugafono o le tatou itumalo e ala lie auunaga faaminisita e pei ona iai lenei vaiata. Lau afioga lie fofoga fetalai e iai le talitonuga o lea ua tatou iai le amataga o lenei vaiaso fou o leni tausaga fou le vaiaso lona lua o le fono uluai fono ae e iai le talitonuga a leni Matagaluega e momoli atu le agaga faafetai i le afioga i le Minisita o Faatoaga sa tauaveina tofi ma tiute o leni foi Matagaluega lie tofi minisita ao toesea talitonu foi le faamoemoe tele ni tali a le afioga lie Minisita ia tulaga sa fesiligia e afioga i sui usufono i na vaiaso ua sola , ma e pei ona silafia lau afioga o Matagaluega o loo i lalo o leni auunaga faaminisita pei e leo mafuli lava i tulaga tau tekonolosi ma fesootaiga peitai o loo iai foi le Matagaluega o tulaga auunaga tau falemeli aemaise le tulaga lie Ofisa o le Fono se taimi oo atu iai se tala ao le agaga faafetai lena lau afioga le fofoga fetalai faamauina ona o le fesoasoani a le uso a Minisita i galuega tauave ao toesea foi i tulaga o tofi ma tiute , lau afioga lie folasaga i leni afiafi fia agai faaautu se taumafaiga a leni Matagaluega i faiga faavae lautetele a le faigamalo o iina o loo fau mai ai le tulaga le auunaga ma le taumafaiga a le Matagaluega e pei ona iai i leni vaiata. Faiga Faavae lautele muamua ia fesoasoani , faamamaavega mo le atunuu aemaise lava lie tamaoaiga, lau afioga tulai mai lie 17 masina talu ai sa lagona le tele o talosaga ma tulaga e pei ona iai lie tulaga tau initaneti i totonu o aiga o le mafatiaga sa vaai lie tulai mai i lena taimi ma le faigamalo o se avega mamafa tu lau afioga i le fofoga fetalai e le gata e faatupe tatou Komiti o aoga ia le tulaga o le totogiina o le initaneti aemaise foi tagata latou te faaogaina e ala i puleaoga, aemaise ia equipment i computers ma tulaga faapena ae oo foi i le maintenance o le avega mamafa, le ala lea sa ae ai le tofa lie afioga i le Palemia ma le Kapeneta ma le faigamalo ave le faamama-avega aua a moni lo tatou alofa ia faaogaina uma ma ia iai le tomai i alo ma fanau mo le lumanai lelei o le tatou atunuu o le tatou faamuamua lea o loo gagana le lalolagi i leni vaiata lie digital transformation lau afioga o le molimau lena lie afioga lie Palemia ma le Kapeneta ma le faigamalo ave le faamuamua i tatou aoga tatou fanau aoga a toe fua la iai i galuega fita komiti aoga ma afioga taitasi e pei a ona saunoa nisi o sui totonu o le maota e le faigofie ma o le agaga tonu lea sa laga ai se finagalo ina ia faia le tatou fofo o le faafitauli lea sa iai le tatou poloketi pei ona iai lie tatou... lua vaega lau afioga e ao ai ona faamanino le vaega lena lea ua tatou ..... i leni aso a ua maea ona faapipii ma ua foia le faafitauli e pei o le agaga lea sa iai sa tatou luga lalo lie seleni ao le mea lea ua iai le aso leni fiafia e tau atu uma ona faapipii uma le 120 ua ola uma tapenaga mo le agai atu o fanau i aoga ma ole agaga lea lau afioga sa laga ai se finagalo lie afioga lie Palemia ia fai ia ola ma ia lelei ma e faaopopo ai finagalo lie faigamalo leni tausaga e free internet le agaga lea lea tau amata atu ai se faavae faigafaavae lautele ia o le faigamalo faamamaavega aemaise tepa taulai lie tulaga taua mo le lumanai , a moi lo tatou agaga alofa i alo ma fanau ia mafai ona latou faaoga computer faaoga lelei le internet aemaise meaningful access connectivity o i e amata ai latou aoga o le agaga le lau afioga e momoli atu ai le agaga

faafetai i itumalo uma sa lagolago le agai atu o le aufaigaluega molimauina le tali lelei ma le talisapaia o le faamoemoega ua faamamaavega le afioga ia Togisala ma le Kamupani lea ua molimauina ua maea faapipii , lau afioga ona nao le 120 na aumai ae 168 a tatou aoga o loo iai pea le 48 e leo nofo ai le tatou faigamalo o loo iai le naunautaiga ina ia toe faaopopo lea vaega le ala lea lau afioga e avatu ai male agaga faafetai lau afioga ma le maota lie tapuaia foi ma le talia o le talosaga a lenei itumalo , a lenei Matagluega i le amataga ina ia foia le faafitauli e pei ona gapatia ai le afioga le Minisita o Aoga i tausaga e tele . Ia lau afioga lie taimi lenei e le gata ua faaola ae ua faauau ia tatou training e pei a ona faiatu le amataga sa faatino ia asiasiga ma ia aumai se alafua talafeagai ma se alafua tonu e ala ai ona faaletonu le mea muamua lea ua le connectivity mea lona lua fai training ina ia lava tapena lava taoso a tatou faiaoga aemaise i latou o e olea faaaogaina, faaogaina o lea tulaga ae e le faapea foi o le a tuulafoai e le Matagaluega, o le galuega faauau a le Matagaluega o Fesootaiga ia mautinoa e ola lea initaneti i aso uma e manaomia ai e aoga lau afioga lie fofoga fetalai o le vaega muamua lena, faamama-avega ia siitia le tamaoaiga o tatou , lona lua lau afioga lea ua maea ona tapena le tatou pitosili ona manaomia , lea sa faaaoga e le tatou National Broadband poo se SNBH lea sa iai foia le faafitauli sa tele ina faaalua aik ma lagalaga ai finagalo i totonu o le maota lea ua agai le faigamalo toe tapena ma faaleleia le tatou National programme Bank e pei a ona tau faiatu lie tausaga ua tuanai foia muamua le faafitauli lea la ua iai tatou ... e tali mai soo se taimi o le tatou peitai e le mafai ona tuu tiai le tatou SNBH taumafai e toe faaaoga lea ao le Nationa programme lea sa lagalaga ai finagalo ae ua iai le finagalo o le faigamalo e agai e toe tapena i se itu lelei leaga e tele ia galuega uma a le malo o loo faaaogaina i Leoleo , Fuimu , o le DMO ma le Falemai tulaga uma faapena e ao lava ona faaleleia ma ia mautu i se tulaga lelei lau afioga ia o le tulaga sa iai e le tauagavale foi ao le tulaga sa pei e tu atu i tua i le tatou kamupani , private sector latou te vaaia ua matauina e le Matagaluega e ao ona toe tapena lelei le tulaga lea silasila lie faiga faavae talafeagai silasila i auala talafeagai ia mataitu e leo mau tamaoaiga o le tatou atunuu pei o le isi lea mea lau afioga e taua le ave i private sector ae taua foi le silasila i le tamaoaiga o le tatou atunuu aemaise lava population e leo tele fuafua i atunuu mamao ao lau vaai i ala talafeagai e le mafai foi ona autamala i tatou pisinisi ma vaega tumaoti o i latou ia o loo taumafai ona ola ai le tamaoaiga i nisi o taimi , ua iai la le fuafuaga a le faigamalo i lenei vaitau ina ia toe tapena lelei le tatou national programme ina ia faaleleia ia auaunaga a Matagaluega uma aemaise ia tumau le free o le internet mo tatou aoga , lona tolu lau afioga taua lie tele o sui lie tulaga o le tatou coverage faamauina ma le agaga faafetai masalo o loo molimau e nisi o sui usufono mai a lie taimi ua leva aemaise a Aleisa oo foi i Falealili Nuu i tua tulaga faaletonu 16 tausaga o le tulaga lava lea ma o le fua a lea na iai lau afioga e pei a o mea masani o le inu o le... e fua foi le laasaga pisinisi i tulaga i lana investment aemaise le tulaga i le return i lana investment o loo iai i ia

nofoaga a matau lo tatou atunuu ua tele ina le nofoia ia Nuu i tua a tuu la iai lie revenue mai i ia nofoaga mo le pisinisi e pei tau fesiligia le investment a leo le investment o lona uiga o le tour matauina sa saunoa nisi o sui i taimi ua sola i tulaga lie call location e le taugofie foi le call locationa pea fua i tupe maua lea foi ua agai le tatou faigamalo e toe silasila i vaega , ina ia lelei le atinae faiga faavae lautetele ia lau afioga lea tau agai atu ai se faamatalaga i totonu o le tulafono ua leva ona iai le tulaga o le universal access fund atonu e fai si umi o iai le tulafono ae lei agai faamalosi o le tulaga lena lea ua iai le tulaga tapenaga talafegai faigamalo e silasila i vaega nei ina ia mafai ona silasila iai ae le faapea foi o se mea e faatauagavale i tatou pisinisi e pei ona faiatu lie taimi ua sola taua tatou pisinisi lau afioga i le fofoga fetalai mo le agai i luma e iai foi faiga faavae ua silasila iaia le faigamalo ina ia siitia le auauanaga pei a ona ou taumafai atu o galuega faaauau e le mafai onafaatopetopeina ao tapenaga e ao ai ona maioio ma lelei faiga faavae mo nei ma le lumanai , taua foi nisi o sui lau afioga tulaga o le faatupeina o le tulaga i tatou equipment ma i totonu o tatou aoga o le tala i le Alataua manava maileia fiamaua nisi mea se tele aua lo tatou atunuu peitai i lenei vaitau e mafai a ona oo iai pea lelei le tamaoiaiga i totonu o le infrastructure ma totonu lie faigamalo i lana polo faasoa pei ona iai le afioga lie Tamaitai Minisita o Tupe lau afioga e ao ona faatepa lenei maota lie tulaga i le taimi o revenue o lenei matagaluega 4 miliona nao fees a foi a le tatou spectul ma laisene a tatou e leo tele se tupe maua a lenei Matagaluega le ala lea e ala ai ona toe silasila i le faaogatau o le revenue lena ina ia toe generate ai ni alafua lelei mo le lumanai ao lea foi revenue e alu tasi a i totonu o le tatiou Matagaluega o Tupe faasoasoa mai ai ona o loo tele manaoga aemaise a le tulaga o Aoga ma le soifua maloloina mea lena lau afioga e pei ona faiatu lie talosaga ua atonu iai mo le lumanai ao loo tau amatamata atu tapenaga ina ia toe iai se tupe maua a le tatou Malo e tali ai manaoga ia , lea ua faamuamua atu lie free internet atonu e fesoasoani i alo ma fanau i lenei vaitau lau afioga o nisi tapenaga lie tulaga lea ina ia siitia ia auauanaga e pei ona silafia e le Palemene ma taua foi le tulaga i pisinisi e pei a ona silafia le tulaga aotelega o loo ua ave iai lenei Matagaluega ua avatu uma i tua le tulaga o le auauanaga i tatou pisinisi ina ia ola o se tulaga lelei peitai silasila foi le tatou faigamalo i tulaga lelei mo nei ma le lumanai le ala foi lea e taunapa ai i tatou SOE's ua faaitiitia ai foi le tatou population aemaise a le tupulaga lea tele le latou faaoga... aemaise a matou mai tua, pei sa tau feololo sa fesoasoani lie data service providers peitai pei o le isi lea vaega e naunau ai ina ia paleni vaega uma, maua le tupe maua lelei mo nei ma le lumanai ae maua foi auauanaga ma users mo a tatou auauanaga nei . Lonla lua lau afioga a matau i luga o upega tafailagi tele ia o faasea a le tatou which is o le mea lelei , lau afioga e iai le talitonuga o le audits ma tulaga i faasea matou te tauina o le fautuaga mea lea o ai lava e iai lana fautuaga mo lenei Matagaluega o loo faasalalau atu nisi auala e tauala mai ai le fautuaga faamauiina le saunoaga a nisi o sui faaletonu o auauanaga ma ua faamauiina o le a faatalanoaina foi aemaise le tulaga o pili, mo le



faamanino o le pili latou o le tulaga lena ia lie service provider ma i latou o loo faaaogaina le telefoni o le matou tuualalo ina ia toe tagatagai lelei i maliega sainia ina ia mafai aemaise o le faaaogaina faatoa agai lea totogi ae o loo avanoa lava le Matagaluega e avatu ai le fesoasoani i tulaga manaomia , le isi vaega lau afioga e fia oo iai sa matou talanoaga e ui e lei afea e sui mamalu o le tulaga lea i tatou cycle security e iai le agaga lelei faaaogaina o le internet, lelei le tulaga i tupe vave ma tulaga uma faapena o loo iai ale popolega lena i le faigamalo lie tatou cycle security o loo galulue vaavaalua ai ma le Matagaluega o Leoleo lie afioga lie Minisita ma le Komesina i le tulaga lena , o le mafua lea vaega lau afioga ia o le tulaga ina ia... lau afioga o le mea mulimuli ia lie tatou meaningful connectivity o loo tele ia fesoasoani mo le tatou miliona o loo tele o tulaga i luga o le youtube o loo aumai ma faataitaiga o le faaogaina tatau o lafu manu ma meatoto e fesoasoani o se fesoasoani faaminsita o le tekonolosi ina ia faaoga tatau le tekonolosi e ala i tulaga faapea e tapena ai tatou itumalo mo tatou miliona , lau afioga lie fofoga fetalai e lei tele nisi na fesiligia pe nao le ofisa le fono i se sui usufono na fesiligia foi tulaga e ala ai ona manaomia ia le maliega a le kapeneta lie faaaogaina o le seleni e pei ona iai e iai le talitonuga lau afioga o loo tumau le mamalu lau afioga male fono aoao afioga fofoga fetalai ma le paia lie fono e leo iai le afioga lie palemia male kapeneta se tulaga faapea taofiofi ao tulaga masani o le tulafono , tulaga masani o le faaaogaina o tupe a le malo ia e faapena , o meauma lava e lesona mai le tuanai i tulaga talu ai i tausaga ua leva a e na aumai ai lipoti mo lisiti ma tulaga faapea i audit sa tauamafa ai le ava i nisi o seleni pei e faapena le agaga , lea la ua iai le tamau i lalo o le tulafono ma faiga faavae o seleni faaoga e ao lava ona aumai le maliega a le kapeneta ina ia faaaogaina e faapena uma foi i Matagaluega e le nao le fono aoao ae pei e faapena o loo iai le avanoa pe afai nisi tapenaga talafeagai a sui mo le lumanai lau afioga ona ou oo mai lea lie auunaga a le falemeli e pei a leai se tasi na saunoa i lea vaega ao le agaga faafetai a le Matagaluega e ala atu i le fono aoao faafetai i Itumalo o loo latou vaaia ma puipuia tausia lelei ia tatou falemeli e pei ona iai aemaise lava i Salafai lie itumalo o Faasaleleaga Nu 03 iina i Tuasivi aemaise Gagaemauga Nu 2 iina i Fagamalo aemaise foi Palauli Nu 1 iina i Salailua momoli atu ai le agaga faafetai o loo agai pea i luma le auunaga a le falemeli ma o loo solo lelei meauma lau afioga lie fofoga fetalai ia nao na pau lea o tulaga e pei ona iai.

**SUI FOFOGA FETALAI:** Fai se malologa lau afioga lie minisita, sei tulai mai le sui o Lefaga ma Faleaseela.

**Afioga Masinalupe Makesi Masinalupe:** Faafetai mo le avanoa e le faalavelave lie saunoaga matagofie a le Minisita manino ma malamalama meauma e tusa foi o lou tomai lie faatinoina o le Matagaluega pau a o lea ona e lei maua lelei e lou sui ona lea sa laga le tulaga foi lea i pili o fono faavae ana o lea taua e pule a le service

provider ao le tulaga e fai manino ai o lena ia outou le faatonutonuina o lea vaega lie regulator poo lea tulaga ua iai le gasologa ona o lea ua avatu le pili ae lei faaogaina poo lea o le installation lea mafua ai le pilil e le ioe lo'u taofi ona e lei faaogaina se mea ao lea ua avatu le pili e 4 afe ma le faaloalo lava.

**SUI FOFOGA FETALAI :** poo ua maua mai lau afioga lie Minisita leaga sa saunoa iai le sui mamalu a Lefaga ma Faleaseela i le mataupu i lena, saunoa ia lau afioga lie Minisita.

**Afioga Hon TOELUPE POUMULINUKU ONESEMO:** Faafetai lau afioga lie fofoga fetalai atonu e taua ia ole fesili faafetai foi lie sui usufono o le avanoa e toe faalautele laititi pei ona iai le tulaga i le tatou tulafono tumau o le tulaga tau faiga faavae tulaga faapena , sa iai la tapenaga i le taimi tomua atu i le tulaga silasila i maliega i agreements i totonu iina o loo taatia ai le tulaga e iai le pili male tulaga faapena ma lona faaogaina ae sa i luma atu i lena vaega sa iai foi le tulaga o loo tatala ia avanoa e aumai ai faasea pe faapena , le Ofisa Sili o Pulega o loo avatu foi ia advertisements foi i luga o TV a iai se tasi e faasea i se auaunaga i luga o TV , nusipepa tulaga faapena ia o loo tatala avanoa ae nao se fautuaga e tuu atu faapena e silasila lelei i tatou maliega fai a fesiligia pea tusi mai pei e faapena le tatalo atu ai lie sui usufono ina ia e augofie foi le minista e alu atu e faatalanoa ma foia le faafitauli ae ta te alofa le atunuu o loo tapuai mai ae afai uma loa e tatou le mea lea, lona uiga e le malolo le Minisita i aso uma mea lea avatu ai faapena le tatalo ona faauma ai lea lau afioga lie fofoga fetalai lie.

**SUI FOFOGA FETALAI:** Onosai mai lau afioga lie minisita o loo iai le faauilavea lie sui o Satupaitea saunoa mai.

**Afioga Hon Lautafi Fio Selafi Purcell:** Manaia le faalogologo lie saunoaga lie afioga lie Minisita ona o lea faatoa malaga mai le minisita mai nuu mamao o lae fou lana faalogo o le mataupu lea te fia ona o lea sa e laga le faaletonu o le kava i Aleisa ona o a'u oute nofo ai iina Aleisa ae ou te faamoni lau saunoaga aua ua fai foi si leva o o'u , faaleo a lo'u le fiafia lie coverage ii a le fasi mea lea ou te nofo ai lie le lelei lie ae faimai o mlt black spots sa faimai sue se mea e tuu iai se pou a le digicel , na ou alu foi lea talosaga lie samoa land faasino mai le mea e mafai ona tu ai le pou ae iai foi le mea ua o atu foi faapea e le lelei ia lea la ua leai se pou ae o loo tumau ale faaletonu a lea ua ou faalogo atu leai lea ua taea i lau saunoaga atonu o le a faaleleia ua uma ona faisoo lie regulator e le faia a se mea faiatu ae faimai aumai sau tusi aloaia o lea te complain a lea nofo mai i ou luma measili lea ua faafofoga mai lau afioga.

**SUI FOFOGA FETALAI:** Lea ua maua atu le finagalo o le sui o Satupaitea, faamalulu atu o nai faamaumauga e te lei saunoa lie tulaga lea ae faamalulu atu le sui no Satupaitea o lea lava ua ao faatasi le

afioga lie Minisita le malae i tulaga ia o lea faatoa 16 masina o le faigamalo ao lea lava e tapena iai lea foi faamauina atu i lalo ii ia faasea , o fautuaga foi ia i latou ae faamalulu atu lie sui ona e lei taua i lau saunoaga o le ala lea , faamaea mai le saunoaga a lau afioga lie alii minisita.

**Afioga Hon TOELUPE POUMULINUKU ONESEMO:** Faafetai mo le avanoa , faafetai lie afioga i le sui usufono ma o le tulaga tonu a lea sa ou taua ai ia Aleisa i Sasae ona o le molimau a tali le telefoni a le afioga lie faipule e alu i luga o le auala mo le fia tausaga 16 tausaga lea na uma atu nei e le fou la le faafitauli ma e lelei ona pea avatu lie aotelega o le folasaga faiga faavae ia lea la tilotilo iai leaga o loo iai foi le itu e base le infrastructure investments lenei a le service provider lie data la e maua mai ai ma le revenue lae maua mai ai lie tilotilo la faapea la o le revenue faatoa maua lie 50 tausaga e le auau la ae o le tulaga lena lea ua tau agai atu ai le faiga faavae a lenei matagaluega e silasila lie tulga e encourage ai le tou location pei a ona saunoa nisi o sui usufono o le agaga lea e encourage tou location a nao le \$400 le revenue ae \$500 le tou location ia o se pisinisi nau lea ma le faaaloalo pei o le agaga lena e le mafai ae a auauai le tou location pea leai se soalaupulega lelei lea taugofie nei mo le lumanai pei o le agaga lea lau afioga e fesoasoani atu ai ae faamauina sa ou faalogologo mai a lie fono i o e lei misi se aso , ala po a i le 3 vaveao e taputapu mai faiva o lau afioga male tatou palemene, ona faamaea lea o se tala lenei afiafi lenei itumalo ma lenei usugafono , ao lei maea lau afioga lie fofoga fetalai e faanono atu pe maua se avanoa sei afe ane i si o matou itumalo lie paia o Alalagafa ma Alo a Nofo aemaise le tauaga eseese faapito augafa se lagona lie itu i sisifo afio alo o Fanene ma le Usoalii Matua ma le Tofa aemaise foi le afio o Salevalasi ma le matua ia Tiavaasue le tapau faasisina le tui Samoa aea Talo ma le aiga Satalo afio alo o Fanene afio alo o Tuatagaloa aemaise foi le afio lie Aliioaiga le aiga Salaimoana aemaise Talo ma le aiga Satalo , Lufilufi ma Taulauniu ma Faalufilufiga o le tatou itumalo ia malo le soifua manuia manuia le tausaga fou e iai le talitonuga lenei tausaga se tauasaga taua lenei aemaise pei foi ona faafofoga i taulumaga o le fono ole tausaga lenei lie faatinoga o galuega o le miliona malo tapuai faafetai lavapapale ma le onosai o lenei tausaga faamoemoega ma naunautaiga ina ia faatino nisi o galuega aua lo tatou itumalo ole mea e momoli atu ai moomooaga alofa i si ou itumalo aemaise le aufaigaluega tofofi a le Atua i le susuga i le toaina ma le aufaigaluega, faafetai tatalo i si ou faatauva, aemaise o le gafatasi o lo o ma vaavaalua, faafetai tatalo. O le naunautaiga o lenei itumalo ia maea le lima tausaga o i ai nai seleni i aao o lenei itumalo. Ona ua amata ona lagona le leo o le mativa i nisi o nuu ma afioaga, o le agaga lea lau afioga.

E momoli atu ai moomooaga alofa i lau afioga. Faafetai o lea ua e tu i matagi olo i lenei aso ma lenei afiafi o ou mama na, lagolagosua i le afioga i le Fofoga Fetalai, ia maua le tofa faale-Atua i lau afioga, i le Palemia ma le Kapeneta, aemaise o le sui Taitai ma sui usufono uma o

le Palemene o Samoa, maua foi le malosi i le afioga i le Failautusi ma le Ofisa o le Fono, aemaise o le tofa manino i afioga o Ofisa sili o Pulega o Matagaluega e tautuaina lenei Maota. Ma le faaaloalo faafetai.

**SUI FOFOGA FETALAI:** Ua logo faavaatui le Maota i le saunoaga i le afioga i le Minisita, malo foi le tali malamalama mai i nisi o vaega sa laga e sui mamalu o le Maota. Ua faamalo tapena, ae i ai le manatu, o le a faagasolo pea le tatou galuega. O le a tuu atu le avanoa i le Minisita o Aoga, Taaloga ma Aganuu i lau saunoaga, i ni vaega foi sa laga i finagalo o sui mamalu o le Palemene e uiga i le Matagaluega.

**Afioga Hon SEUULA IOANE (Minisita mo Aoga, Taaloga ma Aganuu):** Lau afioga i le Fofoga Fetalai, ou te tulai atu ma le migao ma le faaaloalo ao sasao ma alala le Fonousu a Samoa. Ou te faatalofa ma faatulou atu. E le faagaloina ia te au upu o le tatalo i le Aso Faraile na tea nei a le Afioga i le Fofoga Fetalai, na ia amata ai i se lafoga faapea, e paia, e paia, e paia leova o Au. E faapena foi se lagona i lenei afiafi, ona o le Atua o le Faavae o Samoa, ou te faapea atua i, e paia le Atua, e mamalu le Atua, e maualuga le Atua, ia faaneeneina le Atua. Lau Afioga i le fofoga fetalai, o lo tatou tiute lea faatagata soifua, e muamua ona tatou avatu le viiga i le Atua, aua Lana pule faasoa ma Lona tamaoaiga ua faaoaina ai i tatou.

Lau afioga i le Fofoga Fetalai, sa tatou muai tapa le alofa o le Atua i le amataga o le tausaga, sa ia agalelei mai i Lona alofa tunoa e puipui ma leoleo le sa o Samoa a o faasaga atu le taumua o lo tatou sa i le ava o le sami tele. Sa faalogoina i uega tafailagi lata mai nei, ua asiasi atu le tamaitai o Ailini i le atu Fiti, ae faafetai o lea lava e malu puipuia lo outou soifua ma lo tatou agalelei i le alofa ma le matautia o le Atua.

E avea ia lou faatauva e fai ma sui o le Matagaluega o Aoga Taaloga ma Aganuu, e molimoli atu ai le agaga o le faafetai ma le faamalo i sui usufono uma o lenei Fonotaga. I la outou tofa ma le faatofalaiga i le oa o mafaufauga, ua matimati ai le uega ma le afaloloa a le Matagaluega o Aoga. O la outou faasoa ma le pule, faafetai fai o le faiva. Ua matou lotu tetele ma matou mautinoa o le Matagaluega o Aoga, o le Matagaluega a tatou uma. Pe e te lauga i le taligalu, e penefiti le Matagaluega o Aoga, pe e te saunoa i alagalue, e penefiti le Matagaluega o Aoga. Pe e te saunoa i le paipa ma le leai o se vai o lou itumalo, e penefiti le Matagaluega o Aoga. Aisea? Aua o mea uma ia, e faigofie ai ona feoi fanau ma alo e faataunuu aoaoga o i ai nei, malo faafetai, faafetai le uta, faafetai le tofa.

I le galuega faa-Matagaluega o Aoga i le tausaga na tea nei, matou te momoli atu le faafetai ma le faamalo i sui usufono o le tatou Maota fono. Aua o la outou lalago ma la outou tauau na tuu mai i o matou lima, ua mafai ai e le Matagaluega o Aoga ona ausia nisi o ana matatia, e le i mafai ona ausia muamua. E faafetai i le aufaigaluega paia a le Atua ia outou talosaga, faafetai i matua, fafaga faalavalava, faatupe, o le galuega faifaipea a tatou.

E faafetai i faiaoga, faafetai i asiasi aoga, o le Matagaluega tutotonu. O isi Matagaluega uma sa iai lo outou sao i le taua o aoga i totonu o le tatou atunuu, faafetai o la outou pule lea.

Ou te fia afe ane i mataupu na laga, o le a ou amata mai i aoga faataitai e pei o aoga a nai tamaiti laititi ia, faafetai le amanaia. O aoga ia ua ave i ai alo ma fanau pe tolu fa tausaga, e amata ona tapue ai le olaga aoaoina, ia mafai ona tautala, ia iloa ona fai se upu, ia iloa ona fai se pese, ia mafai ona iloa le eseese o lanu, ia tautala, ma faamasani i uo.

Sa i ai se finagalo po o totonu e le Malo ia faiaoga ia. Lau Afioa i le Fofoga Fetalai ma le mamalu o le usugafono. O le faatupega e le Matagaluega o aoga, o aoga amata, e faselau tala a le tamaititi e toatasi, four hundred per head. O lona uiga, a toatele lava tamaiti o le aoga faataitai po o le aoga amata, o le tele foi lena o le latou tupe. A toa laititi foi o le laititi foi lena. Ua i ai le faataatiaga o le Matagaluega o Aoga, o aoga amata uma e le ausia le sefulu afe o le latou tupe e ave, e pule latou i le faaaogaina o le latou tupe. A o aoga amata uma e sefulu afe agai i luga, ua avatu i ai le limasefulu pasene e faaoga e totonu ai faiaoga. A o le isi limasefulu pasene e faatau ai meaaoga a tamaiti, e fesoasoani i le faiga o le latou aoga, o le tulaga lena o lea e i ai. ua i ai foi le avanoa ua mafai ona fesoasoani ai le Matagaluega e faasikolasipi mai ai ni alo e fai ma faiaoga faataitai e ave e aotauina i le Iunivesite. E pau le tulaga ua matauina i i, o i latou ia na o atu i le alafua lea i aoga faataitai e o atu i le Iunivesite, e iu mai, ua latou iloa a toe foi e faiaoga i le aoga faataitai, e le tele sana tupe. Ae a alu e sue sona avanoa i aoga tulagalua, e tele la i ina lana seleni e maua. Ia o lo o taatia pea le faitalia ina ia mafai ona tilotilo uma i itu e lua. E le gata i le vaai foi o aoga a le Malo ina ia maua ana faiaoga, ae alofa foi i le aoga na amata atu ai le soifua tautua. O le tulaga lena o lea e i ai tatou aoga faataitai. O aoga uma lava ua lesitalaina i lalo o le Matagaluega, ua avanoa lelei e faatupeina e le tatou vaegatupe lea e tau o le **OGG**.

Sa i ai nisi finagalo sa afea e pei ua le alagataua ona totonu e le Malo faiaoga a le ekalesia, aoga tumaoti. I le taimi lena, o lea foi ua i ai le fesoasoani a lo tatou Malo e totonu ai faiaoga ia. O kolisi a le ekalesia Katoliko o le Metotisi, e fai si tetele o tupe e ave mo le tamaititi e toatasi i kolisi. Ona e leai se fesoasoani a le Malo i le taimi nei mo le totonu o latou faiaoga. E le pei o le Malo o lea e totonu e le Malo ona faiaoga. O lea foi ua avatu i ai ma le avanoa e aumai ai se limasefulu pasene o lena vaegatupe, e fesoasoani i totonu o faiaoga, a o le isi vaega, e faasoa foi faapena, e faaoga mo mea e fetauti ma talafeagai mo le aoga.

Ua uma lava ona tapena e le Matagaluega ia matata eseese e ono faaoga i ai selenei nei, ma vaega foi e le tataua ona faaoga tupe a le komiti pe faaoga i ai vaegatupe ma sailiga seleni a aoga, e faatino ai le faamoemoe lea.

Sa i ai nisi finagalo pe le o se aiatataua i lena taimi, a o tatou i ai pea i le fesuiaiga o le tatou soifua, ona o faamai ma mea tutupu mai i lea taimi i lea taimi. O lea ua tapena le Matagaluega mo vaega ia. E masalo o le kuata muamua lena o le a avatu ai se faamama avega a le

Matagaluega e tufaina laptops, o tablets o projectors mo aoga e fesoasoani e tali ai manaoga ia, nei faalavelavea tatou i se isi foi lockdown o muamua tatou te le iloa. Ua le gata i le faatotogaina i vaega na, ae i ai foi le talitonuga ua tatau ona faagaioi le koleniina o faiaoga, fai ni latou developments mo le faaaogaina o nei mea totino taua aoga ma le taugata. O vaega na o lea ua tapena i ai, e le gata i lea ua tapena foi le Matagaluega e faaoga atu le social media e ave ai aoaoga, i tua i tamaiti. E faafetai mo le finagalo sa aumai, ma e ui o lo o i ai se faateetega i le Matagaluega ona o nisi foi o tulaga sa tatou le mananao ai, ae o lo o mataitu pea e le Matagaluega, ina ia sao ma uli le faamoemoe o le faaaogaina o vaega ia e faaoga i aoaoga.

I le faatotogaina o aoga, i le faaaogaina o le tupe a lea o le **OGG**, e faatau ai nisi totoga faaneionapo e fesoasoani i aoga. Ma o le pulega o na masini e pule ai le puleaoga ma le komiti o le aoga. O le pulega o le aoga, e soosoo toalua ai le toalua lea, o le puleaoga ma le komiti aoga o le aoga. O lona uiga e le mafai ona fai toatasia e se toatasi se faaiuga, e le mafai ona fai toatasia, seia vagana ua soalaupule lelei, ma soosoo lelei ona faatoa mamulu lea o se mea, pe faatau mai foi se mea e aoga mo tamaiti aoga.

O lea na saunoa nei le Minisita o Fesootaiga i le tatou sootaga faatekonolosi, ia faafetai i lau afioga. E tuua aoga ia Tesema i le tausaga na tea nei, o lea ua outou faafofoga i aoga ua uma ona faapipii a latou wi-fi, aepeitai ina ua tuua loa aoga, ona toe o loa lea o le kamupani lea e toe tape uma lava, ona e i ai le popolega o lea ua tatou ulufale i le vaitau o afa ma timuga, ma ua le toe i ai se tamaiti aoga po o se faiaoga i totonu o le faleaoga latou te vaaia mea ia. O le taimi la lenei o lea o le a ae le kuata, o lea o le a amata ona toe faaola uma ma faaaogaina loa ia vaega ia ua i ai. Pei tasi lenei popolega faapea o le a saga loka pea, e leai o lea ua i ai le talitonuga ua tatau ona tatou faasolosolo i luma.

O le faatalatalanoaina o avanoa e pei o puleaoga, pule lua, asiasi aoga, o lea ua i luga nei o le laulau-a-fono a le PSC lea faatalatalanoaga, ma aumai foi sa latou tuualalo ina ia matou tilotilo i ai i le faiga lea ina ia faafaigofie ai, ona maua gofie avanoa. O lea tou te silasila ma tou faafofoga foi i le tausaga na tea nei, toetiiti valu masina pe iva, o avanoa lava le Ofisa Sili o lenei Matagaluega. E le faapea o le leai o ni tagata na apalai, sa i ai tagata, peitai na umi se taimi o tau toso le process. E tele foi galuega a la PSC ia, o lea la ua i ai le finagalo ma le manatu o le a taatia mai i tua lea vaega mo se taimi oi luma.

Le tatou Iunivesite, e momoli atu le faafetai tele i le pulega a le Iunivesite. E avea ia lenei avanoa e fai ai au ma sui o le Matagaluega o Aoga, e faafetai ai i lau afioga i le Laau na Fausia, lau afioga Aiono, lea foi 3 tausaga na e tulai mai ai e pulea le tatou Iunivesite. E sao lava lau vaai i na vaitaimi, e te pule Iunivesite lava ae alu lava lou loto i lau galuega na e amata ai o le fomai. Ia e faapena foi lava tatou, e fesui ai lava tatou portfolio tatou te o ai, ae ave lava le loto i le mea na e amata ai ma pele ia te oe. Ia manuia lau lau afioga i le amataga o ou tiute ma ou faiva. E sao lelei le finagalo i le toatele o tatou tamaiti ua faauu mai i

le Iunivesite. Sa ou i ai i le faauuga i le tausaga na tea nei, o le mea na ou matauina, o le toatele o tamaiti faauu a le Iunivesite e toatele i teine. O i ina lea ou te maua ai, e fai lava si tau faaletonu o le faatea o le au a tama. O lona uiga o se luitau foi lea ua le gata i aoga tulagalua, o aoga a Kolisi silasila ane ma tilotilo, aua le tuulafoaina le itupa malosi, e manaomia le tuu i luga ina ia paleni. Ia le gata ua toatele tamaitai e faaulufale i totonu, ae faalefiafia alii e o i totonu. Ona o foi lea i totonu, e o atu lava taaalo ae fai lava meaaoga a teine, ou te iloa o le mafuaga lea. Ae o le tatalo ma le uunaina ia te outou matua ma faiaoga se i faamalosi mai le itupa le o tatou.

Ou te faafetai tele i le Minisita o Aoga talu ai, lau afioga Loau, mo le aoga i Tafaigata po o Saint Pauls. O le aoga lea matou te o atu faapea o se aoga na amata e le Matagaluega o Aoga. Na i ai nai faafitauli laiti, ia o mea lava e mafai ona fai. Sa matou asiasi matou faasoa ma le PTA ma le puleaoga, o lea ua faataatia o le a ave latou i totonu o le OGG i le tausaga lenei, ina ia i ai se tupe e fesoasoani foi e faatino ai a latou galuega ma mea e fai. E i ai foi lo matou talitonuga, matou te fia asiasi i le community i le nuu o Tafaigata ina ia aumai le latou lagolago i le aoga. E matou te o atu, e tasi lava si toeaina la e nofo mai ai ma lana galu teine. E foliga mai e na o le pau lena o tagata o lo o faafoeina le aoga. Ae o le manaoga lava, o le pulega a alii ma faipule, o tamalii ma failauga, o le aufaigaluega a le Atua e mautu ma lelei ai se mea.

O le siitaga o totonu, ia faafetai lava i finagalo na afea le vaega lea, ae o le auga lena o faigamea. Aua o le uiga lea o tagata faigaluega, e galue ma lona faanaunautai ia lelei faamanuiaga na te maua. Peitai lau afioga i le fofoga Fetalai ma le mamalu o le tatou usugafono. I le Malo lava ia, e i ai lava ana faiga faavae e totonu ai tagata. Ae o totonu foi o le Matagaluega o Aoga e i ai mea ausia, e tataua ona fesoasoani ai e faatupe ai, ae taatia pea i le Tribunal o latou e faafoea lea faamoemoe.

E 5 Iunivesite o lo o fai paaga ma le tatou Iunivesite. O Otago i Niu Sila, o le Iunivesite mai Ausetalia, e i ai foi isi Iunivesite i nei i le Pasefika o lea e fai paaga ma le tatou Iunivesite. O lea foi tatou te molimauina toetiiti le asa se tausaga ma asiasi mai na Iunivesite e fai a latou sootaga ma latou fetuunaiga e le gata i mataupu ae o le faasoa i tomai, ma agavaa e faatino ai. O le taimi lenei o la foi ua galulue faatasi le tatou Iunivesite ma le APTC. E le gata o polokalame ae o le faaauauina o le galulue e kiliva atu le feau i tua i tatou alo ma fanau. E le gata i lena, a o totonu lava o le Iunivesite ia, o le toatele o faiaoga o le Iunivesite, o la e toe ave ai lava a latou pepa, e develop ai lo latou tomai, ia latou mataupu ma galuega o i ai. O la foi e tausolomua i faiaoga o le Iunivesite ona faia lena tulaga. Ia faafetai mo le finagalo na faailoa ae ou te iloa o lea ua maua e le Iunivesite ia fuafuaga lelei, aua le atinaeina o tomai, o faiaoga o le tatou Iunivesite.

O le lesitala o le Iunivesite, o le 5 lenei o tausaga e le i toe siia lava le totonuina o pili o le Iunivesite i le Semester 1, Semester 2. E faapena foi lana lesitala le sa i ai e \$322. Aepeitai o le tausaga lea na tea nei e 2022, na ali ae ai se finagalo i le pulega a le Iunivesite, ua silasila alofa i alo ma fanau, aemaise o matua i lo latou taupati mai e faaulu tamaitai i le

aoga ae ua utiuti le tamaoaiga ona o le tatou lockdown lea a i ai, i faamai ma le tele o... Ona i ai lea o le latou finagalo e faapea, o le \$322 lea e lesitala ai, o le a aumai na o se tupe e aoga mo le taimi lenei, a o le isi vaega e faaopoopo i le pili, faatoa pay mulimuli. O le mea lena o lea ua selau luasefulu lua \$122 ai le taimi lenei. O lona uiga, o le isi luaselau e faapaleni ai, o lea ua faaopoopo i le pili i le uma o le semester totogi loa. I le totogiina o pili, e 5 vaiaso talu ona ae le Iunivesite, faagata loa le totogina o pili. O lea foi ua faataatia mai se faamama-avega a le Pulega o le Iunivesite, o le umi pe o le 13 vaiaso, sefulufa loa fai latou suega, ua tuu mai lena avanoa umi e togitogi ai, pe o le a lava le tupe e mafai e le matua ona togitogi i le taimi lea, i luga o feutagaiga lelei a le matua ma le pulega a le Iunivesite. O lona uiga e le tuu faatalaloa faapea, ia faapea tatou faifaiaga lava o la ua... no. E afio atu le matua i uta i le Iunivesite, fai se lua faamatalaga lelei ma le pule o le Iunivesite ma fetuunai po o le a le auala e faigofie ai mo le matua ona totogi le pili. Afai e oo atu i le taimi o le a fai le faaiuga e le i totogi pe lei uma, Talofa e, e iu ina le avatua faaiuga o na faamoemoega na tigaina ai. Peitai o le agaga maualuga ma le loto faafetai, ua tele le avanoa lea e aumai e fesoasoani ai i matua. O le tulaga lena o lea e i ai nei le tatou Iunivesite.

**SUI FOFOGA FETALAI:** Se i fai mai foi se malologa a le afioga i le Minisita, se i tulai mai le Sui Taitai o le Itu Agai.

**Tofa Hon Laufo Fonotoe Nuafesili Pierre Laufo:** Fai sina malologa puupuu a le Minisita, o lea ua maua ma manino le faamalamalamaga o le resitala. Na faita lava ai o se faamamaavega, ae o lea la ua maua e le o se faamama avega o lea ua sifi atu le \$200 mai le \$322 e faaopoopo i le pili aoga. Ae o lona uiga, o la e i ai ma le \$100 tala lea ua sii ai le pili aoga, o le \$1900. O lea la luaafe luaselau, o lona uiga e luaselau, o lea e tauave, o le mea lea ua aumai i luma i le lesitala tuu i tua, ma le \$100 lea ua faaopoopo i ai ona 2200 ai lea. Ae faafetai o lena ua e saunoa i faiga faavae lea sa ou fesili po o a faiga faavae i le togitogiina pe maua se avanoa e togitogi ai ia tupe ia e fesoasoani ai i matua ma fanau aoga. Ae faafetai mo le faamalamalamaga o lea vaega.

**SUI FOFOGA FETALAI:** Tulai mai le afioga i le Minisita e faaauau le saunoaga. Se i onosai mai lava o lea e maua atu o lea e tulai mai le....

**Susuga Maulolo Tavita Aмоса (Sagaga 2):** Faafetai mo le avanoa lau afioga, o le mataupu sa laga manu e lei see ese lau afioga ma le tulaga lea. O le mea moni lava ia, ua tau faigata ona fai atu se fesili ona ua matagofie atili le taulaumea o lenei afiafi, i le fisaga o lou siufofoga ma ua lologo le Maota nei, i le manaia o lau saunoaga, semanu lava e laaloa la ta vaai i ai, i le mataupu lea na tele ai lava lau faafetai i le pulega o le Iunivesite. Ona ua faapau i lalo i le 38% le lesitala ao lea la faatoa maua i le aso, ona e i ai le siusiu o le mataupu lena sa ou laga. Pe



aisea na ala ai ua ala ai ona pau maualalo le aofai o tamaiti e faaulufale i lenei tausaga ae o lea na pau le lesitala? Pe le o le mea ua atili faigata ai ona ua faigata le pili lea. O le tatou galuega e fetuunai Muniao, faamalo faafetai i lau folamua i isi tulaga ia ua faafofoga i ai le Maota. Aemaise foi o lena o le a amata faaaoga a tatou upega fesootai po o le internet po o upega tafailagi po o website, social media ona e toafa lelei sui o le Maota lenei sa laga le mataupu lea. E matua momoli atu lau faafetai tele i lau afioga i le Minisita o Aoga e ala atu i le Fofoga Fetalai, ona ua maua atu ua i ai se tapenaga mo lea tulaga, e faaaoga i ai a tatou fesootaiga televavave. O le faafetai tele foi i le afioga i le Minisita ua mafai ona maua ia free internet, o se aoga tele lea mo a tatou aoaoga. Ae toe pau lava lea o si vaega lea e totoe. Pe le i tau ane lau afioga pe aisea ua pau maualalo ai e ua faaulu i le Iunivesite i lenei tausaga, ma le faaaloalo lava.

**SUI FOFOGA FETALAI:** Faafetai i le sui mamalu, ia tulai mai lau afioga i le Minisita e faauau lau saunoaga e tusa ai foi ma le finagalo faaalua o le sui usufono.

**Afioga Hon SEUULA IOANE:** Faafetai i le fesoasoani mai o le mamalu o le tatou usugafono i lenei vaega o le aso. Ou te momoli atu foi le faafetai tele i le afioga i le Sui Taitai e tusa ma le tumau pea o lona finagalo i lona manatu sa faailoa. Ae faafetai tele lava, aua o le mea lena o lea e tupu i le taimi lenei. E pei e foliga mai tatou te o i le upu faamama ae toe avega mulimuli, e ese lea ituaiga mea faapea e faamama le amataga.... avega... faamama avega, o lona uiga e mama i le amataga ae amo mulimuli, peitai faafetai i le faasoaa a lau afioga, o le a faataatia lea mataupu i le pulega, aumai foi sa latou fesoasoani e tusa o le mataupu ua tautalagia. E momoli atu le faafetai i lau afioga Maulolo, tulou ua faaaogaina lou suafa, mo le faamanatu e tusa foi i le tulaga ua taatia ai, ae pei ona ou fai atu i le taimi ua sola, matou te sulu figota atu i ina. O le tofa faaali ma le lagona ua faailoa, o le matuai aoga lava i le Ofisa o Aoga. E pei lava foi ona ou fai atu i le amataga, o le Matagaluega lenei, o le Matagaluega a tatou. O le tofa i ina ma se uta i lea pito, tuufaatasi ona maua lea o le ai mo Samoa. Ae faafetai tele lava. O le tausaga lea na tea nei, e 3,699 tamaiti na amata ai le Semester 1. E oo ane i le Semester 2, ua toe 3,039. E sao lelei lau Afioga, o le tele o le pau, e 600+. Ma o mea ia o lea ua maitauina, o le mea muamua, o isi tamaiti, na uma i le Semester 1 a latou pepa. O lona uiga, e le i toe ulufale i le Semester 2. O isi alo ma fanau, na le i mafai ona ausia le Semester 2 e ono resitala ai latou. O nisi alo ma fanau, na i ai foi nai vaega na tutupu ua le mafai ai ona maua e latou le lagona e toe ulufale ai. O nisi ua tapena e o i atunuu mamao, ia po ua faiaiga foi nisi. O ituaiga mafuaaga eseese na. Ae pei o le toatele lava o le... e manatua foi lau Afioga i le sui usufono, e tapena le tatou Semester 2, ua uma le faauuga muamua ia Aperila. O lona uiga ua tele tamaiti ua o ese ua faauu a latou pepa ia se i vagana ua i ai nisi tamaiti fou e toe faaulu i le Semester 2. Ae pei o nai vaega na ua mafua ai ona eseese tulaga,

aemaise foi e i ai foi lava le talitonuga, po o nisi foi lava tamaiti ua le mafai ona ausia le malosi o le pili, ia, po o le tele o nai luitau na, e aoga tele mo le pulega a le tatou Iunivesite e tilotilo i ai, po o a lava metotia ma ni faiga e mafai ona fesoasoani ai mo tatou.

Lau Afioga i le Fofoga Fetalai, e i ai si upu lea ou te fia faaaogaina i le taimi lenei, o le upu faapea, tietie mai, pe tietie atu. Sa i ai sina au malaga i se taimi o le tausaga lea na tea nei, ua ou te'i i se vaega o le taulaga sa ou i ai ae eueu lou tauau e se tagata, ou faliu atu, o se uo mamae lava ua leva ona ma valavala sa ma aoga i aso ia. Ia, ona talanoa lava lea ma faasoa. Fai mai lau tama ia te au, o lea ou te nofo i le fogafalelua, ma ua tolu ai nei au taavale. Ou fai atu, o, matua manaia la, viia le Alii. Toe sau loa ma le fesili, e te alu afea? Ou fai atu, ou te alu i le vaiaso lea. Fai mai, vaai la oe, tau mai lau numera, ou te tietie atu.

Lau Afioga i le Fofoga Fetalai, e uma lelei le masina, e le i tietie mai lava se isi. Lau Afioga, ou te faalogo e seasea afea le lotoifale faa-Minisita i ni manaoga faaitumalo, ae ua ou fiafia lava i lou faalogo mai sa tietie atu le Matagaluega e asi atu matou fale la e i Savaii ma asiasi i fale i Upolu. Ou te iloa, na pau lea o le auala e mafai ona fai e le Minisita e tilofia ai lona itumalo o le tietie atu, tietie mai.

Atonu ua iloa e le vaega lea na o atu i le aso Toonai i le matou itumalo po o le a sa latou faalogo i le auala o le matou itumalo. Ou te le fai atu la, o le mea sili lava o lea ua outou tietie atu. Lau Afioga i le Fofoga Fetalai...

**SUI FOFOGA FETALAI:** E talu ai o lea ua tatou taunuu i le taimi o le tatou malologa, ou te vaelupeina le saunoaga a lau Afioga i le Minisita i tietiega o lenei afiafi o Taaloga ma Aganuu, ou te faamalulu atu o le a maua le avanoa o lau Afioga e te saunoa ai pe a toe taliu mai i le tatou malologa.

Ou te faasilasila atu ua faataatiaese nei taualumaga a le Fono Aoao Faitulafono mo lana malologa o le afiafi.

*Na faataatiaese Taualumaga a le Fono Aoao mo lana malologa i le itula e 7:15 i le po ma toe faaauau i le itula e 8:00 i le po.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2022/2023.*

**FOFOGA FETALAI:** Ou te faasilasila atu ua toe amatalia nei Taualumaga o le Fono Aoao Faitulafono.

Faamalo le onosai i le tatou Maota i le taumafaiga o le tatou galuega. E i ai le manatu ua maua foi se faasiligamalosi i le malologa sa feagai ai e faamaea ai tatou Taualumaga i lenei afiafi.

E faataatiaese tatou galuega mo le malologa o lo o saunoa le Afioga i le Minisita o Aoga, Taaloga ma Aganuu. O lea ou te tapa ma le faaaloalo lau Afioga tulai mai e faaauau lau saunoaga.

**Susuga Hon Laauli Leuatea Polataivao Fosi:** Lau Afioga i le Fofoga Fetalai...

**FOFOGA FETALAI:** Ia malie lau Afioga i le Minisita o Aoga se i tulai mai le Afioga i le Minisita o Faatoaga ma Faiga Faiva.

Lau Afioga i le Minisita.

**Susuga Hon Laauli Leuatea Polataivao Fosi:** Faafetai mo le avanoa. E toe faatalofa atu i le afio mai o lau Afioga i le Fofoga Fetalai, e faamalo atu foi i le Afioga i le Sui Fofoga Fetalai ona o le tauaveina o le lua galuega tausoa. Ua matau o lea o le a faaiuiu le saunoaga a le Afioga i le Minisita ua agai e asiasia manaoga o lona itumalo. Ae i ai lava si mataupu lea ua ou manatu e tatau pea ona logona le faafofoga a Samoa aemaise foi o le tatou Maota nei... a le Minisita o Fesootaiga, sa ia taua ai le tulaga lea o tatou fesoasoani ma le faamama-avega o lea ua ave mo aoga i le tatou initaneti fua. A o lea ua oo mai le Afioga i le Minisita o Aoga, o ia tonu lava na te faafoefoeina le polokalame lea. Sa i ai se tuuaiga tuga tele i le poloketi lenei, e faapea o mea nei o initaneti ma free WiFi a tamaiti, e o ai tamaiti e matamata i luga o ata faaletonu. Ua ou manatu lau Afioga i le Minisita, leaga e le faigofie foi tatou finauga sa tatou finau ai mai lena taimi. Ae ona o lea ua saunoa le Afioga i le Minisita mo Fesootaiga ua maea le poloketi, ua ola lelei mo alo ma fanau a le atunuu ae toe ola fua foi, o lea ua fai atu lava lau fesili ma lou agaga faaaloalo i lau Afioga i le Minisita, pe mata e faamaonia tuuaiga nei sa saunoa i ai se tasi o sui usufono ua tatou le toe mafuta, o i ai ni tulaga o oo ai tatou alo ma fanau i le tulaga lea o le o i luga o upega tafailagi le lelei ia. Ua ou manatu o se taimi lelei lenei o lea ua uma le poloketi, ae saunoa mai lau Afioga i le Minisita pe faamata o i ai ni mea faapena o tutupu i totonu o lau Matagaluega. O lau fesili lea ma le agaga faaaloalo.

**FOFOGA FETALAI:** Malo faafetai i lau Afioga i le Minisita o Faatoaga ma Faiga Faiva. Ia atonu e taua foi lea mataupu mo le faafofoga mai a lau Afioga i le Minisita, meamanu lava o lea e te i lau Matagaluega. Ia ma le agaga faaaloalo, tulai mai lau Afioga i le Minisita.

**Afioga Hon SEUULA IOANE:** Lau Afioga i le Fofoga o le Fono, ou te faaluaina le saunoaga a le Minisita o Faatoaga ma Faiga Faiva, e faafeiloai atu ai le afio mai o lau Afioga e toe faaauau ou tiute ma ou tofi i le tauaveina o le tatou fonotaga. Faafetai o lea ua paleauau le taliga o le sua ua tatou faasoaina foi le alofa o le Atua e ala i le tausiga o le tino ina ia maua pea le malologa ma le malosi. Ia, ou te manatu e le o toe umi foi se taimi e faaaogaina mo lenei Matagaluega, ae ona ua

fesiligia le Afioga i le Minisita, ia, e taumafai atu ai sina faamatalaga puupuu.

I le taimi na amata ai ona faatulai tatou WiFi ia, o le tele o aoga sa valaau mai le konekarate ou te alu atu, ia ona matou taumulimuli lava lea i le faaolaina, ia ma text uma upu ia pe mafai ona tali mai le WiFi ma le internet. Ma ua uma ona screen off uma mea uma, e leai se gagana tau lualuagia e ono afaina ai le matamata a tamaiti o lo o i ai i totonu o le polokalame lea. Ia ma le isi foi tulaga lau Afioga, e uma loa o tamaiti i le fale. O le tatou faamoemoe lava, ia active lava i totonu o le faleaoga, a o i ai faiaoga po o nisi foi o matua e mafai ona taitoaluaina alo ma fanau. O le faamoemoe la, ina ia tatou aloaloese lava mai tulaga ia tatou te popole ma atugalu i ai. E pei o se tali atu lea i le faafesili mai a le Afioga i le Minisita.

Ia, ona faaiu lea o se faamatalaga i lau Afioga i le Fofoga Fetalai, na o se tuualalo a lenei Matagaluega, e toagaogao le aufaigaluega, ma o le tele o taimi e alu lo latou taimi i totonu o potu aoga, e seasea maua se avanoa e asiasi atu ai i tua. Ae i ai lo matou talitonuga, so o se itumalo, o lo o i ai sui o le tatou Maota, o lo o i ai le aufaigaluega.

Ia, ona avatu ai lea o se upu pei ona afea i lenei afaifi, faamolemole, se i tietie ane e silasila i tatou aoga, aua o le tatou i ai, e mafai ai ona maua mai le tali sao o mea ia tatou te manana oi ai. Fai mai le isi tama ia te au, faasino i lau taavale aua o lau taavale e mumu lau Afioga i le Fofoga Fetalai, fai mai, o le taavale lea o lea e tele ai tupe a le Ofisa o Vaa. O lona uiga, ou te alu i Savaii i le aso Faraile po o le aso Toonai, ou toe sau i Apia i le aso Gafua po o le aso Sa. O lea ou te tautala i le upu o le tietie atu ma le tietie mai, o lau mea lena o lea e fai, tietie i Savaii, tietie mai, tietie i Savaii, tietie mai. O le tele lava la o au tietiega, matou te le feiloai ai ma toeaiina o le matou itumalo, ae o la e ua ou tilotilo atu lava i mea la e manaomia.

Ia, lau Afioga i le Fofoga Fetalai, ia faagata ai ia i lea faamatalaga, a o lau augani i le vasega o Minisita, faamolemole, se i tietie atu, ia ona outou silafia lea o manaoga o lenei itumalo.

O le Alataua Sisifo, e tolu nuu, o Falelima, Neiafu ma Tufutafoe. E afio ai Aiga, e i ai tupu ma ee o le itumalo, e i ai foi totooouli o le itumalo ma ona malaefono. Ia, e le o sau mea lena e fai o le faamalau atu ia outou, a o le mea lena a outou e fai o le lalau mai ia te au. A o lou itumalo, ia lena tou te silafia tala i lou itumalo. A fia fai se tofiga fou, logo atu lo matou itumalo.

Ia, lau Afioga i le Fofoga Fetalai, ia foai le Atua manatu i lou finagalo, ia taitaiina lenei Fonotaga mamalu i le alofa ma le agalelei o le Atua.

Lena itu o le malu i le afio o lau Afioga i le Sui Taitai o le Itu Agai, aemaise foi o sui usufono uma, e matou te momoli atu le faamalo ma le faafetai. O la outou faasoa ua faatamaoigaina ai lenei Matagaluega. Ia, e faapena foi i lenei itu o le malu, lau Afioga i le Sui Palemia ma le mamalu o le Aiga Kapeneta, a outou Afioga i Minisita Lagolago, faafetai tele mo le faamoemoe o le Matagaluega o Aoga.

Le mamalu o lau Afioga i le Failautusi ma lou Ofisa, faafetai mo le tauavameaina o le fonotaga. Le mamalu i le paia i le nofo a Faatonu Sili

ma Pulega o tatou Matagaluega eseese, ia alofagia e le Atua o outou faiva. Ia agalelei le Atua i le fonotaga a Samoa. Faafetai.

**FOFOGA FETALAI:** Ua faamalo malele, malo foi sausaunoa i lau Afioga i le Minisita o Aoga, Taaloga ma Aganuu. E talitonu o lea ua saunoa manino foi i nisi o mataupu sa laga e le tatou Maota, malo faafetai malo lava tapena, faafetai foi mo le faaso aua foi nisi o mataupu taua sa lagalaga i saunoaga a sui usufono mamalu o le Maota. O le mea lea, ia malo faafetai, ia manuia lau Matagaluega i fuafuaga uma mo le agai i luma.

Ia, o lea ua oo mai le tatou faasologa i lau Afioga i le Minisita o Faamasinoga ma Pulega Tau Faamasinoga. Ia tulai maia lau Afioga i le Minisita.

**Tofa Hon MATAMUA SEUMANU VASATI SILI PULUFANA (Minisita mo Faamasinoga ma Pulega Tau Faamasinoga):** Ia, e muamua ona ou faafetai mo lou avanoa. Ae faatalofa i lau Afioga i le Fofoga Fetalai ma le mamalu o sui usufono uma o le Fono Aoaofaitulafono. Malo le soifua. Afio lau Afioga i le Sui Palemia ma Afioga i Minisita o le Kapeneta, malo afua ailao ua maua i le alofa ma le agalelei o lo tatou Atua.

Afio foi lau Afoga i le Sui Taitai o le Itu Agai ma lenei Itu, malo le soifua. E faatalofa i le tapuaiga a le Afioga i le Ao Mamalu o le Malo ma lau Masiofo. E faatalofa atu foi i le Afioga i le Sui o le Fono a Sui Tofia ma lou faletua.

E faatalofa i le aufaigaluega tofoti a le Atua o lo o faanonomanu aua se manuia o Samoa. Talofa lava. E faatalofa foi i Ofisa Sili o Pulega o Matagaluega a le Malo ma Pule Sili o Kamupani ua tatou auai faatasi.

E faatulou i le paia i le usoga a Pule ma Tumua, Itua ma Alataua, Aiga i le Tai ma le Vaa o Fonoti. Tama ma o latou Aiga, Aiga ma latou Tama, tulou, tulouna lava.

E faatulou foi i le paia ia Sua ma le Vaifanua, Fofa ma Aitulagi, Saole ma Saleaamua ma le Launiu na Saelua, Faatuiolemotu Tama a le Manuatele ma Tootoo o le Faleula, tulou.

O paia na o Samoa mai le taisamasama o le Tuimanua seia paia le fafa o Saualii. Ia, nuunuu atu laia faatini o tausala, aua o paia lava mai le vavau e oo i le faavavau.

Ia, e faatalofa faapitoa i si ou itumalo o Faasaleleaga 1, Salelologa ma Tafua. Ia, o outou paia ma outou sa ma faiga, e tumau lava mai le vavau seia oo atu i le faavavau. Ae momoli atu le agaga faafetai, ona e le i afea lava lenei Matagaluega i ni fesili. Faafetai faamamaavega mai, ae momoli atu lau faafetai tele i le Afioga i le Tamaitai Minisita o Tupe mo le tapenaga o le Tala Faaopoopo Muamua o le Tupe mo le tausaga faaletupe 2022/2023. Malo le tapena.

Ae mo le silafia e le tatou Palemene, o vaegatupe ua fetuunai nei po ua faapitoa mo lenei Matagaluega o Faamasinoga, e le i tagisa i se tupe faasili, ae o tupe faasao, savings i totonu o vaegatupe eseese o le Matagaluega, o lea ua toe fetuunai, ina ia faatupeina ai le backup server

mo le Matagaluega e fesoasoani i le faamaumauina o le lelei faifaiepa o auaunaga faatekonolosi.

Ia, o lea e toe momoli atu ai foi le isi faafetai i le tamaitai po o le Afioga i le Tamaitai Minisita o Tupe mo le faasoa limalelei, aemaise o le taliaina mai o le toe fetuunaiga o vaegatupe faasao a lenei Matagaluega. Faafetai tele.

E momoli ai foi lau faamalo ma le faafetai i le Pulega ma le Matagaluega ona o lenei galuega taua ua fesoasoani ma faamamaavega ai i le Malo. Faafetai foi i le tamaitai Loia Sili faapea Ofisa Sili o Pulega o Matagaluega uma ua tatou mafuta faapea le latou lagolagosua i galuega faa-Minisita.

E faafetai foi i le Matagaluega a le Fono mo le faatinoina o latou galuega ma tofi ma tiute ua mafai ai ona sololelei la tatou nei Fonotaga.

Ia, ae le i faaiu atu se faamatalaga, ou te fia faailoa atu ma le agaga faafetai se tala fiafia mo le Palemene aemaise le faafofogaaga a Samoa. O lea ua amatalia le faatinoina o galuega a le Faamasinoga i le vaega o Fanua ma Suafa, o lea ua amata ona faatinoina. Ma e momoli atu ai le agaga faafetai i le Palemene ona o le tou pitolaau sa faatinoina lie la tausaga ua mavae atu o la outou pule lea o lea ua mafai ai ona faatinoina ma toe faagasolo galuega a lenei matagaluega aemaise lie vaega o Faamasinoga o Fanua... agalelei le Atua i lau afioga lie fofoga fetalai foi le malosi lie tino le mafaufau ae faasilisili aua le feagai ai ma lou valaauina faapea foi le mamalu o le palemene nei tumau lie onosai ma le faapalepale aua le faafoeina o le fono usu a Samoa ma lou faaaloalo lava soifua.

**FOFOGA FETALAI:** Malo saunoa lau afioga lie minisita o Faamasinoga ma Pulega o tatou Faamasinoga , taua foi lenei afiafi o lea ua faailoa mai le amatalia o tatou faamasinoga o Fanua ma Suafa atonu tasi lea vaega taua o lea sa toa ao lea ua faailoa mai lau afioga o lea ua toe amatalia taualumaga ona e fai a si tele o mataupu o le atunuu i tatou faamasinoga o Fanua ma Suafa o le mea lea malo faafetai , faamalo foi galue i lau afioga lie Minisita faapea foi Ofisa Sili o le Pulega o Faamasinoga ma tapenaga o le tatou faamasinoga malo lava saunoa atonu o lea ua oo mai le tatou faasolog alau afioga lie Minisita o Tupe oute iloa foi lea iai nisi vaega o lea i lalo le vaaiga a lau afioga nisi o matagaluega atonu o le avanoa lea lau afioga e te saunoa foi ma faasoa foi i ni mataupu sa lagalaga e le tatou maota male agaga faaaloalo.

**Afioga Hon MULIPOLA ANAROSA ALE MOLIOO:** Faafetai lau afioga lie fofoga fetalai o le maota , ou te faafeiloai foi lie afioga le Palemia talitonu o loo maua mai le fonotaga a Samoa i lenei foi tau afiafi talitonu foi ua taugagaifo le la i lona tau afiafi ua fotuai foi le pogisa ao galulue pea lau palemene e ala i tiute ma faiva ma le valaauina aemaise ai le auga o aute le faatalanoaina o le tala faaopopo faatatau o le tupe e pei ona tauavameaina lie maota fono Salamo 103 lo'u agaga e ia e faamanu atu lie Alii o meauma foi o i totonu ia te au ia faamanu i lona suafa paia lo'u agaga e ia e faamanu atu lie Alii aua foi

nei galo se mea tasi o ana mealofa o se lagona lena lau afioga lie fofoga fetalai faapea le maota palemene i lenei afiafi tautomanatu ai lie ola ma tupu ae i totonu o le tatou atunuu e lagona a le agaga faafetai ona o le tatou atunuu e filemu e saoloto e iai le aiga e iai le auai e iai le aiga potopoto e iai le aganuu e faavae lie Atua e iai lana faakerisiano o le taua lea o le agaga vivii ae i lenei tauafiafi ona e tomanatu e lei faigofie le tauasa mai o Samoa lie 60 tausaga lea ua tatou patipatia i lenei tausaga le 60 tausaga talu ona tu toatasi Samoa e lagona le agaga faafetai i saunoaga ma fetalaiga o le tatou maota agai i le tatou tamaoaiga e lasi manao e le uma le manao ae laititi le tamaoaiga ma o le tagata soifua e manao pea , e manao pea e manao pea e faamalie lona manao lea lava na matau atu ma le totofa tofu saunoa lava finagalo ma manatu a le tatou maota fono lie tamaoaiga o Samoa ma oute fiafia oute tautala i lona aotelega lau afioga lie fofoga fetalai e faamauina le agaga faafetai ona o le toatele o sui mamalu na faaleoina le latou lagolagoina o le tala faatatau faaopopo muamua o le tupe mo le tausaga faaletupe o loo faagasolo nei 2022/2023 e faafetai ai i la outou tofa fetalai aemaise ai le lagolagosua o le komiti faalepalemene mo tupe alu ma tupe maua lea na gafa ma le iloiloina o lenei tala faatatau faaopopo muamua talitonu o le manino o la outou lipoti ua faafaigofie ai la matou pitolaau ae lei taumafai atu lou sui usufono e tali nisi o fesili poo atugaluga na tuuina mai e talitonu le lagona ua matagofie lenei laolao e tuuina atu ai sina oototoga lie tulaga o loo iai nei le tamaoaiga o si tatou atunuu e tusa ai ma faamaumauga lata mai o le tamaoaiga o le GDP e tusa ma le \$1.88 piliona le aotelega o le tamaoaiga sa faamauina mo le 12 masina e tau mai ia Setema 2022 o lenei aotelega e tusa ma le 4.2% e pau ai pea faatusa lie 12 masina i ona tua atu sa faamauina ia Setema 2021 lau afioga lie fofoga fetalai e iu i lea tulaga ou te fiafia e faailoa atu o le kuata lea e amata mai ia Iulai 2022 e tau lie faaiuga o Setema 2022 poo mle 3 masina muamua lenei tausaga faaletupe sa faamauina le faatupulaia o le tamaoaiga a si o tatou atunuu le tusa lea ma le 4.7% ma ua faamauina ai le kuata muamua le siitia ai ole tamaoaig ai o le atunuu talu mai le 3 masina o le kuata faaiuina ia Mati 2021 o vaega maoti o le tamaoaiga na unaia lenei siitaga e aofia pisinisi laiti fefaatauaiga , felauaiga aemaise foi le vaega maoti mo tagata tafafao mai fafo e aofia ai faletalimalo ma faleaiga lau afioga lie fofoga fetalai o loo faamaonia i nei faamaumauga le amata ona toe toe fotuai mai o le tamaoaiga talu ona toe tatala a tatou tuaoi faavaomalo lie masina o Aukuso 2022 faatasi ai ma polokalame mo le faamanatuina o le 60 tausaga talu ona tu toatasi lo tatou atunuu o tulaga tau tupe faamomoli poo remittances sa faamauina lie uluai 4 masina o lenei tausaga faaletupe amata mai ia Iulai e oo atu ia Oketopa 2022 na matauina ai le siitia i le 287.15 miliona e tusa lea ma le 23.1% pea faatusa lie 233 miliona sa iai lie tausaga i tua atu o le tele o nei tupe faamomoli e tauaala mai i aiga ma uo mo faalavelave ma isi fuafuaga faaleaiga o tulaga tau fefaatauaiga na matauina ai le siitia ai o tatou oloa auina atu i fafo lie 107% ma faamauina lie 43.18 miliona mo masina muamua e 4 o lenei tausaga faaletupe 2022/2023 o lenei siitaga na unaia tele ai le tulaga sa iai le

faatauina o ia faatauina atu i fafo faatasi ai ma le suauu popo ma o loo atagia ai le toe tatala o tatou ogasami ma auaunaga i luga o uafu o tupe totogi ma oloa faatauina mai atunuu i fafo na siitia foi lie 56% ma faamauina lie \$419.96 miliona e pei ona silafia e sui mamalu o le tele lava o lenei aofaiga e patino le faatauina mai o le suauu mai atunuu o loo gaosiga lenei punaoa ma o le mafuaaga tele lea e faasilia ai lava tatou tupe alu i atunuu i fafo nai lo tatou tupe maua mai i oloa faatauina atu i atunuu mamao poo le tatou trade defisit lau afioga lie fofoga fetalai lie maea ai ole kuata muamua o lenei tausaga faaletupe poo le 3 masina muamua amata mai ia Iulai e tau ia Setema 2022 sa faamauina ai le aofaiga o tagata tafafao mai fafo e tusa ma le 14,358 o tupe faaalu mai tagata nei sa faamauina e tusa ma le 3 afe a le tagata e toatasi na tului i le tatou tamaoaiga poo le \$40 miliona mo le piriota sa iloiloina . Tupe faaleoleo o tupe faaleoleo poo tupe faaagaga mo fefaatauaiga a le tatou atunuu sa faamauina lie faaiuga o Oketopa 2022 e tusa ma le \$785 miliona o lona uiga o lea mafai e Samoa ona faauau ana fefaatauaiga masani aua manaoga o le atunuu mo masina e 9 pea tulai mai se tulaga faaletonu le tatou tamaoaiga lau afioga lie fofoga fetalai mo le silafia e le maota lenei o lea ua i fanua le vaega international monetary fund poo le IMF e faatinoina le tatou annual economic surveillance o lenei galuega e patino lava lie suesueina male iloiloina o le taunuuga o galuega ma matafaioi o itu tino uma o loo galulue aua le tamaoaiga o Samoa o nei itu tino e aofia ai matagaluega ma faalapotopotoga a le malo faletupe ma tulaga i fefaatauaiga o tu'pe vaega tumaoti aemaise foi ia tatou civil society lie maea ai o lenei faatalataloanoaga o lea tuuina mai ai se ripoti lie latou silasila lie tamaoaiga o Samoa e le gata i lea ao le tulaga i fautuaga mo le malo o Samoa i auala ma metotia e fesoasoani e siitia ai le auaunaga ma atinae e ona mafai pona faatupulaia ai le tamaoaiga o Samoa mo le lumanai lau afioga lie fofoga fetalai i tulaga tau tupe o le malo e 325 miliona tupe aoina mai lafoga sa mafai ona faamauina lie faaiuga o Tesema 2022 o tupe maua ese mai lafoga aoina mai i auaunaga masani a le malo sa faamauina lie 36 miliona i lona aotelega i tupe maua masani a le malo na faamauina e tusa ma le 361 miliona o tupe alu a le malo faamauina lie faaiuga o Tesema 2022 e tusa male 373 miliona ma o loo aofia ai le faatinoina o polokalame ma faiga faavae a le malo faatasi ma le faamanatuina o le 60 tausaga o le tatou tutoatasi faamaeaina o fesoasoani faamamavega o le malo ma nisi o atinae tetele e aofia ai le faaleleia o auala lau afioga lie fofoga fetalai e pei ona silafia e le palemene mamalu e tusa ma le 880 miliona le vaega tupe o loo faaagaga mo polokalame ma atinae o le malo e faatupeina mai ana lava ia tupe maua current daily mai lenei aotelega e 726 miliona e patino i polokalame o tupe alu a Matagaluega ma Faalapotopotoga a le Malo ma o le 48% poo le 35.3 miliona o loo faaagaga mo totogi o tagata faigaluega o le malo e aofia ai totogi ma tagata faigaluega i faalapotopotoga a le malo poo le public beneficial... totogi o alauni eseese o loo agavaa ai le aufaigaluega mo penefiti lie maea ai o konekarate o le pulega , alauni ma komiti eseese o loo fautuaina ai



atinae ma polokalame a le Malo e leo aofia i lenei aotelega totogi mo tulaga taualoa e pei o le kapeneta sui faipule ma le faamasinoga ole tulaga i teugatupe a le malo ne galueaina ai ana auaunaga ma polokalame i aso tai tasi e tusa male 48.8 miliona le aofaiga o vaega tupe o loo teuina i teugatupe poo bank accounts e 17 i faletupe eseese i totonu o Samoa e leo aofia ai ia teugatupe poo bank accounts mo poloketi ma atinae o loo faatupeina e a tatou paaga masani o le atinae faatasi ai ma teugatupe faavaitaimi a le malo ole aotelega o aitalafu a le malo poo public debts o loo faamauina lie \$911.2 miliona lie faaiuga o Setema 2022 ma o se tuuititiga lea e tusa male 9% pea faatusa lie 1 pilion sa faamauina lie faaiuga o Setema 2021 lau afioga lie fofoga fetalai e ui i tulaga lelei ua taua ma faamauina ai le amatalia o le toe sologa lelei o le faatupulaia o le tamaoaiga pea fua i faamaumauga mo le kuata muamua o lenei tausaga faaletupe o loo lamatia pea lie siitia o tau o oloa poo le inflation lea sa faamauina lie faatupulaia lie 11% lie faaiuga o Novema 2022 o le siisii pea ole tau po le soifuaga e pei ona silafia e afua mai lie faatupulaia pea o le tau o le suauu faatasi ai ma le tau o oloa taumafa o loo auina mai fafo lea e faamoemoe tele ai si o tatou atunuu o nei tulaga ua ala ai ona taumafai le malo e faaoga le tala faatatau faaopopo mo le tupe 2022/2023 e auina atu ni faiga faavae tau tupe e faamamaavega ai lie tatou atunuu , lau afioga lie fofoga fetalai e pei ona silafia ma taua foi e nisi o sui mamalu o nei faiga faavae e pei ona faailoa atu o le faamoemoe lava ia ina faatino faatasi ma faiga faavae sa faamaonia lie tala faatatau autu o le tupe e aofia ai le uluai seleselega ina ia faatupulaia pea fua o faaeleleaga i totonu o le atunuu e sui ai oloa taumafa taugata mai atunuu i fafo e le gata i lea o loo faamatuu atu vaega tupe ma fesoasoani pisinisi laiti ma pisinisi tau faletalimalo ina ia mafai ona atinae atili nei alamanuia aua le toe faafaigaluegaina o o tatou tagata a Nuu ma maua ai ni alatupe mo latou aiga lau afioga lie fofoga fetalai e fia tuuina atu foi se tala tuu lata ina mai lie faatinoina o nei fesoasoani o loo galulue soosoo tauau ai Matagaluega a le Malo le vaega Tumaoti faalapotopotoga eseese faatasi ai ma Nuu ma afioaga e tusa male 2017 tagata nuu e iai aafiaga tumau o le soifua ua faamauina nei lie lisi o tagata e agavaa mo lenei fesoasoani o le malo ia masina tai tasi ma o le aso ananafi aso gafua aso 23 Ianuari lea sa faamatuu atu ai le fesoasoani masani a le malo mo le masina o Ianuari 2023 e 160 faletalimalo ma pisinisi tau turisi e aofia ai ma beach fale sa faamanuia lie fesoasoani a le malo lea sa amatalia lie tausaga faaletupe ua tuanai ma o lea sa faamaeaina ia Tesema 2022 sei vagana ai nisi o pisinisi o loo talia pea latou lipoti mo le faaaogaina o le tupe e 138 fale talimalo 8 ofisa malaga ma pisinisi tau mataaga poo tour raiders sa tauaaoina foi lenei fesoasoani le taimi lenei ua tapena le Matagaluega o Tupe ma le Pulea o tagata tafafao maimoa mai fafo le faamatuuina atu o le fesoasoani e 2.5 miliona mo le tausaga faaletupe lenei o le fesoasoani mo pisinisi lea sa faatinoina e le Matagaluega o pisinisi alamanuia ma leipa mai le tausaga ua mavae ua faamaeaina ia Setema 2022 sa faamanuiaina ai ia pisinisi e 4172 o le fesoasoani mo le tausaga faaletupe lenei o loo faatinoina e le Samoa Business Hub e tusa

ma le 262 pisinisi laiti ua faamaonia pe ua tauaaoina foi lenei fesoasoani i le taimi lenei o loo faauauina pea lenei fesoasoani ma o loo faagasolo foi le tuuina atu o le fesoasoani tau nonogatupe e mama aiaiga e tauala i le faletupe o atinae o Samoa mo le au fai pisinisi e manaomia lea fesoasoani lau afioga lie fofoga fetalai e toaititi lava nai mataupu sa afea e leo nei sui faatasi ai ma le Matagaluega ma o le a ou taumafai e faamanino atu nei tulaga sa muai laga e isi sui e le sui mai Aleipata itupa i luga pe aisea ua nao ni nai masina o lea faatino ai le faamamavega o se faasiliga mo penisione mo tagata matutua faatasi ai ma fesoasoani mo tagata a nuu o loo iai aafiaga tumau o le soifua na fesiligia foi lenei tulaga e sui mamalu mai Faasaleleaga Nu 05 faatasi ai ma le sui mamalu mai Falelatai ma Samatau o le vaega muamua o lenei faamamaavega o loo faatupeina lea mai le fesoasoani tuu sao mai e le malo o Ausetalia e pei ona aofia i totonu o le tala faatatau faaopopo muamua lenei ole tala ole tupe ao lenei fesoasoani e faamatuuina mai lie faaiuga le masina o Mati 2023 ma ua ala ai ona taatia le faatinoga o lenei faamamavega le kuata mulimuli o le tausaga faaletupe lenei e faatinoina le faaopopoga o le tai 50 mo le disability benefit ia Aperila ma Me 2023 ae faatinoina le faaopopoga lie tai \$50 mo le penisione mo tagata matutua ia Aperila , Me ma Iuni 2023 o le tuualalo mo le faaauauina pea o lenei fesoasoani ua faamauina e le Matagaluega o Tupe ae faailoa atu o le faaauauina poo le le faaauauina foi o lenei fesoasoani olea fua lava i luga o tupe maua masani o le malo aemaise ai galuega ma atinae o le a ave iai le faamuamua mo le tausaga faaletupe o loo lumanai nei na fesiligia e nisi o sui mamalu pe faafefea ona mataitu le vaega tupe 500 afe lea na faamatuuina atu le toomaga mo e puapuagatia ona e le ose matagaluega a le malo e tele lava faalapotopotoga tumaoti poo NGO's e tuuina atu iai e le malo seleni mai lana tala lie tupe e faatino ai galuega e fesoasoani mai ai lie atinaeina o Samoa i ona vaega eseese e aofia le fofo o le faafitauli o le domestic balance e pei ona iai Samoa ona e tele le aafiaga i luga o le saogalemu o tatou tagata nuu aemaise le siosiomaga filemu o le Samoa mo le silafia e le sui mamalu o polokalame sa faatinoina SVSG poo le toomaga mo e puapuagatia e faaaogaina ai nei vaega tupe ona fua lea i luga o le faataatiaga o galuega faatino lea sa autasi iai le toomaga ma le malo o Samoa e tusa ai ma le maliliega na sainia ia Aperila 2021 poo le funding agreement i lalo o lenei maliliega o loo faamalosi ai le lipoti mai o le toomaga i masina taitasi lefaatinoina o polokalame aemaise ai ole faaaogaina o vaega tupe o le faamatuuina atu foi o lenei vaega tupe sa ave auauai e fua i luga o le ausia o tuutuuga o le maliliega o le 200 afe mulimuli mo lenei fesoasoani sa tuuina atu ia Novema 2022 le maea ai o le iloiloina o lipoti mo masinao aperila e oo atu ia oketopa 2022 ma o le aso 23 Ianuari 2023 sa tapunia aloaia ai lenei polokalame i se sauniga faapitoa o se tasi foi o aiaiga o lenei fesoasoani o le tapenaina o le lipoti mulimuli o loo maioio mai ai le atoaga o le faatinoga o galuega o le toomaga o le faaaogaina o vaega tupe faatasi ai male tulaga e tatau ona maea le sueina o faamatalaga tau tupe e se ofisa sue tusi aloaia lau afioga lie fofoga fetalai o nisi nei o galuega na aofia

lie maliliega lie va o o le malo o Samoa ma le toomaga ma o loo faatinoina lie taimi lenei.

1. Toe faaleleia le nofoaga o loo faatinoina ai le faatalatalanoaga ma e o loo aafia i sauaga counselling faatasi ai ma le tuufaatasia ma le faaleleia o lea auaunaga ma tulaga tau tulafono.
2. Polokalame mo Nuu ma alalafaga ma aoga o nei polokalame o loo agai tonu lea i ulu o aiga poo tama i totonu o Nuu faatasi ai ma polokalame i totonu o aoga.
3. Fesoasoani mo fale apitaga o loo faanonofu ai e o saili toomaga pe sulu fai atu lie SVSG mo se fesoasoani
4. Maketi mo poloakalame nofotane faatasi ai ma polokalame faatalatalanoa ma autalavou aemaise aumaga poo le malosi o le Nuu
5. Fesoasoani mo le fanau o loo faatau savali oloa lie taulaga , o lenei fesoasoani ua mafai ai ona totogi ai pili aiga ma meaoga mo le 40 o nei fanau.

Lau afioga i le Fofoga Fetalai e pei ona toe tomanatu o le aotelega o le vaegatupe sa faatatauina mo le foia o sauaga i Tina ma Tamaitai lie tausaga 2021/2022 e tusa lea male 1 miliona tala e 500 afe sa tuuina atu lie SVSG e pei ona ou taua ae o le isi vaega sa faatinoina ai polokamalame mo laupapa faalauiloa a le itumalo ma faamatuina atu lie tele o isi faalapotopotoga tumaoti e 11 aua lava le taumafai e faalauiloa ma tuuitia lenei faafitauli i totonu o si tatou atunuu sa faaleoia foi se tuualalo mai nisi o sui mamalu e faasaga lea i nisi fesoasoani ole malo aua le tali atu lie tau o le soifuaga e pei ona silafia na folasia faatasi i le Maota mamalu lenei i le Tala Faatatau Faaopoopo Muamua o le Tupe ma teuteuga o Tulafono mo tiute ma lafoga i luga o le lisi o oloa auina mai fafo lea o lo o faaigoaina o le tusi... na aofia i nei tuutuuga le tele o nisi oloa ua tuuitia latou tiute, ma o se tasi lea o faiga faavae faamama avega a le Malo. E le gata i lea na aofia i lau lauga i le Tala Faatatau Faaopoopo muamua o le tupe se fesoasoani e tauala mai lea i le 2% e mai le Faalapotopotoga mai le Lumanai Manuia o Samoa po o le NPF, lea sa faamatu atoa atu i le mamalu o le aufaisaofaga i le Aso Gafua aso 23 o Ianuari 2023. Ae ua ave le faamuamua a le Malo ia i latou o lo o maaleale lo latou tamaoiga po o vulnerable groups, e aofia ai nai o tatou tagata matutua e ala atu i le faaopoopoina o le \$150 mo le penisione ma le faaopoopoga o le \$100, o tagatanuu o Samoa e i ai manaoga faapitoa e pei ona faailoa atu muamua.

Lau afioga i le Fofoga Fetalai, o le tuufaatasiga o nei faiga faavae, ua aofia uma ai masina e 6 o lo o totoe o le tausaga faaletupe lenei i fesoasoani a le Malo, e faaopoopo i luga o isi atinae ia polokalame ma galuega faaauau o lo o faatino pea, aua le mataituina o le tamaoiga ma le tau o le soifuaga. E pei ona tuuina atu i se faamatalaga i le taimi ua sola, e tele isi faiga faavae o lo o aofia i le Tala Autu o le tupe, ma o lo o faaauau lava, lona faatinoina.

Lau afioga i le Fofoga Fetalai, o lea sa fesiligia e Vaisigano 1, le tulaga mo pasi lea sa faaogaina i taaloga o le Pasefika. E faailoa atu i

le sui usufono mamalu aemaise le paia o le Palemene, o lo o Iloilo e le Kapeneta le tulaga i pasi o lo o totoe, i le maea ai o faatau tu'i sa faatinoina i le tausaga ua mavae, ma o le a faailoa atu i se taimi lata mai, se tali manino, talosaga a sui usufono mamalu.

Lau afioga i le Fofoga Fetalai ma le mamalu o le Palemene, na saunoa le sui mamalu mai Alataua i Sisifo i le tele o tupe le faaogaina mai Tala o le tupe i tausaga faaletupe taitasi, ae o lo o toatele fanau o lo o tausaili seleni e aoga ai. E pei ona silafia o se vaega tele o nei tupe totoe, e afua mai tupe totoe mai tupe faaagaga mo tagata faigaluega lea o lo o faaputuputu pe a faatinoina le faasalalauina o avanoa, recruitment and selection. O le tulaga lenei o lo o agai i ai le iloiloga ma le suesuega a le PSC lea sa laga e nisi o sui ma sa tali manino atua i le Sui Palemia, ma le sui Minisita o le PSC, ma o le a ou toe pai atu i ai. Mo le silafia e lau afioga ma sui mamalu, e tusa ma le 5.9 miliona se vaegatupe o lo o i totonu o le Tala Faatatau Autu o le tupe faaagaga lea mo sikolasipi a fanau a le atunuu; e ese mai lea i sikolasipi faatupeina e paaga masani mo atinae a le Malo. O sikolasipi masani mo fanau e iu mai i le UPY faatasi ai ma nisi o lo o manaomia le fesoasoani ma o lo o aotauina i le NUS e tusa ma le 3.2 miliona tala le vaegatupe o lo o i lalo o le tala o le tupe a le PSC. O lo o i ai foi vaegatupe e tusa ma le limaselau afe o lo o faaagaga i lalo o le tala o le tupe a le Matagaluega o tupe mo fanau aoga e le o ausia le pasene maualuga o sikolasipi, ae o lo o matauina pea le pasi o pepa, ae vaivai le tamaoiga. E 500,000 foi o lo o faaagaga i le Tala o le tupe o le Matagaluega o le Soifua Maloloina, mo sikolasipi o tausi soifua ma fomai. E 1.5 miliona o lo o faaagaga o lalo o le Matagaluega o Aoga mo le siitia lea o faailoga tusi pasi mo faiaoga, e faatasi ai ma le 170,000 o lo o i lalo o le Matagaluega o Pisinisi Alamanuia ma Leipa, aua aoga faa-Aperenetisi.

Lau afioga i le Fofoga Fetalai, e faatauaina tele atugaluga o le sui mamalu o Alataua i Sisifo, ma ou te talitonu o le a silasila totoa i ai le Matagaluega o Aoga ma le Komisi o tagata faigaluega a le Malo, ae ua na o le faapupula atili atu o tulaga o lo o i ai ia vaegatupe faaagaga mo sikolasipi e pei ona laga.

Lau afioga i le Fofoga Fetalai e i ai nisi o sui mamalu sa faagasoloina ma le tapena lelei o poloketi ina ia tuutiitia tulaga o lo o atagia i le Tala Faatatau o le tupe, o le tuai lea o le faatinoina. E pei ona silafia e sui mamalu, e soo se poloketi lava a le Malo e faatupeina mai fafo, e manaomia ona tapena lelei o se fuafuaga, procurement plan ma se implementation plan ina ia mafai ai ona faataatia lelei vaega taua uma ma fuafua lelei le vaitau faatasi ai, ma vaegatupe e manaomia e faatino ai. O le aoga o nei fuafuaga, e mafai ai ona iloa faafitauli e ono aliae mai, i le taimi e faatino ai, ma mafai ai ona foia ina ia maua lona atoaga lelei o le poloketi. O le tele o atinae tetele a le Malo e vaevaeina i le design, supervision, construction, implementation. Ma e fua lava i luga i le natura o le poloketi. O nei vaega tetele uma, e faasalalau mo le tauofo po o le tender mo le silafia e kamupani, mo le tuuina mai o tauofo. O le tender process mo so o se poloketi, o lo faamanino i

totonu o le procurement plan, e aofia ai le fuafuaina, faasalalauina iloilo ina tuuina atu ai i le konekarate, i le vaavaaiga lelei, ma le aso e faamaeaina ai.

Lau afioga i le Fofoga Fetalai, o le faatinoga o le tauofoga lea, e tele ina tuai ai le faatinoga o tatou poloketi ona o nisi o mafuaaga e aofia ai, muamua, e le i mulimulitaia e le Matagaluega tulaga uma e tusa ai ma faiga faavae faataufofo a le Malo po o paaga mai fafo. Lona lua, e le i ato faamaumauga tuuina mai, pe le i faamalieina e kamupani tauofo aiaiga ma tuutuuga o le tauofoga. Lona tolu, e leai ni kamupani na tuuina mai ni tauofo. Lona fa, e maualuluga tauofo pe a fua atu i le fua faatatau po o tau fuafua o lo o i ai mo vaega o le poloketi o lo o faasalalauina. O nei vaega uma e ono toe uunai ai i tua le faatinoina o poloketi, ae faatino le toe faasalalauina o nei tauofoga ina ia manino ma mulimulitai pea faiga faavae ma tulafono masani a le Malo o Samoa aemaise o tatou paaga mai fafo. O nisi o faatuai e afua lea i faatalanoaga o maliliega mautu mo fanua tau Samoa faaleaganuu, ma fanua tumaoti e aafia i atinae tetele a le Malo, e tausaili se maliliega o sao o aiga, aua le faamatuuina mai o latou eleele. O isi ia o vaega taua e manaomia, ona faamautu muamua i lalo o vaega o puipuiga lautele, po o safe guards faatoa faaaaua le faatinoga o a tatou galuega tetele.

Lau afioga i le Fofoga Fetalai, e ui ina tuai le faatino o tatou poloketi o le naunautaiga lava ia faatino manuia uma a tatou atinae, e amata mai i le fuafuaina e tau i le faatinoina, aua a fai e le faia, o tupe faaopoopo tele foi nei mo le Malo, i tulaga e tau toe faaleleia ai ma le vaavaaia. E ao foi ona silafia e le Palemene lenei, o lea faatoa tatala a tatou tuaoi ia Aokuso 2022 ma o le a faatoa toe matala mai ai vaa oloa e aumai ai masini faapitoa, ma mea faigaluega e faatino ai a tatou atinae tetele. E faapena foi i avanoa vaalele e malaga mai ai konesale faapitoa mo nei galuega aemaise lava i tomai e le o maua i totonu o lo tatou atunuu.

Lau afioga i le Fofoga Fetalai, sa laga foi e le toatele o sui le tulaga o le sioki po o le lava o oloa auina mai fafo, e pei ona matauina i masina ua tuanai. E pei ona silafia o nei tulaga uma, o lo o aafia pea i tulaga o lo o matauina ai le lalolagi i le taimi lenei. Muamua, ua taugata felauaiga ona o le siisii pea i luga o le tau o le suauu ma ua tuu itiitia ai faigamalaga a vaa lauolua ona ua fuafua foi le lauina mai o oloa ona o le taugata ua i ai nei. Lua, o le tele o masini ma upega o lo o faaoga mo le gaosiina o oloa aemaise ai foi le tausaiina o fua o faaeleeleaga o lo o aafia uma i le tau o le suauu ma o le tele o Kamupani, ua taumafai e tuu itiitia a latou tupe faaaluina, ma tuu itiitia ai ma le supply o nei oloa ua mafai ona faatauina mai fafo, i atunuu o lo o gaosia ai. Tolu, o lo o i ai atunuu o lo o aafia, po o masalomia i le avian bird flu, ma o se tulaga o lo o aafia ai le gaosiga o moa, mo le faatauina mai o fuamoia mai atunuu mamao. Lona fa, o le vaega mulimuli lau afioga ma sui mamalu, o le matauina lea o le fesuisui ai pea o le tau ma ua aafia ai vaitau e toto ai ma selesele ai fualaau aina, lea o lo o tele ina faatauina mai i totonu o le tatou atunuu. O nei tulaga uma lau afioga, o lo o aafia ai le supply po o le auina mai o le tele o oloa ma o lo o mafua ai foi le siisii pea o le tau o nei oloa, ma o lo o galulue uma pea Matagaluega a

le Malo e taumafai e saili se tali vave, e le gata i le taumafai lea i le i ai o ni oloa e mafai ona sui nei oloa auina mai fafo, aemaise ai foi le taumafai e tuuitiitia nisi o tiute o lo o tuuina atu i luga o nei oloa.

Atonu o nisi na o fesili sa faatulai mai e le tatou Maota fonu po o afioga i sui usufono o le tatou Maota, agai i lou tulaga faa-Minisita o Tupe. o lona foi ua avatu le aotelega o le tatou tamaoiga o lo o i ai. O lona uiga e leai se mea e ono faapopoleina ai lau afioga i le Fofoga Fetalai, aemaise ai o le tatou Maota i le Palemene.

E talu ai lau fofoga i le Fofoga Fetalai, ua tuu ese lou pulou faa-Minisita o tupe, ae laei lou pulou faa-Minisita o Tina ma Tamaitai. Ona e faigata o lea lava e i ai nisi o saunoaga foi ma fetalai e agai i le tatou poloketi aemaise foi o le tatou atinae ua tele ai foi faamatalaga e tusa ai o saunoaga foi ma fetalai ua tuuina mai i le tatou Maota.

Se i fai sau tala i le faamaite nei a le tatou Malo, le tatou poloketi po o le atinae lenei o le tasi miliona. E sao lelei o le faiga fou, ae o ni vaega pitosili ona taua e tataua ona faatepa i ai le Maota fonu, i le tulai mai o le Faigamalo, e matauina o le tele o tatou tapenaga, e faatino lava i le tatou taulaga nei, i Apia po o Salelologa foi pe a agai atu i Savaii. Ae ua i ai le talitonuga ma le vaaiga mamao ma le vaaiga taulai a le Malo, e faafefea ona auai o tatou tagata, ia i ai lo latou sao i le atinaeina o le tatou atunuu. A lea ua i ai lo tatou faamaite lenei, o a ni itu lelei o le faamaite lenei, ua i ai le faatuatuaga o le tatou faigamalo i nuu ma alalafaga. Ua i ai le faatuatuaga a lo tatou malo i le afioga i le faipule o lo o tulai mai i so o se itumalo. Ua i ai le faatuatuaga a lo tatou Faigamalo i lau komiti na e filfilia. Ma e matauina foi e le tatou faigamalo le tele o tomai o agavaa o taleni o lo o i totonu o tatou itumalo, nuu ma alalafaga. Ae o lo o matauina, e taumalaga mai lava alo ma fanau, aoga i inei, taumalaga mai le mamalu o le atunuu i Tumua nei, e saili galuega ai. o nisi na o vaega e ese le taua foi o lenei faamaite. O le isi mea e pitosili ona taua lau afioga i le Fofoga Fetalai aemaise foi o le tatou Maota, o lea ua i ai le sootaga vavalalata a le afioga i le sui usufono i lona itumalo i lona nuu ma lona alalafaga o lea foi poloketi male atinae lenei ua ou matauina o vaiaso uma , o masina uma ua feiloai le sui usufono ma lana komiti ma iai le paganoa e silasila ai i tulaga moomia a le tatou itumalo i lea Nu'u ua mafai ona fefaasoai ma soalaupule ma lona nuun ma le itumalo ma atili ai ona masani le sui usufono i manaoga o lona itumalo o le aotelega foi la o le atinae lenei ia o loo iai a tatou faalautele ua tuuina atu e lima taitaiina a tou toe tomanatu path way for the development of samoa o le taiala mo le manuia o Samoa o loo faapea mai aia le sini autu ia faagavaaina alalafaga faamausali le lotoifale ma faamaite le faatupulaia ole tamaoiga atonu o le sini autu lea o loo afifi ai le atoaga o le atinae lenei poo le faamaite lenei a le tatou faigamalo atonu mo le silafia sa faatino ia le asiasiga a le matou komiti matou komiti lea toafa minisita taitaifono ai le afioga lie minisita o Tina ma Tamaitai aemaise foi ia nisi foi o sui o le tatou atunuu ma le matagaluega o Tupe ma le Matagaluega o Tina ma Tamaitai ma nisi foi o tatou matagaluega o loo matou iai i totonu o le tatou tapenaga lenei o lona uiga e taua le tatou

poloketi e taua lo tatou atinae ma o lau tatalo atu foi lena i lau afioga le fofoga fetalai faapea foi ia tatou maota ua iai le faatuatuaaga o le tatou faigamalo tuu atu iina i aao ma lima o tatou sui usufono ma le komiti lie lufilufi limalelei e leo tuu faatalaloa a lea aluatu ma le faavaa a lea tuu atu ma alafua, alafua e limataitaiina ai le 200 afe tele ia saunoaga ma fetalaiga aisea ua le aumai ai le 1 miliona? Aisea ? o nisi na o vaega na talatalanoa ai le matou Komiti faaaoga le 200 afe lea muamua o la foi ua maioio atu vaega o le tatou 200 afe muamua fau lou ofisa, totogi au tagata faigaluega ,totogi alauni a lau komiti, ma le faatotogaina o le Ofisa atoaga lena o le tatou 200 afe ae paga lea ua aluatu le asiasiga lea ua iai nisi o itumalo e leo iai se ofisa , ua iai nisi o itumalo ua fai totonu o falesa ua iai nisi o itumalo ua fai totonu o latou fanua , e pei o le aotelega lena lie faafofoga mai ua tele tala i lenei atinae ae ou te tautino atu i lau afioga le fofoga fetalai ma le paia o le tatou maota o le faamanuiaga lea ua i o outou aao , o le faatuatuaaga lea o le tatou faigamalo lea ua tatou fau faatasi ai ia le tatou faigamalo o le tala o le toeaina a le matou Nuu lau afioga lie sui usufono taimi muamua lea ua amanaia ai e se faigamalo ma tuu mai ia i matou le matou filifiliga e faatino ai le matou manaoga e ala i matou manaoga tupito o se tasi lena o vaega taua lenei o le atinae e leo alu atu le malo faapea itumalo lea fai le mea lea fai le mea lea leai a ua faataatia atu ia alafua e mafai ai ona faaaoga le tatou miliona lenei i mea tau aoga, soifua maloloina o le tatou faatoaga tulaga faatoaga faatoaga ma faiga faiva o le siosiomaga tele vaega uma ma e eseese foi manaoga tupito a lea itumalo ma lea itumalo o le filifiliga o lena i o outou aao ao le tatalo atu i lou tulai mai lie vaaiga foi ole Matagaluega lie taimi lenei e le faigofie e le faigofie le Matagaluega o Tupe e le faigofie o Tina ma Tamaitai ua maioio tiute ma faiga faavae a le tatou faigamalo faataatia alafua ae o le faatinoga o le tatou atinae lenei o loo i a ao male faatuatuaaga a le tatou faigamalo lie aao ole sui usufono ,i lou lufilufi limalelei ma le tulimatai ia manuia lou itumalo oa manaoga na e manaomia e lou itumalo faatino a lea ua avatu e le faigamalo le tupe e leo tuu faatalaloa ae pei o le lagona lena ma le faatalaula atu ia male aoiu atu tatou galulue faatasi tatou galulue faatasi sei vaai le taua o lenei atinae lea ua maua ai foi pisinisi a le au sue tusi faatino le latou galuega o lea e iloa ma e silafia lava e le sui usufono le tomai lena i totonu o lou itumalo le tomai faakamuta le tomai tausii tusi le tomai faafatoaga o faamanuiga lena ao lea o le taua lena o le atinae lenei e toe faamantu atu tausaga uma e miliona e tuuina atu i ou aao e fai ai lau faasoa ae a leai sou talitonuga ma tulai mai lava le sui usufono ma lana tautinoga e le oo le poloketi lenei talofa e, talofa e i lou itumalo o loo iai le manaoga talofa e i itumalo i alo ma fanau e leo gafatia le totogiina o pili aoga a lea ua iai le fesoasoani o le tatou faigamalo tatalo atu tatalo atu lie tatou maota o le tatou avega e tausoa faatasi faatino a tiute ma matafaioi o le malo ae o le malosiaga ma le tuleiina ma le faatinoga o lenei faamoemoe e i aao lie afioga i le sui usufono ma e talitonu e iai manuia ole atinae lenei e iai manuia o le atinae lenei, sei avatu pea se update i lona aotelega, aua o lea sa iai le tatou 11 miliona mai le tala faataata o le tupe lea sa tuuina atu le tatou

200 afe o le 200 afe foi lea sa faaagaga mo le fausiaina o tatou fale ma o loo matauina tele ina toa ia nisi o tatou itumalo ona o loo iai vaega e leo faamalieina ai ia le tatou Matagaluega o Tupe o le tatou Matagaluega o Tina ma Tamaitai aemaise foi e ese le taua o le lipoti a le suetusi a tou manaomia se lisi o suetusi official suetusi o loo iai le lisi i totonu o le tatou Matagaluega o Tina ma Tamaitai e mafai ona faasoa atu ai poo le tatou society inistitue of accountant o loo iai le lisi lena e mafai ona faatinoina ,e taua le lipoti lea aua o iina ia moni ma faamaoni ia o tupe ia na faaalo matauina lie matou asiasiga e iai a itumalo e lei maea latou tapenaga e lei maea le latou fale lona uiga a faapea o lea ua aumai le lipoti a le suetusi ua faamatuu uma le 200 afe ae la e lei uma le fale ailoga e sao lena fuafuaga ae o le taua a faapea o lae fau le fale o lona uiga o lae totoe le tupe o lae faagasolo o le naunautaiga o le Matagaluega o Tupe e le tuu faatalaloe le tatou paketi toe lima masina maea le tatou 51 miliona lea lona uiga o le tatalo atu o le tatou Matagaluega o Tupe ma le tatou Matagaluega o Tina ma Tamaitai ia e faatuatua atu iina matou te faamoemoe atu iina ia e tino ai le tatou faamoemoega lenei.

**FOFOGA FETALAI :** malie lau afioga lie minsita o tupe , sau malologa sei tuu atu le avanoa i le sui o Falelatai ma Samatau .

**Afioga Lupematasila Galumalemana Tologata Togia Tile Leia:** Faafetai lau afioga mo le avanoa , ae manatu foi se i tau fai si koma a le afioga i le minisita. Ua taliga e fia logo le mauga nai salafai lie saunoaga matagofie ale afioga i le tamaitai minisita. Ae ua ou tulai atu lie agaga faaaloalo ona o lenei itumalo o se tasi o itumalo lea sa agiga i luga o upega tafailagi e leo mulimulitai i taiala a le tatou malo ae faafetai lau afioga lie minisita ma le komiti o lea na maua le avanoa e asiasi atu ai i le ofisa o si ou itumalo lie aso toonai e ui a ina le logoina mai le sui usufono, tasi lea mea sa ou lagona ai le faanoanoa manatu a soo se mea e fai i le itumalo, e tataua a ona logo le sui usufono ae ui i lea faafetai o lea sa faatoai i le Ofisa Sili o le Pulega ma le ofisa, a o le mea taua lea sa alu atu le asiasiga, momoli atu ai le agaga faafetai e pau a nai vaega ia atonu ai ua faamalieina lau afioga i le minisita faapea foi le komiti ao nai nisi o vaega taua e pei ona avatu ai se fautuaga ia e pei ona silafia le tulaga sa talosaga mai ai foi nisi o komiti pe mafai ona fai se taavale e faaoga e le ofisa ao le tali atu e le tatou matagaluega e le mafai e oo foi la lie tulaga o sui usufono e lelei lena itu o le maota o lena e tofu male taavale, a o lenei itu o le maota ua matua faaopopo tiute o le faipule e alu le faipule i tua e faamaopopo le komiti ma vaega uma na, ae manaia foi ae tufa mai nai taavale mo matou e fesoasoani lie faatinoina o matou tiute.

O le isi vaega taua o le suega o tusi o lea ua maea ona tuuina atu le lipoti a le suetusi ae toe fesili mai foi lou ofisa e avatu lisiti e fou lea faiga, na matou matau i lea faiga poo le mea ea ua le talitonuina le lipoti a le suetusi ua tuuina atu ao sa matou talitonuga afai o lea ua ave le faatuatuaaga a le Komiti ma le tatou malo i suetusi latou te faia le



galuega lea e tatau ona talia e le tatou komiti ma le malo le lipoti a le suetusi. A iai foi ni fesili e fesiligia ai le lipoti a le suetusi e manaia le agai sao a i le suetusi e faamatala ma tali atu le suetusi. E pei o nai vaega laiti ia e avatu ai sa matou fautuaga e na ona tuutuu atu i autafa o lau afioga i le minisita ma le malo, afai a e le talia a o lea ua faaleo atu lo matou manao ae faafetai tele, e ese le manaia o lau faalogologo i lenei afiafi i le sausaunoaga matagofie i le afioga i le minisita. Maimau pe ana faapea uma ia isi vaega uma o le komiti, semanu ua leva na alu le tatou poloketi. Ua manaia le mea ua iai, ae momoli atu le agaga faafetai tele, manuia le afiafi.

**FOFOGA FETALAI:** Mo le faasaoina o le tatou taimi sei tulai mai le sui usufono mo Faasaleleaga 5.

**Afioga Peseta Vaifou Tevagaena:** Faafetai mo le avanoa e momoli le faafetai i lau afioga i le Tamaitai Minisita o Tupe. Atonu o le tasi lea vaega sa ou laga, o la e faafofoga mai lou itumalo. Ou te faafetai foi ona o lea ua logo mai au, ua uma ona afifio atu le tou asiasiga, e ui lava ina e le i silafia e si ou nuu ma le matou Komiti, ae faafetai o lea lava e faatonu galuega a la outou Komiti. Ae pei o si vaega sia e avatu ai se tuualalo pea i lau Afioga, ona o lea o lo o feagai foi le le atoa o le tino foi i le Afioga i le Minisita o Tina ma Tamaitai, ona o le galuega a le itumalo lenei, ua uma ona faatino le tanuina o le sami e fausia ai le Ofisa i lalo o le ioega a se tasi foi o matai e ana le fanua ma le lagolagosua a si o matou nuu. Peitai la ua toe taofia atu e nisi foi o sulima feoi foi o le aiga lava lenei, a o lea ua ioe i ai se tasi o le o lo o tausia foi ma feagai ma le nuu i si o matou nuu i Sagone.

O le agaga faanoanoa lau Afioga ia te au leaga o lea e le o afio mai le Minisita, o lea ua faatu materials, toe lava o le sauni e faatino le fauina o le ofisa. O lea foi e faatino le Tala o le Tupe se i maea ona avatu lea, aua o lea ua i ai uma faamaumauga o... a o lea ua taunuu atu le tusi, e le mafai ona toe tuu maia se tupe i totonu o lou itumalo. E pei o le faanoanoaga lea lau Afioga i le Fofoga Fetalai, e le i fauina le Ofisa, a o lea ua aumai le tusi aloaia i lou itumalo e le toe aumaia se tupe ona o se faasea a se tasi.

O lea la ou te faafesili ai i lau Afioga, o le a la le uiga o lea mea, o lea e le i fauina le ofisa ae o la e ua i ai uma mea e fau ai le ofisa, ae ona o mea e ao ona ave i ai le faamuamua, a o lea ua aumai le tusi.

E pei o le tulaga lea lau Afioga i le Fofoga Fetalai e ala ai ona ou fia malamalama i le tulaga lea, ona o lea la o le a taofi tulaga ia. Ia ou te le iloa la, o lona uiga la o le a poloka ai foi i i le matou galuega. Ma lou faaloalo lava lau Afioga. Faafetai.

**Afioga Leana Ronnie Posini:** Lau Afioga i le Fofoga Fetalai...

**FOFOGA FETALAI:** Se i tulai mai le sui usufono mo Safata 1.

**Afioga Leaana Ronnie Posini:** Faafeai tele lava i le Afioga i le Minisita, faafetai i le folasaga malamalama ua manino ma atoatoa le folasaga ma le saunoaga a le Minisita i le tatou Komiti lea. na pau lava lea i lau tau maitau foi lea o lea ua agiga foi saunoaga a nisi o Minisita e le o lelei le faafoefoeina o le tatou \$200,000 lea. E tele itumalo e le o mulimulitaia taiala na aumai e le tatou Malo e faatino ai le tatou poloketi lea \$200,000. O le mafuaaga lena o lea ua ala ai ona le aumaia le isi \$800,000.

Ae o lou talitonuga lau Afioga i le Fofoga Fetalai, e a i lau Afioga i le Minisita ae faataoto i le tatou Laulau a Fono lipoti ia a Suetusi a tatou itumalo uma e 51, ona silasila lelei lea i ai o le tatou Maota ma auiliili lelei ai aua e pei e faasinolinolima foi i nisi itumalo, ae lelei le manino lelei o le Maota lena i e le o mulimulitaia tatou Lipoti. Ma le agaga faaaloalo.

**FOFOGA FETALAI:** Ia, se i tulai mai lau Afioga i le...

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, pe maua se avanoa o lena itumalo, mo le faasaoina o le taimi o le Minisita.

**FOFOGA FETALAI:** Ia, malie lau Afioga i le Minisita se i tulai mai le sui usufono o le Vaimauga 1.

**Afioga Sulamanaia Fetaiai Tauiliili Tuivasa:** Masalo e momoli le agaga faafetai i le Afioga i le Minisita o Tupe, e maitau lava ma le totoa le saunoaga matagofie i lena itula afiafi. Malo. E pei e faapena foi, malo faafetai i le asiasiga sa afifio atu ai foi le Komiti mamalu i le aso Faraile. Ia o le manaia ia o le saunoaga matagofie, o lea foi e faalogologo si ou itumalo, e pei ona taua foi o lena lava itumalo na muamua lava tuuina i totonu le Tala o le Tupe ma mea faapena. Ae o le tulaga lea e tupu i lou ia lava... maumau e pe ana faapea pei ona saunoa foi le sui usufono o Falelatai i le saunoaga matagofie. A o le mea lea e tupu pei o faiga faavae i totonu o le Matagaluega. Ina ua faatulai foi o le tele o tulaga sa i ai pei ona faamatuu mai le \$200,000, ia na matou omai foi faamalamalama mai e le Matagaluega, ina ia mafai ona faamatuu ma aumai i totonu le Tala o Tupe e le i uma le tausaga lea o le financial year o le vaega lea i le \$200,000. Peitai ane na tuuina mai i totonu. Ae pei o lau ia lava tatalo, maumau e pe ana faapea, o le tele o suiga i totonu, le process lea e i ai pei ona saunoa foi nisi o sui usufono. Ia e leai ni itumalo e tetee, ae pei o faiga faavae lea i totonu, pei o i ina lea e tau lape ai le tulaga i lau Afioga i le Fofoga Fetalai.

Ae faafetai i le saunoaga malamalama, o lea foi ua outou afifio atu ma talaaa atu, o la e i ai le fale komiti o lo o faatino ai lena auaunaga a lena itumalo, ia ma totogi foi le rent i lea... Ae faafetai foi i lena avanoa lau Afioga i le Fofoga Fetalai e avatu ai le faafetai i le Afioga i le Minisita o le Siosiomaga, ina ua faamatuu mai se vaega o eleele i o i le matou lava itumalo e faatino ai le matou... o le ala lena lau Afioga i

le Minisita sa oo ai loa se ooooga i lenei itumalo ina ia faatau uma loa materials e faaalu uma ai lava le tupe ina ia mafai ona ma submit mai loa i totonu ma faamaea. Aua ana le faatau la materials last year, e toe oo atu i le vaitaimi lenei i le taugata lea ua i ai, ua i luga le tau.

Ae pei o le popolega lena lau Afioga o le tele o fesuiaiga i totonu o le Matagaluega, faiga faavae la e i ai pei ua faafaigata ai. Ae lau Afioga e tatalo atu ia i le taimi lenei, faafetai lava i lenei itumalo, e le i totogia lava alauni o nai o matou tama, aemaise foi o le ofisa toatolu lea na i ai, e leai lava ma se mea. Ae tatalo atu o lea ua outou oo atu ma affio atu, ia Laauli, alofa ifo i le tatou nuu. Sa ou manao lava e te afio atu, ae masalo e le lelei le polokalame, ou te masalo o oe lea e tuuaiina i le taofiofiga. Ia e tatalo atu i lau Afioga i le tatou tupe se i faamatu muamua mai se isi vaega se i totogi muamua ai alauni, leaga ua upuia ai le sui usufono. Ae i le paia i lau Afioga i le Minisita, faafetai lava le lagolago mai i lenei itumalo.

**FOFOGA FETALAI:** Faafetau, o lea ua maua atu lou finagalo. Malo faafetai. Oi, sole. Ia se i tuu atu muamua le avanoa i le Afioga i le Minisita o Faatoaga leaga o lea ua taua lona suafa.

**Susuga Hon Laauli Leuatea Polataivao Fosi:** Faafetai. Se ua malie malie lava le saunoaga a le sui usufono ae faapea o au lea e tutaia ai le poloketi a le tatou nuu.

Lau Afioga i le sui usufono, a na e usitai, semeamanu ua leva ona taunuu le tatou poloketi. O le faalavelave e te le i talia sau tuualalo, e te faalogologo lelei lava ia Leaana, o Peseta ma Lupematasila. O le tou vaega lava lea e toa-4 lea ou te maitau lelei mai lava i le amataga. Ona ou manatua lava lea o le tala a Commisioner Samau Timani i aso ia, fai atu le papalagi i luga, mo le mea o le taufaavalea, fai atu loa Timani, you fool one you fool two, tui loa ma Timani o le papalagi. Malilie sui usufono mamalu, se soia ia ua lava lena. O lea ua saunoa atu le Afioga i le Minisita, alo mai laia. O le asiasiga lea na alu atu, e iloa ai le tatou way forward. O lea lava tatou te talanoa i faiga faavae o lea e faamaopopo, ae leai lava se mea e fai loa lelei. O a tatou pisa ma tatou vevesi ma tatou finauga, faafofoga lelei i le saunoaga a le Minisita o Tupe, omai, se omai, omai loa. Omai tatou pulupululima faatasi. O le poloketi a le tatou nuu, na ave lau tusi i le Minisita o le Siosiomaga, na talia ai le mea lena o le a faatu ai le tatou Ofisa. O lea ou te tutu lava i ou tua, pe e te faalogogata lava Sula, ou te lagolago pea i lau Susuga. Ia o le faasilasilaga lena.

A o Peseta, malie, o le fanua la e na tanu, o le fanua o le Malo. O le tanu na o le Matagaluega lava o le Siosiomaga ma le Environment e aumai ai le tali. E le mafai e se tagata ona taofia le tanu le la i lau lea maitau. Na o le Siosiomaga lava e avatua le faatagaga e tanu ai le mea le la. Ae na ona ou faapena atu ne i te i ua e alo i le ata o le laau ua taofi e se isi le tanu, o le tanu o le tanu a le Malo. O si au fesoasoani atu lena ne i te i ua e fefe i le taofiga a o lena e mafai ona fai.

**Afioga Peseta Vaifou Tevagaena:** Ia lau Afioga na o sina tali vave atu lava i le Afioga i le Minisita.

**FOFOGA FETALAI:** ia, atonu ailoga e i ai se toe fefinauaiga o lenei mataupu Peseta, o lea ua manino le saunoaga a le Minisita. Ia, se i tulai mai.

**Afioga Peseta Vaifou Tevagaena.** Leai o le taua ia o le saunoaga a le Minisita. E saolele lava le saunoaga a le Afioga i le Minisita i le tulaga lea e tupu i si ou nuu, ona e moni lava o le tanu e pule ai le siosiomaga. E pei o le mea lea na matele i ai le feeseeseaiga lea o lou nuu ma le siosiomaga.

Ae peitai o lea ua aumai e le Siosiomaga, e moni lava o le sami, ae leaga e i ai le fanua lea e le mafai lava ona oso mai le aualatele oso ifo i luga, e i ai lava le fanua lea, le aiga la lea pei o lea e mafua ai nai feeseeseaiga ia.

A o le mea sili faafetai o lea ua faafofoga mai foi le Minisita o le Siosiomaga, ia atonu masalo o le a vave ona faatino le matou i le tulaga lea. Ae o lea ua maua nei le tala, o analeila na... ai ua uma ona affio atu ai foi o si aiga lea e nonofo iinei i Upolu nei la e ua feiloai i Savaii ma si o matou nuu. Atonu o le a faigofie ai le mataupu lea. Ma lou faaaloalo lava. Faafetai.

**FOFOGA FETALAI:** Ia ua lelei, faafetai o lea manino lea vaega. Se i tulai mai le sui usufono mo Gagaifomauga 1.

**Tofa Hon Faimalotoa Kika Iemaima Stowers-Ah Kau (Gagaifomauga 1):** Faafetai i lau Afioga i le Fofoga Fetalai mo le avanoa o lenei sui usufono. Ou te tulai atu foi ma le agaga faaaloalo, ona o lenei foi sui usufono sa faapena ona matua ave lau faafetai ma le faamalo i le Afioga i le Tamaitai Minisita ma le Matagaluega, ina ua iloa foi o lea e tauave e ia tiute ona o lo o toesea le Afioga i le Minisita e pei foi ona ou faaalua lou fia faafetai i le Afioga i le Minisita pe ana sau o lea e fonu. Ae i ai lava le maitau foi a nisi itumalo, e le o tutusa uma le faiga o le itumalo. O lea sa avatu lata ita talosaga, ae a pe a malie maia, lea na ta faafetai atu i le tulai mai sologa lelei le tamaoaiga o le atunuu. Faamatuu maia itumalo ia e usitai ma fai faatonuga ma follow i mea o faiga faavae, o a uma mea, ia o tiute na o matou o sui usufono. Na ona fai mai lava, ia, tau i Savaii, oso i le vaa, fonu, sau. Ae a pe a faamatuu maia pe afai o lea ua sologa lelei le tamaoaiga o le tatou atunuu ae se i amata ona galulue. O le matou itumalo, sa lavea i le 10 lea muamua lava, ona aumai loa lea o le matou tupe, ia fai loa le oka a le kamuta ona o tulaga pei ona saunoa i ai se tasi o sui usufono i le taugofie o lena e feoloolo mai le tau i lena taimi, ae na tuai ona faaiu ona se i tau faamautu. O la e toetiiti uma le matou galuega, a o la e ua nofonofu ua le totogia... aua foi na totogi mai lava ia... ua le totogia ofisa ia e toa-3, ia o lea ua le totogia foi ae ua uma atu i totonu lipoti a le Komiti, ia ua le iloa po o le a le isi mea a fai ona e leai se poloketi. E

pei o lata ita talosaga lena, taatia ia manatu o le isi auvaega, ae a pe a malie maia le Malo e faamatuu maia tupe a nai isi itumalo ia e faapena ona usitai i mea uma o lo o faapena ona fai mai ai le Malo. Ma le agaga faaaloalo.

**Afioga Alaiasa Moefaauouo Malagaitutogiai Sepulona Moananu (Anoamaa 1):** Lau Afioga i le Fofoga Fetalai...

**FOFOGA FETALAI:** Malie lava Anoamaa se i tuu atu lava le avanoa i le sui usufono mo Satupaitea lea na talosaga muamua mai faamolemole.

**Afioga Hon Lautafi Fio Selafi Purcell:** Faafetai. E tau osovale lava le sui usufono lea faapea o ia o le Sui Taitai o le matou Itu. Lau Afioga i le Fofoga Fetalai, faafetai mo le avanoa.

**Afioga Alaiasa Moefaauouo Malagaitutogiai Sepulona Moananu:** Lau Afioga i le Fofoga Fetalai, se ou te le iloa na tuu le avanoa i i lau Afioga e faamalulu atu ai, ae leai se mea o le a fai ai ia saunoaga faapea e faale-mafaufau vaeane le afiafi.

**FOFOGA FETALAI:** E faamalulu atu foi i le sui usufono mamalu. Le sui usufono o Satupaitea, soia e te faalavelave i le sui usufono mamalu, ae tuu atu le avanoa e saunoa mai.

**Afioga Hon Lautafi Fio Selafi Purcell:** Faafetai i lau Afioga. Leai ou te le tali i si ou uso. Na pau lava le mea ou te tulai atu ai lau Afioga i le Fofoga Fetalai, e momoli atu le faafetai i le Minisita o Tupe ma le Minisita o Tamaitai, lea o lo o siimai atu i fafo ona o le faagaoioiga o le poloketi a lou itumalo. Ma e leai la se mea ou te popole ai i le tulaga i le faagasologa.

Ae ua ou tulai atu lau Afioga ona o au ua faateia i le aso ananafi ina ua maua le tala o lea sa i o i lou itumalo le asiasiga o le poloketi lea. Ma e ou te le iloa e afifio atu le Komiti, e le iloa foi e lau Komiti. Mo le silafia o au e i ai le ki o le fale ma lau Sui Taitaifono. Na pau la lena o tagata e i ai ki o le fale, ae pei la ua o atu le Komiti, o le mea lea ou te faamalie atu ai, ona o le le iloa o lo outou afifio atu, ona o le itumalo lenei e talimalo. Ma e ua faafesootai mai nisi o le itumalo, pei ua faasea mai ia te au i le logoina o lea e o atu ia le mamalu o le asiasiga a le Komiti. Ia aemaise o lea sa afifio atu ai ia Minisita. Vaai o lea sa ou talatalanoa atu lava i afioga i le Tamaitai Minisita o Tupe, ia faapea foi ia le afioga i le Minisita o... i le vaiaso lea na tea i le mataupu lenei ae e leai ma sina ou iloa o lea e i ai ia se latou fuafuaga e afifio atu i Savaii i lou itumalo e fai ia se asiasiga.

O le mea la lena e faamalie atu, i lou le... semeamanu ou te oso atu lava i le Aso Toonai e tatou te feiloai ai lava ananafi, leaga o au lea e i ai uma ia faamatalaga o le fale ia ma... ia pe e fai foi i nisi foi o sui matutua o le matou komiti, afifio ifo i ina o lena e o atu le asiasiga,

faamatala i ai mea uma o lea na ou faamatala atu ia te outou e uiga i le tatou galuega.

Ia na o le pau lena o se faanoanoaga lau afioga i le lumanai, ia logo mai au ou te alu atu ai i o e tatou te feiloai ai. Ia ae faamalo, atonu ua faamalieina outou i se galuega foi ua fai i lou itumalo, ia ona ua pau o se mea ua mafai i le taimi ia faapea foi le seleni na tuu atu ia ma lou faaaloalo.

Ia si ou uso lea mai Anoamaa, ia se aua e te itaita gofie, ia ma le faaaloalo...

**FOFOGA FETALAI:** Ia, malo faafetai, ia le sui usufono mamalu o Anoamaa Nu.1.

**Afioga Alaiasa Moefaauouo Malagaitutogiai Sepulona Moananu:** Faafetai i lau afioga i le Fofoga Fetalai, atonu foi o lea ua tele saunoaga e uiga i le saunoaga matagofie a le Minisita o Tupe. O lea foi ua faalogologo atu foi i le Tala auiliili o le tamaoaiga o lo o i ai ia le tatou atunuu i lenei taimi ma fuainumera ua tau mai, ia e lagona lava ia le faafetai. E leaga e i ai lana lafoga lea na fai i le isi Pili muamua i le tatou Fono, o lo o lelei ia le tamaoaiga ma tele tupe a le tatou atunuu.

A faalogologo la ma le totoa i fuainumera ia na tolaulau mai i le amataga a le Minisita, e pei o lea ua maua ai foi ia se mautinoa e ala i lana saunoaga aemaise foi o le faafofoga mai a Samoa. Leaga o mea ia e ese le taua i le faafofoga mai foi o tagata, ina ia mautonu foi latou, ia ae aua o lea e sau sao mai lava i le Minisita. Ia e seasea fai e isi Minisita sa i ai. Ia ae faafetai o lea ua tau faaali mai e ia ia tulaga ia ae pau o le mea o lea ua oo i le tatou Poloketi, o lea ua silafia e le Minisita ia le lagolagoina o le Poloketi lea e le matou itumalo.

Ia e pau lava lea o le mea lea ua ou vaai nei i le asiasiga lea na alu, ia ou te le i auai foi. Ae faamalie atu i lau afioga i le Minisita, a toe alu nisi o asiasiga, ia ona logo mai lea o sui usufono. E le faapea foi o le a fai i le tupe a le Malo ia le fale o le Poloketi, na pei laia e... leaga e ese foi ia le vatapuia ma nuu ma afioaga lau afioga. E pei o le tulaga lea e matou te tuutuu atu ai i lau afioga. E le faapea e faasa, ae e iloa ai foi ia lo tatou vanonofo ai ma le sui usufono, o le faailo mai i le sui usufono o lea o le a alu atu ia le asiasiga.

E pei o se tulaga lea ia aua e tele la nisi mea na fia faamatala, ia ma le isi mea lau afioga, sa i ai le Minisita ma le Minisita Lagolago i le taimi na fai ai le umusaga o le matou foi galuega. Sa ou faapea la au ia, e pei o lea ua tau mai ia te au o le sui usufono, e pei e le o talitonuina ina ua toe alu atu ia le asiasiga lea, ia ae e le i leva nei lava lau afioga. E pei o le ala lea, e na ona tuutuualalo atu lava mo mea faapea.

O le tulaga foi lea o le suega o tusi, e le tataua ona sainsi se Suetusi ae e le i alu e asiasi ia mea ia. A faapea na i ai se Suetusi na nofonofo lava i lona Ofisa ma sainsi ae e le i vaavaai i mea ia, ia o lona uiga o se Suetusi o lo o saili ni ana seleni i se auala le lelei. Ae o le mea foi na e tataua ona utagia ai e le Malo Lipoti a Suetusi, ona ua uma ona alu e silasila lelei i ai.

Ia e pei o nai mea ia lau afioga i le Fofoga Fetalai o le saunoaga a le afioga i le Minisita.

**FOFOGA FETALAI:** Malo, faafetai, malo lava... se i tulai mai lau afioga i le Minisita...

**Tofa Hon Lauofo Fonotoe Nuafesili Pierre Lauofo:** Lau afioga i le Fofoga Fetalai...

**FOFOGA FETALAI:** Ia mo le faasaoina o lou taimi, se i tulai mai ia lau afioga i le Sui Taitai...

**Tofa Hon Lauofo Fonotoe Nuafesili Pierre Lauofo:** Ia faafetai i lau afioga, e manatu ou te tulai atu foi ona e pei o lea e matau atu e na o sui usufono o lenei Itu lea e taofia ia latou tupe o latou poloketi. Ia po o le polokalame foi lea a le tatou Malo. Ia atonu lava o na e i ai ia mafuaaga tatau. Ia ae o le mafuaaga foi lea sa ou taua i lau lauga, e lelei lava ia le sue faalelei e se Suetusi o le faaaogaina o tupe nei, ae aumai se lipoti i le Maota. O lea foi e saunoa ai le sui usufono lea mai i Safata.

A lea sa ou taua i lau lauga le vaega lea, e lelei lava lena ona manino lea ma malamalama lelei le faaaogaina o tupe, ia ma iloa ai foi ia itumalo ia e saunoa i ai le afioga i le Minisita o Tupe, ona o lea foi ou te nofo ai iinei e taumate foi e nisi faapea ai o lenei foi itumalo e faaletonu ae leai. O mea uma e manaomia mai e le Matagaluega e avatu i totonu o Development Plans o le Audit Report ua i ai uma lava. E pau lava le mea lea na misi o le Tusi Taofi lea na aumai, fai mai o lo o i ai se faafitauli tau lotofale i totonu o le matou itumalo, ia ua maea foi ia lena tulaga ona faaleleia lea e pei ona masalo e pei ona maimoa foi nisi i le TV, ia ua uma le lotu, faalelei e se tasi o le matou afioga lea na faalelei, faatalofa ma fiafia uma tagata uma. Ia ua uma lava ia vaega na lau afioga i le Minisita mo le silafia, ia ae faamatuu mai loa ia si a matou seleni, faafetai.

**FOFOGA FETALAI:** Ia se i tulai mai ia lau afioga i le Minisita...

**Afioga Fepuleai Faasavalu Faimata Sua (Salega 1):** Lau afioga i le Fofoga Fetalai faamolemole pe maua se avanoa...

**FOFOGA FETALAI:** Ia se i tulai mai le sui usufono...

**Afioga Fepuleai Faasavalu Faimata Sua:** Faafetai i lau afioga i le Fofoga Fetalai mo le avanoa. Ua matau lava ma le totoa i lenei afiafi ia le saunoaga a le afioga i le Minisita o Tupe. O lea foi ua faalogologo atu ia lenei Itu i le sai mai o le la Itu o le Maota i le asiasiga.

Ou te faaluaina ia saunoaga, e le na o le Itu lena. Te i ua outou faapea mai ua faafuaseia outou. E oo foi i lou sui usufono ma matou uma nei, ua te i lava i le valaau mai o le sui o le komiti, logo lau komiti o lea ua oo atu ia le asiasiga. Ia faamalie atu te i ua sai mai le afioga i le

Minisita, ne i faapea e na o lena Itu o le Maota o lo o faafuaseia. E oo foi ia te au ia ma matou uma lava lea e nonofo atu, ia ae leai lava ia se matou tala o le a le mea e finagalo i ai le Taitaifono ma le Komiti, ia o tatou lava e alu i le faalogo.

A fai ua faafuaseia atu ona po le siakiina, ia e aoga foi, se i maua ai le Taitaifono ma lana Komiti po o sao. Ia ae faamalulu atu i lea vaega, faafetai.

**FOFOGA FETALAI:** Ia tulai mai lau afioga i le Minisita o Tupe e faamaea mai ia lau saunoaga...

**Afioga Hon MULIPOLA ANAROSA ALE MOLIOO:** Faafetai lava i lau afioga i le Fofoga Fetalai, ia atonu o lea lava e matau atu o lo o lagalaga pea ia finagalo ma manatu o le tatou Maota, ia e tusa ai foi o le asiasiga a le tatou Komiti.

Ia e faamalulu atu, avatu foi malu i puega i le tatou Maota ona i le tulai mai o le tuuina mai foi o tiute ma faiva ia e vaai foi ia le Matagaluega, ia sa muamua lava ou vaai i le \$11 miliona lea sa i totonu o le tatou Paketi muamua. I totonu o le \$11 miliona lena, o lo o i ai ia tatou itumalo ma latou tai \$200,000 e 51. O lona uiga, ou te fia vaai lava o faaalu sao tupe ia, aua o matou lea e faia faaiuga, pe faamatuu tou tupe, pe taofi. Ia o le auga lena o le asiasiga o le tatou Komiti. Ia aua e tatau lava ona tilotilo, o le a le worth o le fale lea?

A faapea o lea e sau o le taavale, ae alu atu le asiasiga ae e leai se taavale, ia o auga na o le... o le taua lena o le asiasiga. Ae faamalulu atu, e saolele lava ia le saunoaga. Ua solia ia totonu o nuu ma alalafaga aemaise foi ia le paia o le itumalo. Ia o le talitonuga o le tatou Komiti, ia aemaise ai foi ia le tatou Faigamalo, leai o lea e tele ia faamatalaga i le tatou Poloketi lenei. Ma o le auga tonu lava lena, na faatino ai ia le tatou asiasiga lena, mo le tou silafia, i le Aso Faraile maea ia le tatou Fonotaga a le Palemene, 10 loa itumalo na faaauauina le afiafi, ina ua maea ia le tatou Fonotaga. Aso Toonai ta le 7, ia soo uma ia Upolu. Aso Sa, malaga le Komiti i le afiafi i Savaii, ta le 7, ia amata ia le matou asiasiga i le 20 itumalo.

Ia o le matou Komiti lenei, o Komiti lava na o latou iloa ia le itumalo o lo o tulai mai ai se sui usufono, e pito sili ona alofa i lona itumalo. O se sui usufono foi, e i ai lona talitonuga, i totonu o le atinae lenei, o lo o i ai le manuia. E soifua manuia ai ia lona itumalo, ma e atagia mai foi i totonu o le asiasiga lenei, le sui usufono e leai sona talitonuga i le atinae lenei. E pei e manatu mama i ai, e le o fesootai ma lana Komiti faafoe. E le e taumatemate mai foi le itumalo.

Ia e pei o le aotelega lena, ae e taua le faasoia atu i le aotelega o le matou asiasiga. E 51 ia o tatou itumalo, o lea na faatino ai ia le tatou asiasiga. E 48 Fono Faavae ua i ai Ofisa. E toe 2 lava ia Fono Faavae, e le i fausia ni Ofisa. E tasi i Savaii ia ma le tasi i Upolu nei. E ui lava ina tuai, ae o lo o matauina o lo o agai lava i luma ia le tatou sa. Mai i le 48 Ofisa o Fono Faavae, e 22 Ofisa foi sa fausia. E momoli faapitoa atu, ia



le agaga o le faafetai i itumalo, aua o le naunautaiga, ia fausia ia tatou Ofisa fou.

Ia mai i le 48 lena, oi e 22 ia Ofisa fou, sa fausia, 26 ia tatou Fono Faavae, o lo o lisi i fale o itumalo, ao nisi ia o lo o lisi i faleaoga. E 10 Fono Faavae mai i le 26 lena, o lo o faaoga le tumau apitaga. Ua faaminoi ai nei ia tatou atinae i le taimi lenei, ae o lo o i ai le fuafuaga, e fausia ia latou Ofisa mautu, pe a maea ia feutagaiga ma le Matagaluega o Punaoa Faalenatura.

Ia e tatalo atu, e taua ia le faamalieina o taiala ma alafua sa faataoto. E leai ia se itumalo e le i tuulima atu e le tatou Matagaluega o Tina ma Tamaitai ma le Matagaluega o Tupe i le aso na saina ina ai le Funding Agreement lenei po o le Maliliega, o lo o i ai ia tatou Tulafono ma alafua ma Faiga Faavae i le faatinoina o le \$200,000. Mai i le... e oo i le taimi lenei, e 8 Fono Faavae ua faamalieina taiala ma aiaiga o le faaogaina o le \$200,000 ma ua maea ona faamatuu atu, a latou tai \$425,000 po o le 50% muamua.

E i ai nisi o Fono Faavae, ia ua taulimaina e le Matagaluega ia lipoti a Suetusi ma atinae mo fuafuaga faatino, ia ma o lo o faia i ai ia iloiloga a le Matagaluega o Tina ma Tamaitai, ia ma le tatou Matagaluega o Tupe, ona tuuina atu lea mo se faamaoniga a le tatou Komiti faafoe, ma faagasolo ai ia le faatinoga. E toe faamanatu pea le tatou Maota Fono. E manatua foi o tupe nei, ia o tupe lava i totonu o le tatou Paketi, ia o le afu liligi o tatou lava tagata. O lona uiga, ia e tataua ona limataitaiina i alafua ua maea ona tuuina atu, i lona faaogaina. Ma e taua ai, le matou fautua atu pea vaai tatou Faiga Faavae e mulimulitai ai i le \$200,000 lea. Ia aua a le lelei ia le faaogaina o le \$200,000 tele le fesili i le faaogaina o le miliona lea o le a tuuina atu.

O le tatalo lena, o le tatou Matagaluega o Tina ma Tamaitai aemaise ia le Matagaluega o Tupe, ona e faatino lava le galuega a le SuetusiSili latou, e mautinoa ai ua faaalu sao le tupe, in accordance with Funding Agreement ma Faiga Faavae a le tatou Faigamalo, e limataitaiina ai le faatinoga. O lona uiga, o la e lava e silafia e le sui usufono lava ia, i le tiute ma le matafaioi ma le mafuaaga o la e toa ai le faatinoga o lana atinae.

Ia o le tatou sa e fau faatasi, e taua ia o le matou tuualalo atu ma le matou fautua atu, lau affoga i le sui usufono, o tatou o sui usufono, ia fai ia le fesootaiga vavalalata ma lau Komiti. O le filifiliga foi o lau Komiti, e ese le taua. Ia filifili le tagata sao. E le faapea e manatu mauualalo foi i a tatou itumalo. O le taua, o le filifiliga o le tagata e i ai le tomai ma le agavaa aua o i, e tua atu ai ia le sui usufono. O le sui usufono ma le Minisita, e tele tiute ma matafaioi ae o lo o i ai ia le aufaigaluega galulue, o lo o i ai le tomai, taleni ma le agavaa, e faamaopoopoina ai ia faamaumauga lenei, ia mo le tuuina atu i le tatou Matagaluega o Tina ma Tamaitai ma ia vave faamatuu atu ai ia faamanuiaga lenei.

O le naunautaiga o le tatou Matagaluega o Tupe, e le tuufaatalaloa ia le tatou Paketi. O Ianuari lea o le a maea, toe 5 masina maea ia le tatou

Tala Faatatau Autu o le Tupe lenei, ae e pei o le tatalo atu lena i le tatou Maota Fonon...

**Afioga Fuaava Suluimalo Amataga:** Lau afioga i le Fofoga Fetalai pe maua se avanoa...

**FOFOGA FETALAI:** Ia se i tulai mai ia le sui usufono o Aleipata Itupa i Luga...

**Afioga Fuaava Suluimalo Amataga:** Ia faafetai i lau afioga mo le avanoa. Ia e leai foi se agaga e faalavelaveina le saunoaga matagofie a le tamaitai Minisita. Faafetai mo le lipoti aemaise foi tulaga e pei ona oo i ai le asiasiga e faamautuina nisi o vaega. Ae ou te faatau ia le saunoaga lea, o le tatou galuega e fai faatasi.

Ia aemaise lava tulaga e pei ona saunoa ai i mea ia o lo o toa ai ia poloketi foi a itumalo. Ia e pau foi ia se vaega foi lea ona o lea na saunoa nisi o sui usufono i le tulaga lea e le i logoina foi nisi o sui usufono o itumalo, e tai pei la o si o matou itumalo, ia o lo o faagasolo e ese le mea la e galue ai nei le Ofisa, ese le mea lea e i le fanua o le Matagaluega o Siosiomaga la e faagasolo ai le galuega a le Ofisa.

Ia atonu ai ua misi i le asiasiga lea e faamautinoa ai, o lo o i ai lava. Ia aua o lea ou te iloa ua taua e le Matagaluega ia le lipoti a le Suetusi o si o matou itumalo... O la e totoe ia le matou tupe o le Ofisa o la e faagasolo le galuega o le faamama ma sua taunuu atu nisi o vaega materials e fai ai. E pau le isi vaega laitiiti faamolemole ia o le tatou Matagaluega. Ia ou te iloa o le PMU le tulaga lea i le tausaga lea na saini ai le maliliega lea e sau muamua ai ia le \$150, ae e pei ua avea le taimi lea na toe asi atu ai, ia e faapea o lea e toalia foi ia le matou GDP, ia po o le plan lea a le itumalo, ia ona o le tulaga lea faapea e tatau ona toe tuu i le isi template fou lea ua toe aumai.

Ia ona pau lea o se tulaga foi lea faapea o sina faasea laitiiti e le faapea foi lea ua faatali, faatali ana ou le toe alu atu i le vaiaso lea i ai, ia ae o la ua toe fai mai, faamalie ua galo ona lafo atu ia sa tuu atu i ai se faamatalaga, o le a le eseese tele ma le template lea na train ai foi ia officer o le itumalo, e faaoga mai lena aua ou te iloa lava e tutusa. A o le form up lava foi lea o le format ia ma columns ma mea faapena. Ia ae e pei o se mea foi lea assess lava i le tulaga lena, ia ae fai mai loa ia le latou komeni mulimuli, ia uma toe tuu loa i le template fou lea, ia e pei o le a toe toalia ai foi ia si o matou itumalo ia o le tulaga lava ia, ae ou te iloa e le o se lape foi lea o matou ona e le i iloa ua i ai se template fou, ina ia toe tuu uma i ai ia mea sa tapena muamua, ia ou te iloa po o Oketopa po o Setema na aumai ai ia le plan lena a lo matou itumalo i tausaga ua tuanai. Ia e na o ni nai vaega ia e tatalo atu ai le afioga i le Minisita ia aua le tapenaga a le Matagaluega, ma le agaga faaaloalo, faafetai.

**FOFOGA FETALAI:** Ia lea ua maua atu le saunoaga a le sui usufono mamalu...

**Tofa Lenatai Victor Faafoi Tamapua (Vaimauga 2):** Lau afioga i le Fofoga Fetalai...

**Afioga Hon Laauli Leuatea Polataivao Fosi:** Lau afioga i le Fofoga Fetalai pe maua se avanoa...

**FOFOGA FETALAI:** A malie lau... tulai mai le afioga i le Minisita o Faatoaga...

**Afioga Hon Laauli Leuatea Polataivao Fosi:** Faafetai manatu ua faaiuiu le saunoaga a le Minisita e ala i le asiasiga. E tau lava ina ou faamanino le tulaga leaga o lea foi ua toe atugalu ia le sui usufono o Aleipata Itupa i Luga i le asiasiga. Malilie sui usufono o le Palemene, o le umi ia ona matou fefulifulisai o le afioga i le Palemia, le afioga ia Toelupe ma le afioga i le Minisita o Tupe ma au nei, o le a le auala e faatino ai ia le asiasiga.

Na alu le vaiaso atoa lea na uma atu nei o tatou fale i le mataupu lenei. Na matou tasi ai, ae e le i faia le tali a le Minisita o Tupe i le mataupu lenei, e tataua ona o matou vaai i le mea lea e tupu. Na ala ai ona faatagisia le Matagaluega e aumai uma ia faafitauli, o lea o le a savavali le Komiti e vaai. E le mafai ona o matou omai i i e pei o lea na saunoa ia le Minisita o Tupe, avatu se tali le mautinoa. We have to be on the spot and the spot check. O le mea lea e faamalulu atu ai, i le paia ma le mamalu i lena Itu o le Maota, e matou te le i logoa foi lenei Itu o le Maota.

E tasi lava ia le mafuaaga, e tatou te faafaigofie mea faigata, tatou faapupuu mea umi. E le o se amanaia po o le solivale o le paia o nuu ma afoaga aua ua o tatou iloa lelei lava. E tau loa le asiasiga e afio atu ai ia le Sui Palemia ma matou, ia o faiga lauga le tatou mea e fai. E uma ane, e le maua le fatu lea ua avatu e le afioga i le Minisita o Tupe i le afiafi lenei, ina ia aumai aano. A la lea ua o tatou faalogologo i ai o ula lena o le taumafai atu ae malilie sui usufono mamalu, e le o se le amanaia, faamalulu atu Satupaitea. Na pau lava le mea na o matou manatu ai, aumai le lipoti a le Matagaluega ma le Matagaluega o Tupe, o le a le mea lea e tupu ia oe? E fia ni au ioe, fia ni au leai e le o talia lau Poloketi? O le mafuaaga lena.

Ia o lea ua fautua atu le afioga i le Minisita o Tupe, o le tatou way forward lena. Komiti, tupe, poloka i faamasinoga o a uma mea, o lea o le a tatou soalaupule. O la foi e faafofoga mai ia le Matagaluega, omai lea e tatou soalaupule e pei ona ou fai atu, po o le a le isi auala e matalatala ai mea ia e noatia ai outou e toa 10 ia sa faalogotata. Ia e pei o le agaga lea e avatu ai le talosaga i sui usufono mamalu, ina ne i pea mai, e le amanaia e le Sui Palemia ma le Komiti, o tatou itumalo. Ia ma le agaga faaaloalo.

**FOFOGA FETALAI:** Ia atonu o lea ua manino la lea vaega na tele na saunoa ai ia sui usufono mamalu o le tatou Maota. Faafetai foi i le afioga i le Minisita, o lea ua lauililiu mai ma auiliili mai ia mafuaaga.

Ia lau afioga i le sui usufono mai Vaimauga...

**Tofa Lenatai Victor Faafoi Tamapua:** Ia faafetai i lau afioga i le Fofoga Fetalai e tusa ai foi ma le avanoa. Ia e fia faamauina foi se faafetai a lou nei sui usufono i le afioga i le Minisita, le Tamaitai Minisita e tusa ai foi ma le saunoaga matagofie i le Polokalame lea, ia po o le tatou Poloketi lea o le Miliona. Faafetai foi i le Minisita o Faatoaga ma Faigafaiva, o lea la ua maua atu, o le spot check le mea lea sa agai atu i le Aso Faraile ma le Aso Toonai, faamalo faafetai.

Ae ua ou tulai atu lau afioga i le Fofoga Fetalai, ia ona o lea e i ai se vaega o lea sa afifi atu foi se faamatalaga sa fai i le tatou Poloketi lea. O lea sa saunoa ai foi ia le sui usufono o Lefaga ma Faleaseela i le tulaga lea o le Vodafone ma le feagaiga lea sa osi, ona o lo o i ai le tusi a lenei itumalo ina ua maua ia le matou pili muamua, ona o lea e matau atu o lea o le a faagasolo ona agai atu i tua ia le Vodafone, e faatino ia le latou galuega.

Ia mo le silafia e lau afioga i le Fofoga Fetalai aemaise foi ia le tatou Maota nei, ia o le faafitauli foi lea na saunoa ai le sui usufono o Lefaga ma Faleaseela, o le faafitauli foi lenei o lo o feagai ma si o matou itumalo. O le masina o Setema sa taunuu atu ia le matou pili muamua i le Vodafone. O lenei la sa tapa ai loa ia le feagaiga lea, e fia malamalama ai ia le matou Komiti. Ia o lea la sa manino i le aso lea, o le feagaiga na osi i le va o le Kamupani Telefoni ia ma le Matagaluega o Tina ma Tamaitai.

Ia o le feagaiga la lea, o la ua ave ia le exclusive rate i le Vodafone, e faia ia installation ma connections ma Komiti o Itumalo. Ia o totonu foi o le feagaiga lea, o la ua faatulaga le tau e totogi e le Ofisa, i lea masina ma lea masina. Ia e le natia, o le vaiaso lea na tea, na tipi ai le telefoni o le matou Ofisa ina ua avatu le pili e \$5,000 ae lea faatoa 4 masina talu ona taumafai e faagaioi ia le matou Ofisa.

Ia e pei o le feagaiga lea ua osi, o la ua faatulaga, e pei ona i ai nisi saunoaga a nisi o tatou Fonotaga ua tuana'i, e i ai le talitonuga, ua big le money, ae small le usage. E le oo se faaoga a le matou Ofisa i se \$1,200 i le masina. Ia e pei o se tuualalo lea e tatalo atu ai i lau afioga i le Minisita o lo o vaaia ia le Matagaluega i le taimi lenei ae le i gasolo atu i tua ia le galuega tele lea a le Vodafone, pe mafai ona toe tagai i le feagaiga lea sa sainia e le Matagaluega a Tina ma Tamaitai, ia ma le Kamupani Telefoni lea, o lea ua ave i ai le exclusive rate.

Ia ma le faaloalo lava...

**FOFOGA FETALAI:** Ia malo faafetai...

**Afioga Hon Toolesulusulu Cedric Pose Salesa Schuster:** Lau afioga i le Fofoga Fetalai...

**FOFOGA FETALAI:** Ia se i tulai mai le afioga i le Minisita o Siosiomaga...

**Afioga Hon Toeolesulusulu Cedric Pose Salesa Schuster:** Faafetai i lau afioga i le Fofoga Fetalai... leai e tasi lava si mataupu lenei ua fia faamalamalama, i te i ua ave sese e le tatou Maota nei, ia aemaise foi ia le seu faafogafoga mai a le tatou atunuu i le vaega lea e taua e Faasaleleaga 5.

O le Tulafono a le tatou Malo aemaise lava i eleele ma tanu, e fai le talosaga ne i te i lea e silafia uma e le tatou atunuu. A fia fai sau tanu, e te talosaga mai i le Matagaluega o Eleele ma Fuagafanua. O i e alu atu ai ia le asiasiga, ona aumai lea i totonu o le Komiti o Eleele, ia ona faatoa pasia atu ai i i, ona mafai lea ona faagasolo le tapenaina o lau tanu, faaoo lau talosaga i le PUMA, i le taatiaga o lau tanu, ona faatoa fai ai lea.

O lea o lo o faatino lava lea tulaga, ae faamalie atu, e leai Peseta e le i oo mai i le tatou Komiti Eleele se talosaga a lou itumalo e fai ai se tanu. Atonu la e aoga foi lea, e fautua ai i le tatou Komiti ma vaega uma nei, ia ae ao lava ona faatino ia tatou tiute, ona o lo o faatino uma e le lautele o le tatou atunuu, faafetai.

**FOFOGA FETALAI:** Malo, faafetai ia se i...

**Afioga Peseta Vaifou Tevagaena:** Lau afioga i le Fofoga Fetalai...

**FOFOGA FETALAI:** Masalo Peseta lea ua saunoa manino le Minisita i le mea e tatau ona fai. O le a toe tuu atu foi le avanoa ua... o le mea lena saili ifo oe i tua ua saunoa manino le Minisita... i le tulaga lena, aua e le mafai ona o tatou fefinau ai i le Maota o lea ua faagasolo ia le tatou galuega

**Afioga Peseta Vaifou Tevagaena:** Ia ua lelei faafetai o le a usitai i le mea lea e finagalo i ai lau afioga. E pau lava si mea sia lau afioga, leai ua uma ona tapenale Komiti lenei avatu foi i lou Matagaluega. Masalo e le o silasila lau afioga i tusi la e i o i le Matagaluega. E pei e pau lava na o si mea lea e fia avatu ai le...

**FOFOGA FETALAI:** Ia taatia lena mea lau afioga i le sui usufono mamalu. Tulai mai lau afioga i le Minisita o Tupe...

**Afioga Hon MULIPOLA ANAROSA ALE MOLIOO:** Faafetai i lau afioga i le Fofoga Fetalai, ia talitonu ua maea foi le folasaga a lou ia foi sui usufono e tusa ai ma fesili na tuuina mai aemaise foi o saunoaga ma fetalaiaga a le tatou Maota.

Ia ae le i seu lou sa i fanua, ia e faapai atu pea i lou itumalo. Faafetai lava i tou tapuaiga, faafetai i la outou tatalo. Faafetai i la outou fautuaga, le tou tapuaiga e manuia ai ou faiva. E leai foi se faiva e asa ma se maumau. O le mea totino lava a le tagata o le sese, e lape, e vaivai. Ia

ae i ai le talitonuga, o lo outou titi faitama ma le tou faatuatuaga ma le tou talitonuga i la outou sui usufono, ia o lea e folau ai ia lou sa i le Maota Fono o Samoa. Ma e lagona le mafanafana o le loto i la outou tapuaiga tatalo i le Aiga Sa Levi, i e o lo o faanonomanu i le Atua. O lo o faafaletuluia i totonu o maota ma laoa i le itumalo i la outou tapuaiga leleoa, a o tulai la outou sui usufono o le na outou tusiaao i ai ma aumai ia la outou faatuatuaga, ia e fai ma fofoga o le tatou itumalo.

Ia ou te faaleoina ia le agaga faafetai i le tatou Maota Fono, mai lava i lau afioga i le Fofoga Fetalai, ia ma sui usufono uma o le tatou Palemene. E ese foi le taua o finagalo ma manatu, o a outou fautuaga, o a outou tuualalo, ia e poupu ai ia le sa folau o le tatou atunuu aemaise lava ia le tamaoaiga o Samoa, ia o lo o nofo popole ai lava ia le tatou atunuu. Ia atonu o lena ua uma ona faailoa atu ia vaega uma o lo o taatia ai le tamaoaiga o Samoa, leitioa aumai le sini autu o le tatou 60 tausaga, tatou folau ma le faatuatua. O le tagata, ia e gata lona malosi, e gata foi lona tomai, ao le tatou faamoemoega tasi i le Atua, e folau ai ia le tatou sa i le faatasi mai o le Alii.

E faaleoina le agaga o le faafetai i lau Matagaluega, aemaise ai foi o le Komiti Faa-Palemene i lau afioga i le Taitaifono, le paia o le Komiti na lauililiuina le Tala Faatatau o le Tupe 1 i lenei tausaga. O lau Finance Sector, i lau afioga i le Tamaitai Pule Lesaoleitiiti, ia le saofaiga o tatou ACEOs, le paia lasilasi o le tatou Matagaluega o Tupe, faamalo le galulue, faamalo le fai o le faiva.

Le afioga i le Ofisa Sili o le tatou Matagaluega o Tina ma Tamaitai, faamalo. Ou te tua atu i la outou tuualalo, i la outou fautua, ia e folau ai le sa o le tatou Matagaluega, e tusa ai foi o tiute ma faiva ua tuuina mai. Lau afioga i le Tamaitai Pule o le Faletupe o Atinae, ia faafetai aemaise ai foi ia le tatou UTOS, o le SIFA, o le SLAC, ia o le tatou Faletupe Tutotonu o le Central Bank o Samoa, ia o vaega uma na, ia o lo o i lalo o le taitaiga foi a le Minisita o Tupe, aemaise ai foi ia le Matagaluega o Tina ma Tamaitai. Folau ma le faatuatua e manuia ai o tatou faiva.

**FOFOGA FETALAI:** Ua faamalo, faafetai saunoa i lau afioga i le Minisita o Tupe, ia aemaise foi i lenei vaitaimi o ou tiute Faaminisita o Tina ma Tamaitai. O le faafetai a le Nofoa, atonu e tasi lenei Matagaluega o lo o tele i ai saunoaga a le tatou Maota, aemaise foi o le faafogafoga mai a le tatou atunuu, aemaise le tamaoaiga o le tatou atunuu. Faafetai tele i lau afioga i le Minisita, o lea ua e aumaia le mautinoa, aumaia foi le faamafanafana ma le faalototele i le Maota ma le atunuu, ia aua lava ia le tatou tamaoaiga o lea lava e agaigai i luma, malo faafetai.

E le gata foi i lea o tatou tupe faaleoleo, mo tatou fefaatauaiga aua tatou oloa aumai, ia o lea ua mautinoa, o lea lava e agai i luma ma lava ma totoe. Ia atonu o lea foi ua uma ona oo lau saunoaga i le mafuaaga o le taugata o le soifuaga. Ou te ofo au o lea ua manino ma faafogoga foi le Maota lenei, malo tapena. Faafetai i le tatou Poloketi, ia malo faafetai.

Ia talu ai o lea ua o tatou taunuu i le tatou taimi manava, ia ua avatu lava se agaga o le Nofoa. E avatu lava le faamalo le usufono i le paia o le Palemene ua outou faaaaogagase lava ona o le taumafaiga o le tatou galuega aemaise o le faatauaina o le tatou valaauina. Malo le onosai, e i ai le manatu ua tatau ona fai ia se tatou malologa, tatou sailiili malosi e faaauau ia tatou Tausalumaga a taeao pe a aulia atu i le alofa o le Atua.

Faafetai atu i Ofisa Sili o Matagaluega, Faalapotopotoga Tumaoti o le tatou Malo, Samoa ma lau faafofoga tapuai mai ua faamalo tapuai, faafetai tatalo. Ia agalelei le Atua i le faigamalologa a si o tatou atunuu i lenei afiafi. Pe a o tatou tatala i lenei afiafi, ia tautai le Atua i ala uma o le a uia, momoli atu ia lo outou soifua ma aiga ma itumalo o faatali mai.

Ae tatou te le i tolopo, ou te talosaga atu i le sui usufono mo Faleata Nu.4 se i saunia se tatou tatalo e faauma ai le tatou Fonotaga i lenei aso.

***Na tolopo Tausalumaga a le Fono Aoao Faitulafono i le itula e 10:07 i le afiafi seia aulia le Aso Lulu 25 o Ianuari 2023 i le itula 9:30 i le taeao.***